


# BWÀ CINYÌ

## KWELA MBÌLÀ? AKÙLÀ!

 Mukalenge ànùbènèshe! Twǎnji tùshaalààyikù ànu ndambù biimányine kuulu, patùdi twinyika mitù yetù apa. Kùdikù dilòmba dyà pabwàdi anyi? Nwènù naadi, òmanyìshaayiku panùdi nwela byanza byènù muulu kùdi Nzambi apu biikàle nwamba, ku ciinè aci ne: “Mukalenge, Wèwè ngudi mumanyè dijinga dyànyì.”

<sup>2</sup> Taatù wa mu Dyulu, ncyà bushùwà ne—ne twètù tudi cisàmbà cidì cipete dyèsè mu dindà emu, dyà kwikalaku basangile mu nzùbu wa Nzambi, patùdi bamanyè ne kùdi bààbúngì menemene bàdi bafwànyine kuswa kwikalakù mu nzùbu wa Nzambi mu dindà emu, kàdi bàsanganyibwa mu mpitaadi ne mu malààlù à babèèdi. Kàdi Wèwè udi mutùpèèshe dyèsè edi dyà kwikalakù balwè kaaba aka leelù ewu. Ne kacya, Mukalenge, katùtukù tulwa bwà kutùmò nabò kùdi bakwàbò to, nànsha mutùdi banange bwobùm wè bwètù bwà muntu ne mukwèndè; kàdi tudi mwà kwenza aci ku mbanza yetù. Kàdi tudi balwè kaaba aka mbwà kubwela mu bwobùm wè ne Ewu Udi mutùsangìshe pàmwè bu bânà bananga ne bânà bàà muntu.

<sup>3</sup> Tudi tuKusàkidila mpindyewu. Ne mùshindù wùm wèpelè wutùdiku bamanyè mwà kubwela Neebè mu bwobùm wè mu mùshindù mujaalàme ngwà banyungulukile Dìyi Dyèbè. Dìyi Dyèbè ki Bulelèlè. Tudi basangile kaaba aka bwà dikàndà dyà nyumà. Ki ditùdi naadi dijinga, Mukalenge. Tudi ne cyà kwikala ne dikàndà bwà twamòna mwà kukànga mwoyi bwà nkùrusè yitùdi bambùle. Nènku tudi tulòmba bwà Wèwè kutùmakù Nyumà Mwimpè munène awu leelù ewu, ne kutùkànkamikakù twètù bònsò. Andàmùnàku ku malòmba à bantu Bèèbè pàdìbo basangile ne beele byanza byàbò muulu Kùdi apa, bwà ne bàdi ne dikèngela dyà bintu bu nànkù. Andàmùnàku dyònsò dyà kùdiwu, Mukalenge.

<sup>4</sup> Tudi tuKusàkidila bwà dilama dyà mwoyi wà Mwanèètù wa bakàji Ungren màalabà dilòlò awu, mu njiwù yà mu njila kaaba aka. Wèwè uvwa naabo luse, Mukalenge, ne tudi tuKusàkidila bwà bwalu abu. Nènku mpindyewu nyèwù tulòmba, Taatù wa mu Dyulu, bwà Wèwè kutùngùnukakù bwà kwikala neetù ne kutwàmbulwisha patùdi batùngùnùke ne lwendu apa, muntu ne muntu wa kutùdi. Tùpèèshèku bukole Bwèbè bwambulwishi ne—ne diitabuuja dyà kumanya ne Bwikadi Bwèbè bütù kacya kabùyikù bupangila abu nebwikalè neetù. Mu dîbà ditùdi katùyikù mwà kudikwacisha twètù biinè adi, tudi bamanyè ne

“Banjèlò bàà Nzambì mbààse citùùdilu cyàbò cinyùngùlùkile bàdi bàMuciina, ne Bòbò nebàtwàmbùlè bwà pa díbà kanà dyònsò katwìkadi twálwa kutuuta dikàsà ku dibwe.” Nènku tudi tuKulòmba mpindyewu bwà ùtùpèèshekù mabènesha Èbè bwà Dìyì, ne wàkwilèku kutùdi, ne munda mwètù, mu Dìnà dyà Yesù Kilistò. Amen.

<sup>5</sup> Ndi ne kusàkidila mùdi muunya wà pambèlu, muunya wà díbà, munkaci mwà kuteema. Kuulu kùvwa kubì be mu dindà emu. Ne ndi ngèèla meeji ne, mu ditùnga emu, nangàngà, tutu ne kuulu kubwicidile be, kwà kupangishangana ne disànka. Kàdi pa kumòna mùdi muunya wùteema, díbà dipàtuka, s’mbilenga be.

<sup>6</sup> Cisangilu cikesè cyà díkù leelù ewu, ndi ndisangisha ne bàna bèètù bàà balùme, nènku bàdi bàsanganyiibwa kwà mwanèètù wa bakàji, ne bàmwè bàà ku balelà bèètù bàà mu nyùngùlukilu wa cimenga ne mu myaba yònsò emu. Kùdi musùmbà munène wà dikèma wa beena-Branhams. Bu bòbò bònsò mwà kulwa bàfùmina ku Kentucky, bàlwa muneemu, ndi ngèèla meeji ne mbifwànyine kukèngela bwà twètù kufucila cimenga cijimà eci; bàdi búngì kabùyì kwamba. Kàdi cidi ànu dyalukila dikesè cyanàànà dyà kwètù kumbèlu. Tuvwa bònsò ne ciibidilu cyà kudisangishila kwà mààmù, bwalu yéyè nguvwa dikunji dyà kale dyà ciswikilu divwà ditùlamàkàje pàmwè, mu mùshindù kampànda. Kàdi Nzambì nyàwù wàngàci diinè dikunji dyà ciswikilu adi ku Dyulu, ne ndi ntèkemena ne twètù bònsò twadyàkusangila kwòkò aku dīngà ditùkù.

<sup>7</sup> Nènku mpindyewu mvwa ngàakula ditùkù adi, ngàmbe ne: “Nudi bamanyè’s, ndi ngèèla meeji ne—ne nèngìpidijè mayiisha àànyì à mu dyàlumingu àshaalè bule bwà tusunsa tutwè ku makumi àbidi, ne—ne, anyi makumi àsàtù, ne pashiishe nsambidilè babèèdi.” Nènku cyòci aci ki cīmwà ngèèla meeji mu dindà emu.

<sup>8</sup> Nènku mvwa ngeela meeji mààlabà awu dilòòlò, pàvwa Mwanèètù wa bakàji Downing mumbiikile mwambe ne, mubiikile Billy ne mwambe ne yéyè ne Mwanèètù wa bakàji Ungren pàvwàbo mu njila bènda bàbànda, bàvwa basenùnùke mu njila amu ne bapetàkane ne njìwù. Ne Billy pàcìvwàye ku dididiishi, pàmwè naanyì, ncyèna mumanyè ne tuvwa díbà kaayi to; pàmwàpa mu dindà emu, pa díbà kampànda. Nkààvwa muyè mu tulù kùkaavwa ndambù wa díbà. Mémè kutàngila lwà kwà Mwanèètù Wood, bàkààvwa bajìme myèndù. Ki mémè kutwà ànu binù panshi cyanàànà bwà kusambila, nènku ndi mwenze ànu ntwà binù, Cintu kampànda kungambila ne: “Maalu wònsò àdi bìmpè.” Ki díbà adi mémè kwambila Billy ne: “Mwambile ne: ‘Byònsò,’ mùmwà ndyàmbidila’s, ‘bìvwa mwà kwikala bìmpè.’” Ndi ne disànka dyàbùngì dyà kubàmòna mwab’ewu mu dindà emu, ne basòmbe mu nzùbu wa Mukalenge, lwà paanyimà apa paanyimà pàà bamane kwikala mu njila.

9 Bantu bàdi bakunange bikolè mùshindù awu, bwà kulwa bàfùmína mu ntántà wa nkàmà yà kilòmèètà bwà kutèèleja Èvànjeeliyò, pashiishe mémè kudyàmbidila ne: “Diyiisha dyà tusunsa makumi àbidì, byà bwalu ne lujòòkò lwinè lúntù naalu elu, kí mbafwànyine kudyùmvwaku bímpè to.” Pa nàнку mémè kudyàmbidila ne ndi mufwànyine. . . bule abu.

10 Nàнку díbà adi, kutèèlejakù Mwanèètù wa balùme Ungren, mwanèndè wa balùme’s, mu dindà emu, wimba ne: “Mùshindù Mwine Wúdi Munène’s we.” Yèyè ùdi ne. . . Yèyè udi ne mushinga kùdiye mu dindà emu kutàmba mùvwàbi makèèlèlè awu mu mapingaja, bwalu Nzambi munène wa mu Dyulu mmulamè ne mwoyi mamwèndè ne mwanààbò wa bakàji, bàà mushinga mukolè ne balenga abu.

11 Mpindyewu, leelù ewu, tudi bindile cikondo cyà dicỳònkómoka mu Mukalenge. Nèнку mvwa ne byena-bwalu bìbìdì anyi bìsàtù mwab’ewu bímvwà ntàngila, kàdi ncìvwà, ncìyikù mwà kutwishila meeji pa ne ncyèpi ciinè címvwàku mufwànyine kwakwilapu mu dindà emu to. Címwè cyà ku byòbì cìvwa ne: “Muupwilaayi Yèyè maalu ènù àdi ànùtàcisha, bwalu Yèyè ùdi ùdìtacisha bwà bwalu bwènù. Mpindyewu, pìikalàbi ne Yèyè ùdi ùdìtacisha, bwà cinyi kuyikù ùdìtacisha wèwè?”

12 Pa nàнку cikwàbò, Billy Paul, anyi kí m’Billy Paul to. . . Mwanàànyì mukwàbò wa balùme awu, Joseph, ngudi muntwàdile cyena-bwalu eci kukaadi ntántà mule. Yèyè ùvwa musòmbè mu cibambalu dîngà ditùkù, nènku kwambayè, pàvwàye mutàngile kuulu ku fòtò, ne Billy. . . Anyi, Joseph ùtu munange màtù wàmba kufwà, mùtù twànà twà balùme tukesè amu; màtù ne tubalu, nudi bamanyè’s. Ki yèyè kungambila ne: “Papa, Yesù ùtu ne bwàtù anyi?”

Ki mémè kwamba ne: “Ncyèna mumanye to.”

13 Nàнку paanyimà pàà yèyè mumanè kujuuka ne mupàtùke pambèlu, ki kumvwilabi bwà mémè kudyàmbidila ne: “Yèyè ùtu ne bwàtù anyi?” Ki mémè kwangacilapu cyena-bwalu, nènku mémè kucifùnda pa kàlipè kàànyì aka mwab’ewu ne: “Yesù ùtu ne bwàtù anyi?” Ki kumvwilabi bwà mémè kwela meeji ne: “PàvwàYe pànu pa buloba, byàkakèngela bwà Yèyè kusomba difù bwà kuledibwamù, lukità bwà kujiikiibwamù, bwàtù bwà kuyiishilamù, kàdi Yèyè m’Mwendeshi wa màzuwa à màyi à kale à Siyònà.” Bushùwà, Yèyè ùdi naabu. Kàdi, nènku byòbì byena-bwalu bímvwà ngèèlela meeji abi, ngèèla meeji ne mvwa pàmwàpa mufwànyine kubyàngata pashiishe, kumpàla kwà twètù kuumuka bwà kwalukila.

14 Nudi bamanyè’s, mémè ntu munange kuyiishila mu tabernacle emu, bwalu ki wetù èkèleeziyà sungasunga. Tutu tudyùmvwà badilekèlele bwà kwamba cyònsò cidì Nyumà Mwímpè wàmba aci. Mu myaba mikwàbò, nànsha mùtùbi ne muntu awu mmuswè bwà wèwè kudyùmvwà mwakidila bilenga,

wêwê udi udyùmvwakù ànu mucintàmane bwalu—bwalu udi usanganyibwa mu èkèleeziyà wa bendè, ne mwikàle muswè kwikalakù ne bukàlàngà bukùmbàne bwà kuneemeka àbò—àbò meeji ne dilongesha dyàbò bôbò.

<sup>15</sup> Ndi mupicile mu cikondo cilenga cyà dikèma lumingu elu kwà Mwanèètù Burcham kwàka. Kí mèmè kubwela mu cyapù mùtùbo bènzela fromage. Ndi mmòna ne yèyè ne mukàjèndè, ne mwanèndè wa balùme ne bakwàbò, bàdi kaaba aka mu dindà emu. Ne mwawa misangu yònsò ànu ngèèla meeji ne cyapù cyà dyenzela fromage cívwa cifwànyine kwikala cintu kampànda bu mikwàbò myaba yínkaadiku mubwelèbwele, kaa, mwenze bu mùdi mulekelelangane ne mwa bukooyà. Ekèlekèle, ndi mwà kwamba cintu címwèpelè cyà ne, wêwê udi mwà kushààla ne mwoyi mutùùje ne mwaba awu kí ngwà bukooyà to. Wàwa's wùvwa mmwaba mutàmbe kwikala wa mankendà wúnkaadiku mèmè ewu mubwelè, ne nangananga mu cyapù. Kàdi ncívwa mufike ku dyumvwa to. Mèmè kudyàmbidila ne: “Kaa, pàmwàpa nebènzè kilò mitwè ku makumi ànaayi ne yitaanu yà fromage ku ditùkù's.” Kàdi bàdi bènza binunu bisambòmbò byà kilò ku ditùkù dyònsò, ne byapù bisàtù biikàle bitàmbula's. Mèmè kudyàmbidila ne: “Kaa, ekèlekèle, udyàdya miine fromage yònsò ayi ki nganyì's?”

<sup>16</sup> Kàdi Mukalenge mmubènèshe muntu ewu. Ngàkapetaku dyèse dyà kubwela mu nzùbu mwèndè, dikhù dilenga dyà dikèma, mukàji mwimpè mudilàmbùle. Ne bôbò kabèènakù ne kabingilà nànsha kàmwè kàà kubèngabò kwikala ne mwoyi bwà Kilistò ditùkù dyònsò to, mùdìbo bènza amu. Ndi mutwilangane ne bânà bèndè bàà balùme, ne mbânà balenga bàà dikèma. Tudi ne kusàkidila kwàbùngì be bwà bwobùmwe ebu butùdi naabù muntu ne mukwèndè.

<sup>17</sup> Mèmè kusangana ne mpaasàtà wabò wa kale ùvwa mmuntu ùndi—ùndi mumanyè, Mwanèètù Gurley, muntu mulenga wa dikèma wa mu diitabuuya dyà Mpenta Musanga, ùmvwa mutuutàkèène nendè kùkaadi bidimu, mu Jonesboro, mu Arkansas. Kàdi ncívwa mumanyè ne bôbò bàvwa...ne yèyè guvwa mpaasàtà wèndè to, nànsha nàнку.

<sup>18</sup> Mpindyewu nwavùlukaayi masangisha à mu dilòòlò edi. Ne pashiishe, bu Mukalenge mwà kwanyisha, mu dyàlumingu dilwalwà edi kàbidì tudi tutèkemena ne netwàkule. Ne pashiishe ndi ngèèla meeji ne mu dyàlumingu dyàlondà nebikèngele bwà nye dîbà adi ku Chicago. Pashiishe ncyàkwikalapù to bwà cikondo kampànda, nebikèngele bwà mèmè kwaluja dikhù dyànyì kwètù, kubààluja, anyi kubààluja ku Arizona bwà ne, bânà, bààmòna mwà kudifùndisha cyàkàbidì mu kàlaasà. Nènku dîbà adi netùlekelèku kutàcisha mpaasàtà, pa kwangatangata kwà masangisha èndè.

<sup>19</sup> Pa nàнку, nàнку awu tudi ne kusàkidila kwàbùngì kùdi

Mwanèètù Neville bwà mwakidilu wèndè, nudi bamanyè's, bwà—bwà dimbiikidisha dyèndè. Ne yêyè mmutàmbe kwikala, kàyì. . . Mémè, mwanèètù, ntu munange muntu wa nàнку awu, udi kàyikù ne lubombo, kàyì ne citù to, mwikàlè ànu ne bwena Kilistò bushùwashùwàlè. Ntu munange aci.

<sup>20</sup> Mpindyewu netwikalè mwà kubalaku ndambù wa Mifundu ne pashiishe kwelakù nsèkè. Kàdi ncyéna mumanyè menemene ne ndìbà kaayi ditwàpàtukà to, ne miinè Mayiisha maleemàle aa, kàdi ndi ngèèla meeji ne. . . Mvwa ngàakula ditùkù adi pa dyakula dyà ntàntà mule, ki muntu kampànda kwambayè ne: “Èè, mpindyewu, bu wèwè—bu wèwè mwà kwakula ànu tusuna tukesè menemene; pèèbè nyàwù utu wakula byenze bu ne mmaalu masokoka, twamb'eku twamb'eku,” yêyè ne, “twètù—twètù katùvwakù bafwànyine kufika ku dibyùmvwa to.” Yêyè ne: “Tùngùnuka wèwè ànu ne kwakula, ne paanyimà pàà katancì bìdi bipàtuka,” mwàkambàye. Pa nàнку pàmwàpa Mukalenge ní ngudi muswè bwà twètù kubyenza mùshindù awu's.

Twànjàayi ànu kwinyika cyàkàbìdi mitù yètù.

<sup>21</sup> Mukalenge, Dìyi Dyèbè ndyèdì ditèèka dyunzulula pa cyambilu, ne tudi bamanyè ne dìngà ditùkù neDìkàngiibwe bwà musangu wàDì wà ndekeelu, dìbà adi Dìyi nedìikalè mubidi. Ne pashiishe tudi—tudi ne kusàkidila bwà cikondo eci mu dindà emu. Nènku tükàngwilèku, ku Nyumà Mwimpè Webè, bìdi munda mwà Dìyi ditwàbalà edi. Swàkù bwà Nyumà Mwimpè àtùlongèshè leelù ewu bintu bìvwà bikèngela bwà twètù kumanya. Nènku swàkù bwà twètù pèètù, bwà kuleeja disàkidila, tùtèèlejè Dìyi dyònsò ne ntèmà yònsò, twèlànganèPu meeji mu ndòndò. Ne pashiishe swàkù bwà aba bàdi bàtèèlejila ku mukàbà wa mèyi abu, swàkù bwà batèèlejèku ne ntèmà yònsò. Ne swàkù bwà twètù kwikalaku bakùmbàne mwà kujingulula bìdi Nyumà Mwimpè ùteeta kutùbuulwila abi. Bwalu nyèwù tufika ku dyumvwa ne, bu Yêyè mwà kutùlaabakù, dìbà adi dilaabiibwa adi kadyèna dyà pàtupù to. Dìdi mbwà kiipàcilà kampànda, bwà kukwàtaka mudimu bwà dyàkàlenga, bwà Mukalenge. Nènku swàkù bwà myoyi yètù ne cyumvwilu cyètù bìikalè bikàngula, Mukalenge.

<sup>22</sup> Swàkù bwà twikalèku ne budìikadidi bwà kwakula, ne budìikadidi bwà kutèèleja, ne kupeta mùshindù wà kufika ku diitabuuja, bwà kwitabuuja bitùdi batèèleje abi, bu mùdìbi bifùmina ku Dìyi dyà Nzambi; bwà byàmòna mwà kubadiibwa kutùdi, bu Mwoyi wà Cyendèlèlèlè, mu Ditùkù dinène dilwalwà adi. Tùbènèshèku leelù ewu. Tùpiishèku patùdi bapìile. Tùmanyishèku bilèma bitùdi naabi. Ne tùbènèshèku mu mùshindù wùdi mujaalàme, bwà twamòna mwà kumanya kwà kwela dìnù ne kwà kwela dikàlà, ne mwà kwenza maalu pa buloba butùdi mpindyewu ebu; bwà twamònaku, mu nsòmbelu wetù pànwàpa, mwà kupèesha Yesù Kilistò bunèmè, Yêyè

wâkafwà bwà kutùpèèsha Mwoyi mu dyàmwàmwa dinène. Tudi tulomba nùnkù mu Dinà dyà Yesù. Amen.

23 Mpindyewu ndi muswè kubala ànu mu myaba yibìdì cyanààná yà mu Mifùndu, mu dindà emu. Ne wùmwe wà ku yòyì wùdì ànu wùsanganyibwa mu Mukàndà wà Ekèsòdè. Bwà kwamba menemene, yònsò yibìdì yìdì yìsanganyibwa mu Mukàndà wa Ekèsòdè. Wùmwe, mu nshapità wa 13, ku mvensà wa 21 ne wa 22. Ne wùdì wùlondà wùdì mu nshapità wa 14, mvensà wa 10, wa 11 ne wa 12. Mpindyewu nêmbadilè mu Ekèsòdè 13.21.

*Nènku MUKALENGE ùvwa ùya kumpàla kwàbò mundaamuunya mu dikunji dyà ditutu, bwà kubàlombola mu njila; ne bufùkù . . . dikunji dyà kapyà, bwà kubakenkeshila; bwà kwendabo mundaamuunya ne bufùku:*

*Yèyè kaakuumusha dikunji dyà ditutu adi mundaamuunya, anyi dikunji dyà kapyà adi bufùkù, kumpàla kwà bantu to.*

24 Mpindyewu mu Ekèsòdè 14, ku mvensà wa 10:

*Nènku pàakaseemenà Pàlò pabwîpì, bânà bàà Izàlèlèlè mbenze ànu bàtùpula mèsù, nènku, mònaayi, beena Ejiipitù bàvwa bènda bàbàlonda paanyimà; ki kukwàcìkabò bwòwà bukolè, ki bânà bàà Izàlèlèlè kwelabò mbilà kùdì MUKALENGE.*

*Nènku dîbà adi bààkambila . . . Mòsà ne: Mbwalu kakùvwa . . . (numfwilààyikù luse).*

*Nènku bààkambila Mòsà ne: Mbwalu kakùvwa nkità mu Ejiipitù, ki paudì mulwè neetù bwà twètù kufwila mu cipèlèlè anyi? bwà cinyi wèwè watwènzèdì nùnkù, bwà kutùpatula mu Ejiipitù?*

*Kì ncyòcì eci dîyì ditùvwa tukwambila mu Ejiipitù, twamba ne: Tùlekèlè cyanààná, bwà tükwacilè beena Ejiipitù mudimu anyi? Bwalu bìvwa mwà kwikala bitàmbe bwìmpè bu twètù mwà kukwacila beena Ejiipitù mudimu, pamutù pàà twètù kufwila mu cipèlèlè.*

25 Nêmbalè ndambù mukwàbò wa mvensà:

*Nènku Mòsà kwambilayè bantu ne: Kanùcìnyikù . . . to, . . .*

Mpindyewu tèèlejààyaaku ne ntèmà mwaba ewu.

*. . . Mòsà kwambilayè bantu ne: Kanùcìnyikù nwènù to, shàalaayi pòlàà, nènku nùmonè lupàndù lwà MUKALENGE, lwàleejaye . . . kunùdì mu ditùkù edi: bwalu beena Ejiipitù banwàmònu leelù ewu aba, kanwàkubàmònakù kàbìdì to bwà kashidì.*

*MUKALENGE neànùlwile mvità, nènku nwènú shàálaayi bapùwe . . . MUKALENGE wàkambila Mòsà ne: Udi wela mbìlà kùndi bwà cinyi? ambilà bânà bàà Izàlèèlà, bwà bàtùngunuke bayè kumpàla:*

*Kàdi wêwè ela dikombo dyèbè adi muulu, ne olòlà cyanza cyèbè pamutù pàà mbù, ùmwabùlùlè pankaci: nènku bânà bàà Izàlèèlà nebèndelè pa buloba bùmè bìikàle bàpicila munkaci mwà mbù.*

*Nènku mèmè, mōnaayi, mèmè nēmpapishè mwoyi wà beena Ejiipitù, bwà bóbò kubàlonda: ne mèmè nēndyāngàcìlè luumu pa Pàlò, ne pa cilwìlu cyèndè cyònsò, ne pa màkalù èndè à mvità, ne pa babàndi bèndè bàà pa túbalù.*

*Nènku beena Ejiipitù nebàmanyè ne mèmè ndi MUKALENGE, pāngùkalà mudyāngàcìle luumu pa Pàlò, ne pa màkalù èndè à mvità, ne pa babàndi bèndè bàà pa túbalù.*

*Nènku mwanjèlò wa Nzambì, uvwa uya kumpàla kwà citùùdilu cyà Izàlèèlà awu, wàkuumuka ne wàkaya paanyimà pààbò; ne dikunji dyà ditutu dyàkuumuka . . . kumpàla kwàbò, ne dyàkiimana paanyimà pààbò:*

*Nènku dyàkalwa pankaci pàà citùùdilu cyà beena Ejiipitù ne citùùdilu cyà Izàlèèlà; . . . òwà ditutu dyà m̀idimà kùdìbò, kàdi òwà òfìla bukènke bufuku kùdì aba, mu mùshindù wà ne ewu kàyikù mwà kuseemena pàvwà mukwàbò to bufuku bujimà abu.*

*Nènku Mòsà wàkoolola cyanza cyèndè pamutù pàà mbù; ki MUKALENGE kwenzaye bwà ne mbù adisakè paanyimà ku cipeepèlè cìkolè cyà ku esètè bufuku bujimà abu, ne kuvwijaye mbù mushààle buloba bùmè, nènku màyi kwabulukawu.*

*Nènku bânà bàà Izàlèèlà bààkabwela munkaci mwà mbù bènda bèndela pa buloba bùmè, ne màyi àvwà menze cimānu bwàbò bóbò ku cyanza cyà dyàbalume, ne ku cyà dyàbakàji.*

*Ki beena Ejiipitù kulondabo, ne bààkabwelamù bènda bàbàlonda paanyimà lwà pankaci pàà mbù apu, ne túbalù twà Pàlò twònsò mene, màkalù èndè à mvità, ne babàndi bèndè bàà pa túbalù.*

*Ki kwenzekabi ne, mu cilù cyà mu dindà MUKALENGE kutāngijayè mèsù panshì pa cilwìlu cyà beena Ejiipitù mutāngidile mu dikunji dyà kapyà ne . . . ditutu, ne kucyòmpakajayè cilwìlu cyà beena Ejiipitù,*

*Ne kupawulaye nkàtā yà màkalù àbò à mvità awu, mu mùshindù wa ne wòwò bàkaèndesha ne lutātù lukolè, bifikishe too ne beena Ejiipitù ku dyamba ne:*

*Tùnyeemàayi kumpàla kwà Izalèèlà; bwalu MUKALENGE  
ùdi ùbàlwangeena bóbò mvità ne ulwisha beena  
Ejiipitù.*

26 Diyì dyà Nzambì ndinène dyà dikèma, dilenga dyà dikèma, kakùyì mùshindù nànsha mukesè wà kwimanyika kuDìbala to. Dìdì ànu dyènda dìlwa Mwoyi, patùdì twenda tuDìbala apu. Ndi ngèèla meeji, mu cyena-bwalu eci mu dindà emu, nànsha mùdìci cikwàciibwa pa mukàbà wà mèyì, ndi muswè kwamba nùnku ku ntwàdijilu eku ne, cìdi cìsangana, ndi ndisanganamù mèmè mwinè. Ne kabingilà kàdì kènza ne mèmè. . . Makèèlèlà awu, mèmè munkacì mwà kulonga, ki mèmè kumata pa cyena-bwalu eci, ki dîbà adi mèmè kudyàmbidila ne: “Nèngiikalè, bu Mukalenge mwà kwanyisha, mwà kwakula ànu pa cyôci aci, bwalu cìdi cimpwekeshakù.” Ne ndi ntèkemena ne cìdi citùpwekeshakù twètù bônso, bwà twètù kumòna, ne bwa citùfikishakù ku dibànduluka; ne ku dilongaku ndambù, ne kufwànyikija ditùkù dìvwà mwinè musangu awu adi, kùdì. . . ne ditùkù dídìku mpindyewu edi.

27 Ndi muswè kwangata myàkù yisàtù bu cyena-bwalu, ne cìdi ne: *Bwà Cinyì Kwela Mbilà? Akulà!* Nzambì wàkambila Mòsà, mu mvensà wa 15 emu ne: “Bwà cinyì udi wela mbilà kùNdi? Ambilà bantu, bwà baye kumpàla.” Nènku: *Bwà Cinyì Kwela Mbilà? Akulà!*

28 Mpindyewu, tudi ne cyena-bwalu ànu cyètù cyà bushùwà eci, nènku nènteetè bwà kulwijakaja ne mwànyì mwònsò, mwàndombolà Nyumà Mwimpè amu. Ne ndi muswè kwela meeji ku. . .ku cyena-bwalu eci, ku Mòsà mwikàle wèla mbilà kùdì Nzambì, mu cikondo cyà lutàtù; ne Nzambì mu kwandamuna mwikàle ùdyula Mòsà, ànu mene pàvwà lutàtù alu—alu lunúnke apu. Ne cìdi ànu nngiikàdìlù's, mùdìbi bimwèka, bwà muntu bwà kwela mbilà. Ne dîbà adi ndidyula kaayì—kaayì bwà Nzambì ùkùdimuka kàdì kumudyula bwà dicyàmba, bwà dyela dyà mbilà kùdìYe. Mbimwèke ànu bu ne ncintu cikolè be.

29 Misangu yàbùngì patùdì tutàngila mu Mifundu, bilondèshile wètù twètù mùshindù wà ditàngila, bìdi bimwèka ànu bu ne mbikolè be. Kàdì twètù baCìlongè katancì kakesè, tudi tujandula ne Nzambì wa lungènyì lwònsò awu mmumanyè ànu menemene cìdiYe munkacì mwà kwenza. Ne Yèyè mmumanyè mwà kwenza biinè bintu ebi ne mùdì mwà kukwàta mudimu ne muntu. Yèyè mmumanyè cìdi mu muntu. Yèyè—Yèyè mmumumanyè. Twètù katwèna bamanyè to. Twètù tudi tumanyina ànu ku luseke lwà mamanya à mu mitù. Yèyè ngudi mumanyè ne cìdi menemene mu muntu ncinganyì.

30 Mòsà ùvwà mulediibwe pa buloba apa, nsongàalùmè mwikàle ne mapà. Ùvwà mulediibwe bwà kwikalayè mupròfetà, musùngidyanganyì. Ùvwà mulediibwe ne byà mudimu bileidiibwe munda mwèndè, ànu mùdì muntu yònsò udi ulwa



pa buloba ewu mwikàle ùlèdiibwa ne byà mudimu ebi, mûndi mêmè ngùtabuuja ne—ne mwànyì mwônso didyanjila-kumanya dyà Nzambì, didyànjlila-kulongolola.

<sup>31</sup> “Kí nne Nzambì mmuswè bwà muntu nànsha umwe àbùtuke to, kàdi mbwà bônso bàfikè ku kanyinganyinga.” Kàdi, bu mùdiYe Nzambì, bìvwa bikèngela bwà kwikalaYè mumanyè, ne mumanyè bulelèlè, “ndekeelu kumpàla kwà mbangilu.” Nwamònu anyi? Yèyè kàyì mumanyè to, dîbà adi Yèyè kí ngwa kàyì mikàlù to; ne Yèyè kàyì wa kàyì mikàlù to, Yèyè kèna Nzambì to. Pa nànkù, Yèyè kàvwa muswè, bulelèlè, bwà muntu nànsha umwe àbùtuke to, kàdi Yèyè—Yèyè ùvwa mumanyè ne uvwa mwà kubùtuka nganyì ne uvwa kàyì mwà kubùtuka nganyì. Ki bwà cinyi, kiipàcilà mene kàvwà Yesù mulwile pa buloba, mbwà kusùngila aba bàvwà Nzambì, ku didyànjlila-kumanya Dyèndè, mumòne ne mbàvwà baswè bwà kusùngidiibwa, nwamònu’s, bwalu buloba bujimà bùvwa bupìishìibwe. Ne mêmè ncyèna mmòna mutùdiku bafwànyìne kucìlongesha mûngà mùshindù kampànda pa kuumusha wà didyanjila-kumanya dyà Nzambì to, ne Bible ùdi wamba bitòoke tòò ne Yèyè mmumanyè ndekeelu kacya ku cibangidilu, ne mwikàle mwà kucyàmba.

<sup>32</sup> Ki bwà cinyi, pàdi—pàdi muntu ùteeta bwà kwikala cintu kampànda cidiye kàyì to, yèyè ùdi ànu wenza ditentula cyanààna, nènku nànsha ku tootooto anyi ku ndandanda cyàdyàkukwela patòoke. Mpèkaatù yèbè neyikwelè patòoke. Kwèna mwà kuyìbwikidijakù to. Kùdi cibwikilu ànu cìmwèpelè bwà mpèkaatù, m’Mashi à Yesù Kilstò, ne Ówò kaèna mwà kulaabiibwakù to ànu Nzambì mukubiikile kacya ku difùkà dyà dyulu ne buloba. Bwà cyòcì aci ki bùvwa Mashi awu meediibwe panshi; kabiyi bwà kudyatakajiibwawù, ne kusekiibwawu, ne—ne kuàbwèlelabù ku citungu, ne—ne kwambiibwawu mambavi to, ne—ne bikwàbò. Ávwa mbwà kiipàcilà kàà buludi. Ncyà bushùwà. Kabiyi bwà kunàya naawu, kabiyi bwà kutentudiibwa, mu kwamba kwà ne mpèkaatù mmibwikila pàdiyì kayiyi mibwikila to. Ne muntu nànsha umwe kèna mwà kwikala ne mpèkaatù yèndè mibwikila pàdi dìnà dyèndè kadiyì difùnda mu Mukàndà wa Mwoyi wà Mwàna wa mùkòòkò kumpàla kwà difùkà dyà dyulu ne buloba to. Yesu wàkamba, Yèyè mwinè ne: “Muntu nànsha umwe kèna mwà kulwa kùNdì pàdi Taatù Wanyì kàyì mumukòke nànsha. Ne bônso bàkàadi Taatù,” bwalu bumana kwenza, “muMpèeshe, nebàlwe kùNdì.” Ncyà bushùwà. Pa nànkù kwèna mwà kufikisha Mèyì ku didìnga nànsha. Àdikù mbwà Bulelèlè ne bwà dilongolola.

<sup>33</sup> Ne Mòsà wàkalediibwa ne dipà dyà diitabuuja; diitabuuja dinène ndivwà naadi Mòsà. Tudi tudimòna, paanyimà pàà katanci, dimwènèkela mu yèyè. Ne yèyè wàkalediibwa mu dîkù dinène, mutùdi bamanyè mùvwà tatwèndè ne mamwèndè, bàpàtùkile mu dîkù dyà Lewi. Bwalu, bwalu-bulonda kaaba

aka, kumpàla kwà eci, mu Mukàndà wà—wà Ekèsòòdè, bùdi buleeja bilenga byà dikèma nsòmbelu wa muntu munène ewu. Ne yêyè ùvwa umwe wa ku—ku bantu bàà batàmbe bunène bàà mu Bible, bwalu yêyè ùvwa cifwànyikijilu cyà pyòpyopyò cyà Mukalenge Yesù.

<sup>34</sup> Yêyè wàkalediibwa mu dileediibwa dyà pabwàdì menemene, ànu bu Mukalenge Yesù. Yêyè wàkalediibwa mu cikondo cyà dikèngèshiiibwa, ànu bu Mukalenge Yesù. Yêyè wàkalediibwa bwà kwikalaye musùngidyanganyi, ànu bu Mukalenge Yesù. Yêyè wàkasokokiibwa kùdì baledi bèndè, kule ne mwena lukuna, ànu bu Mukalenge Yesù. Ne wàkalwa pa cikondo cyèndè cyà mudimu, ànu bu Mukalenge Yesù. Yêyè ùvwa mulombodi, ànu bu Mukalenge Yesù. Yêyè ùvwa mupròfetà, ànu bu Mukalenge Yesù. Ne yêyè ùvwa mufidi wa mikenji, ànu bu Mukalenge Yesù.

<sup>35</sup> Ne tudi tusangana ne yêyè wàkafwila pa Lubwebwe, ne ùdi ne cyà kwikala mubiike kàbìdì ku lufù ne bikwàbò byònsò, bwalu, bidimu nkàmà mwandamukùlù paanyimà yêyè ùvwa mwimanè pa Mukùnà wa Dikùdimuka dyà mpàla, mwikàle uyiiikilangana ne Mukalenge Yesù. Nwamònu anyi? Banjèlò bààkamwambula e kuyabò nendè. Muntu nànsha umwe kàtukù mumanyè ne mpenyi pàakajiiikiibwàye to. Nànsha dyabùlù kààkamanya aci to. Bwà kwamba menemene, mèmè ncyèna ngiitabuujja ne yêyè wàkajiiikiibwakù to. Ndi—ndi ngiitabuujja ne Nzambi awu ngwàkamwambula e kuya nendè, ne—ne yêyè wàkafwila pa Lubwebwe lùvwàye mulonde matùkù èndè wònsò à mwoyi alu.

<sup>36</sup> Ne yêyè ùvwa cifwànyikijilu cipwàngàne cyà Kilistò. Yêyè ùvwa mfùmù kumutù kwà cisàmbà. Yêyè ùvwa mufidi wa mikenji. Yêyè ùvwa—yêyè ùvwa mudiishi wa—wa cisàmbà. Yêyè ùvwa kantu ne kantu, mu—mu cifwànyikijilu, kàvwà Kilistò mwikàle aku.

<sup>37</sup> Mpindyewu, dîbà adi, mònaayi ne yêyè wàkalediibwa ne mapà manène aa ne mwikàle ne ngiikàdìlù munène, pashiishe kukèngelabi ànu bwà Cintu kampànda citeemeshèpu bukènkè, bwà kufikisha cintu aci ku Mwoyi.

<sup>38</sup> Nwamònu's, mbulelèlàà ne dimiinu dyà Nzambi nditèeka munda mwètù kacya ànu ku difùkà dyà dyulu ne buloba. Ne pàdì anu Bukènkè abu butuuta pa dimiinu adi bwà musangu wà kumpàla, Bùdi budifikisha ku Mwoyi, kàdi bìdì bikèngela bwà Bukènkè bwànji dyàmbedi kulwa pa dimiinu adi.

<sup>39</sup> Ànu múnkaadi mulongèshèlòngèshè misangu yàbùngì bwà mukàji mutekète awu ku ciina cyà màyi, yêyè mu ngiikàdìlù awu. Nànsha mùvwàye muntu wa—wa luumù lubi amu, nànsha mùvwà nsòmbelu wendè—wendè mupwekèshiiibwe milongo amu, ne mwikàle ùsanganyiibwa mu ngiikàdìlù awu bwalu bilèlè kacya kabivwakù bimulenge to, kàdi, nànsha nànkù, Bukènkè abu mbwenze ànu bumulenga bwà musangu wà kumpàla, ne

lùkàsà lwónsò yéyè ùmba ùBùjngulula, bwalu kùvwa cintu kampànda mwaba awu bwà kwandamunaKù. “Pàdì ndòndò ùbìikila Ndòndò,” kùdì ne cyà kwikala Ndòndò mu mwaba kampànda bwà kwandamuna ku dibìikila adi.

<sup>40</sup> Nènku Mòsà mwab’ewu ùvwa mulediibwe mupròfetà ewu, kàdì ùvwa mukolèshiiibwe mu cilongelu cyà mamanya à mu mitù ne mu nzùbu wa bukalenge wa Pàlò. Pàlò Seti awu, mwena mwinshì mwà bukòokeshi mwàkakolèshiiibwayè amu awu, ùvwa mmuntu ucìvwa ànu ne luumù, ne ùvwa mwiitàbuuje ne Yòzefù ùvwa mupròfetà wa Mukalenge. Kàdì kulwaku Ramsès paanyimà pàà Seti, kàdì Ramsès yéyè kàakatwaku Yòzefù mushinga to. Nànku awu, ki bwà cinyi, ke mwaba awu wàkabangila lutàtu, mpindyewu, pààkajuukàku Pàlò uvwa kàyì mumanyè Yòzefù.

<sup>41</sup> Kàdì ngiikàdìlù minène eyi, twänjàayi kwakulapù ànu kakesè cyanààna, nènku, kumpàla kwà twètù kufika ku citùpà cìdì citàmbe mushinga cyà cyena-bwalu. Mémè ntu ne mùshindù wà pabwàwù wa kutèeka cyena-bwalu, pashiishe kwenda kwibakilapù, kàdì Mukalenge àtùkwacisheku mu dindà emu patùdì twibakilapù apa.

<sup>42</sup> Mòsà, mwikàle mulediibwe ne dipà dinène dyà diitabuuja edi. Pashiishe, yéyè wàkalaabiibwa ne wàkatùmiibwa ne mudimu ku cipuka cìvwa cìlakuka kapyà, bwà kusùngilaye cisàmbà cyà Nzambi. Mpindyewu, mònaayaaku ne ngiikàdìlù minène yà mùshindù kaayi yìvwa naayi muntu ewu’s! Yéyè wàkalediibwa mbwà cintu kampànda cisùngülùke. Nzambi ùvwamù ne kiipàcìlà kampànda.

<sup>43</sup> Nzambi ùdì ne kiipàcìlà mu kwikala kwèbè kwà kaaba aka. Nwamònu anyi? Wéwè, wìkalakù ànu mwà kafika kaaba aku, búngì bwinè bwà ntàtu yùdì wepwila Nzambi’s we, ne udyèpwila wéwè mwine kàbidì.

<sup>44</sup> Mòsà mulediibwe, ne pashiishe ùvwa, paanyimà, yéyè wàkafikishiibwa pa—pa mwaba wàkeediibwayè maanyi. Ne, mònaayi, dimiinu ditèèkiiibwe muntwamu ne mmwènenu wa mamanya à mu mutù, mwikàle ne diitabuuja dyònsò dìvwàyè mulediibwe naadì bwà kusùngilayè cisàmbà eci adi, kàdì nànsha nànku kadìvwakù difike ku Mwoyi to too ne pàakalwà Bukènkè abu bwà ku cipuka cìvwa cìlakuka kapyà aci kuteemenabu pòpò; too ne pàakalwàyè kumòna, kaciyi cintu kampànda cyàkabalàye to, kàdì cintu kampànda cyàkamònàye ne èndè àbidì; Cintu kampànda cyàkaakulà nendè, ne yéyè kuCyàndamuna. Kaa, mùshindù mwine wùvwa cyòcì aci cifikishe bintu ku Mwoyi’s wè!

<sup>45</sup> Ndi ngèèla meeji ne muntu mulùme kanà yònsò ewu mwikàle ne . . . anyi muntu mukàjì, mwànà wa balùme anyi wa bakàjì. Ne ndi ngèèla meeji ne, mu mmwènenu wa mamanya à mu mitù à cìdìbo badyàmbidila ne ki cìdì Dìyi, ne bikwàbò amu, kènàku

mwà kupeta diimana dyà pa cishimikidi mu kaabujimà to pàdiye kàyì mutuutàkèène ne Bukènkè abu bùdì búfikishà Dìyì adi ku cintu cyà bushùwà.

<sup>46</sup> Ngèèla meeji ne èkèleeziyà nànsha umwe mu ngenzèlù yèndè, nànsha yèyè mufwànyìne kwikala wa maalu à mu mutù ne mwitabi wa maalu mùdiwu mafùndiibwe bìshi, èkèleeziyà awu kèna mwà kutantakù to pàdì Citàmbe-mfùkilu kaciyi cimànyìshìibwe munkaci mwà cisàmbà aci, ne bàcimòna. Cintu kampànda cìdibo mwà kwakula naaCi, cìikalà mwà kubàndamuna, ciikàle cishìndika Dìyì difùnda edi.

<sup>47</sup> Mpindyewu vùlukàayi ne, Mòsà pààkatuutakeenàye ne cipuka cyà cilakuka kapyà eci, Dìyì adi dyàkashindikiibwa ànu menemene. Divwa n'Dìyì. Kabyàkakèngela bwà ne Mòsà àpampakanè to ne: “Edi Dìyì ndyà bwalu kaayi menemene? Ewu Kampànda udi apa ewu ki nganyi?” Bwalu, Nzambi ùkaavwa mumanè kufùnda mu Mifùndu, mu Genèsè, ne: “Cisàmbà cyèbè necisòmbelè mu buloba bwenyi ebu, kàdi nebàalujiibwè paanyimà pàà bidimu nkàmà yìnaayi, nebàalukile cyàkàbìdì mu dyòdì ditùnga edi, bwalu bubì bwà—bwà beena Amòlà kì mbwanjì kuula tètè to.” Mpindyewu, nkàmà ne nkàmà yà bidimu kumpàla, Nzambi ùkaavwa mwàmbe ne Izalèlèlà ùvwa mwà kusòmbela mu ditùnga dyenyi ne kukèngeshiibwamù, ne ùvwa mwà kushàalamù bidimu nkàmà yìnaayi. Kàdi Nzambi, ne cyanza cyà bukolè, ùvwa mwà kubàpatula. Pa nàнку, nudi numòna's, ne cipuka cyà cilakuka kapyà eci . . .

<sup>48</sup> Mòsà ùvwa mumanyè cyòci eci, mu mùshindù wà mamanya à mu mutù. Ne dimiinu divwà dilediibwe munda mwèndè adi, divwa dìsanganyiibwa munda mwà mwoyi wèndè. Kàdi kuteetayè, ku dilabula dyèndè dyà Dìyì ku mamanya à mu mutù, bwà kuteeta bwà—bwà kubàpatula, bwà kubàsungila, bwalu ùvwa mumanyè ne yèyè ùvwa mulediibwe bwà kiipacilà aku. Yèyè ùvwa mumanyè cyòci aci, cikondo aci. Mifùndu yònsò yìvwa yàmbe ne bòbò bàkaavwamù munda mwà bidimu nkàmà yìnaayi.

<sup>49</sup> Ànu mutùdì bamanyè mpindyewu emu, mùdì muntu munkonke kùkaadi katanci kakesè, pa bìdì bitàngilà Dilwa ne Dyambwibwa. Twètù tudi bamanyè. Tukàadi bajikije cikondo, bwà cikondo cyà Dyambwibwa cyòci cikaadi pabwìpi, kàdi tudi bindile diitabuuja dyà Dyambwibwa didì mwà kusangisha Èkèleeziyà pàmwè ne kuMupèèsha dikànda kampànda dyà ditàmbe-mfùkilu, didì mwà kushintulula mibidi yitùdì basòmbèlemù eyi. Patùdì tumòna Nzambi udi mwà kjuuula bafwè panshi anyi mu bulà mwàmwa, ne ùmwaluja cyàkàbìdì ku mwoyi ne ùmuleeja kumpàla kwètù, patùdì tumòna Nzambi udi mwà kuumusha kànsèrè kàkaadi kakunyè muntu kamushiye ànu mundidimbì kàdi kumujuula e kumuvwija muntu wa makànda ne mubidi tumatuma, aci's bìvwa bikèngela kupèèshaci bantu diitabuuja dyà dyambwibwa. Mu mùshindù

wà ne, pàateemà Bukênkè abu mu dyulu, ne pàadilà mpungi, Mubidi wà Kilistò newùsangishiibwè pàmwè ne lùkàsà lwónsò, ne mushintùlùdìibwe mu katanci kakesè ne newàngaciibwè mu Maulu. Èyowà, bìdi bikèngela bwà kwenzekaku cintu cyà mùshindù awu. Kàdi bilongelu byètù byà teòlòji kabyènakù byòbì mwà kupàtula aci to, kàdi pààbì's bìdi ànu bilenga bwà ku mamanya à mu mitù. Kàdi bìdi bikèngela bwà wèwè kutuutakeena ne Bukênkè abu! Bidi bikèngela bwà wèwè kupeta Cintu kampànda aci.

<sup>50</sup> Nènku ki Mòsà ewu, mutèèkele dibìikidiibwa dyèndè dinèna adi pa Dìyi, ne dyòdì diinè divwa dinèna, too ne pàaluye dīngà ditùkù kutuutakeena ne bwinè Bukênkè ebu, ki Dìyi dyena diinà adi kumwandamunaDì. Dìbà adi kupetayè dilaabiibwa dyèndè adi. Aci kulaabaci cìvwàye naaci mu yèyè, mu mùshindù wa ne munda mwèndè amu, cyà—cyà mamanya à mu mutù cìvwà cìcìtàbùùje aci, diitabuuja divwà ditèekela pa ngiitabiijilù wèndè wa Nzambi, wákamutàpulula ne mamwèndè awu. Nènku mpindyewu pàakafikàye mu Bwikadi bwà Bukênkè ebu, Bwàkalaaba cìvwàye mwitàbuuje aci. Nwamònu anyi? Dilaabiibwa kaayipu's wè! Ki kutumiibwayè ne mudimu.

<sup>51</sup> Mpindyewu, tudi bamanyè ne, mu mùshindù wa mamanya à mu mutù yèyè ùvwa mutèèlèje mamwèndè. Wákamanya cìvwà mwà kwenzeka, ne wákamanya ne mu ditùkù adi mmùvwàye ne mwoyi. Kàdi apa wàkajandula ne yèyè ùvwa mupangile bwalu, pa nàнку ùvwa mufwànyine kwikala ne. . . diitabuuja dyèndè divwa difwànyine kwikala dyalukile cyànyimà ndambù. Kàdi pashiishe pàakafikàye ku cipuka aci, Nzambi wákamba ne: “Ngùmvù mbilà yà cisàmbà Cyànyì, ne Ngávùluku mulayi Wànyì mwenzela baatatwàbò, Abraham, Izààkà, ne Yakòbò, nènku Mémè ndi mutùlùke.” “Mémè,” mwaba awu, mu—mupinganyi muleeji muntu, “Mémè ndi mutùlùke bwà kubàsùngila.”

<sup>52</sup> Nènku mpindyewu, nènku swâyikù bwà nsàkidile ànu eci cyanààna pìikalàbi ne cìdi. . . Nzambi àmfwileku luse pìikalàci cimweka bu cìdi cinyangakaja cijila. “Ncyèna nkwàta mudimu pa buloba to, ànu nkwàcila mu muntu. Mémè—Mémè—Mémè ndi Mwonji wà mvinyò; nwènù nudi matàmbà. Ne Mémè ndi nDimanyisha ànu pàNdi mwà kupeta muntu. Nènku Ndi mukusungùle wèwè, ne Ndi nkutùma wèwè bwà kubàpatula.” Nwamònu anyi? Mònaayi mpindyewu ne: “Mémè nèngiikalè ne mukana mwèbè, ne Ndi. . . angàntà dikombo edi.”

<sup>53</sup> Ki Mòsà kwambayè ne: “Ndiku mwà kumòna cileeji cyà ne Wèwè ngudi untùma, ne Udi mungeele maanyì, ne Wèwè ngwìkala mwà kwenza bintu ebi anyi?”

Yèyè ne: “Cyùdì naaci mu cianza ncinyi?”

Yèyè ne: “Citùpà cyà mucì.”

Yèyè ne: “Cyèlè panshì.” Kwandamukaci nyòka. Kwasayè lubilu.

54 Yèyè ne: “Cyambùlaaku.” Kwandamukaci cyàkàbìdì citùpà cyà mucì. Yèyè ne: “Tèèka cyanza cyèbè mu cyàdì.” Dyà ùcipatula anyì, cikaavwa ne nsudì. Dyà ùcipingaja, cìvwa cyondòpiibwe. Yèyè ne. . .

55 Yèyè kumòna butùmbi bwà Nzambi. Kakùcìvwa kàbìdì mpatà to, bwà Mòsà. Nukaavwaku bamòne ne, yèyè kaakanyeemena kàbìdì mu cipèèlà to anyì? Yèyè wàkamanya ne ùvwa mulaabiibwe. Wàkamanya ne mpenyi, bintu byònsò bivwà mu mwoyi wèndè ebi, ngiikàdìlù minène milenga eyi, ne yèyè. . . byàkalaabiibwa mpindyewu. Yèyè—yèyè wàshàadi mudilongolole. Ùkaadi mudilongòlòle bwà kuya. Kì yèyè wàwa ùpweka mutàngìle ku Ejiipitù.

56 Nzambi ùkaavwa mwambe ne: “Mémè nêngìikalè neebè,” pa nàнку aci—aci’s cìdì cikòsa bwalu. Pìikalàbi ne: “Mémè nêngìikalè neebè,” kì cyònsò cìvwa Mòsà ne cyà kumanya. Bwà dìbìikidiibwa dinène edì mu mwoyi wèndè, nènku mpindyewu Nzambi kwamba Yè ne: “Mémè nêngìikalè neebè.”

57 Mpindyewu, Nzambi ùkaavwa kàbìdì mushìndìke èndè. . . mèyì à Mòsà. Dìyì dyà Mòsà adi dyà ne: “Ndi mutuutàkèene ne Mukalenge. Ne Yèyè mmwambe bwà nnwàmbilè ne: ‘NDI’ mmuntùme.” Nwamònu anyì?

58 Mpindyewu bòbò bàvwa bàmba ne: “Kì muntu nyèyè ewu, mukwàbò mwena Yuda, pàmwàpa umwe wa ku bakolessi bàà maalu bàtù bàlwa dìbà dyònsò abu ne diyelè dyà mìshindù yònsò bwà kutùpàtula twètù aba mu bupika.” Ne nutu bamanyè ànu mùtù bantu amu pàdìbo bapika, anyì mu bupika bwà cintu kampànda, kùdì kùlwa misangu yònsò mwaba awu ànu dijimbu dyà mùshindù kampànda, nudi bamanyè’s, bwà kucyènza.

59 Pa nàнку Mòsà, Nzambi kulayaYe Mòsà ne: “Mémè nêngìikalè neebè. Mémè nêngìikalè munda mwèbè. Mèyì Àanyi neikalè Mèyì èbè. Wèwè udi wamba Mèyì Àanyi ne wamba ànu cìndì Mémè ngàmba aci.”

60 Nènku mpindyewu pààkapwekà Mòsà ne kubàpèeshayè dìbìikila edì, ne kwimanayè kumpàla kwà Pàlò, ne kumwambilayè ne: “Mukalenge Nzambi wa beena Ebèlù mmwàmbe ne: ‘Pàtulà bânà abu,’” ne yèyè kàyikù muswè kubàlekela bàya to, kì yèyè—yèyè kwenza cimanyinu kampànda kumpàla kwà bakùlù ne kumpàla kwà Pàlò. Ne bimanyinu bivwà Nzambi mwènzè abi: Kwambayè ne: “Mpindyewu, mààlabà, patwamba kufika pa dìbà edì, dìbà nedìbwelè, nekwikalè mîdimà mu Ejiipitù mujimà,” ne byàkenzeka ànu menemene. Kì pashìshe kwambayè ne: “Nekùlwe—nekùlwe njiji mu—mu ditùnga,” nènku kwololayè dikombo dyèndè adi ne kubìikilayè njiji, ne njiji kulwayì. Kì kwambayè cipròfetà, ne byònsò bivwàye wàmba mu cipròfetà bivwa byènzeka ànu menemene mùshindù awu. Ùvwa n’Nzambi. Nwamònu anyì?

61 Nzambi ùvwa mumubiikile kacya ku dilediibwa dyèndè, mutèèke ngiikàdilù ayi munda mwèndè, yà diitabuuja dinène ayi, ne pashiishe kutùuluka Yè ne Bwikadi Bwèndè ne kulaaba Yè cintu cinène cìvwa munda mwèndè aci, ne kumutùma Yè ne Dìyì Dyèndè, ne yèyè ùvwa menemene mushindikiibwe mu bìvwàye wàmba. Nànsha byòbì ne kwàkajuuka bàà mafi bùngì munyì, nànsha ne kwàkenzeka bikwàbò bintu ebi bùngì munyì, Nzambi ùvwa wàkwila ku . . . Mòsà wàkashindikiibwa. Mòsà, cìvwa Mòsà wàmba aci, Nzambi ùvwa ùcìtwa mushinga. Mèmè ndi muswè bwà ne kanùpukù Dìyì adi mwoyi to. Cìvwa Mòsà wàmba aci, Nzambi ùvwa ùcìtwa mushinga, bwalu Dìyì dyà Nzambi ùvwa munda mwà Mòsà. “Nèngiikalè ne mukana mwèbè; nemwàmbè bintu ànu mu byòbì.” Mpindyewu, cidi Nzambi wàmba aci—cidi Nzambi wàmba aci, Yèyè ùdi ùcyàmbidila kùdi Mòsà, ne cìvwa cijaadika ne cishindika mèyì èndè awu.

62 Kàbidì, bàakamulondela kùdi mamwèndè, bwà dilediibwa dyèndè ùvwa kadiyì dyùmvwika adi, ne mùkaavwà cikondo ciseemène pabwìpì ne díbà ùvwa ku ne cyà kwenzeka disungidiibwa. Amram ne—ne Yokèbèdà, mwànà wa balùme ne wa bakàjì wa Lewi, bàakabanga kulòmba Nzambi bwà kutùma Yè musungidyanganyi. Kàdi bìvwa bikèngela . . . paùdì umòna ne cikondo cyà mulayì cikaadi cyènda ciseemena, bwalu abu bùdi búsàka bantu ku disambila ne dipeta nzala. Ne kakwena mpatà to ne—ne Yokèbèdà, mamwèndè awu, ùkaavwa mumwambè misangu ne misangu; bu mùvwàbi kàbidì ne, yèyè nguvwa ndeeji wèndè, bu mutùdì bamanyè bwalu-bulonda abu. Ne yèyè ùvwa mumulondèle mùvwàye musambile. “Nènu, wèwè Mòsà, pawàkalediibwà, mwanànyì wa balùme, uvwa mwànà wa pabwèbè. Uvwa wèwè mushiilàngane. Kwakenzeka cintu kampànda ku dilediibwa dyèbè.”

63 Mvwa mufile dinàya kampànda bwà bânà pa bwalu abu, ànu àbìdì àdì panshì aa, mèmè kwamba ne: “Pàvwa Amram mu cibambalu munkaci mwà kusambila, wàkamòna Mwanjèlò ùtùla mwele Wèndè ne ùwùfunkuna lwà ku Nord, wàmba ne: “Neùpetè mwànà, ne yèyè ngwàya ne bânà ku Nord ku buloba bulaya.”” Mwikàle mfilà dinàya bwà bânà bakesè bwà bààmòna mwà kucyùmvwa; bwalu àbò meeji à mu mutù kí mmanji kubànda pa mwaba wùdì ènù nwènù bakùlumpè to, bwà kumònabò mwà kuumvwa maalu mùdì Nyumà Mwimpè ùnùbuulwilawù nwènù amu.

64 Mpindyewu, nànsha mùvwàbi ne mamwèndè ùkaavwa mumanè kumwambila maalu aa, ne yèyè mumanyè cyòci eci, kàdi nànsha nànkù bìvwakù ànu bìmukèngela dimulenga dikwàbò. Dilongesha adi—adi ùvwa ànu dimpè, kàdi bìvwa bìmukèngela dipetangana dyà yèyè nkààyèndè.

65 Ki cidi cikèngelà bwà bàà pa buloba leelù ewu aci. Ki cidi cikèngelà bwà èkèleeziyà leelù ewu. Ki cidi cikèngelà bwà bantu bònsò, bàdì bânà bàà balùme ne bàà bakàjì bàà Nzambi.

Bwà kwikala cyôci aci, bìdi bikukèngela dipetangana dyà wêwè nkààyebe, nwamònu's, Cintu kampànda. Nànsha byôbi ne, udi mumanyè ne Dìyì ndilelèlè, mumanye ne nDyà cyà bushùwà; kàdi dîbà adi pàdîci cilenga, ne pashiishe wêwè umòna cintu aci cyenzèke, dîbà adi udi umanya ne udi mu njila mujaalàme. Nwamònu anyi? Nènku, tàngilàayi, neciikale misangu yònsò ànu cyà mu Mifundu. Necikumbànanganè ànu menemene ne Mifundu, bwalu eci cyàkakumbànangana.

<sup>66</sup> Disambila dyà Amram òvwa dikumbànanganè menemene ànu ne Mifundu. Masambila ààbò àvwa makumbànanganè ne Dìyì dilaya. Nzambi òvwa mulayè bwà kucyènta mu cikondo ciinè aci. Kucisambidilabo, kàdi ki mwànà wa pabwèndè udi muledibwa ewu. Nènku bóbò . . .

<sup>67</sup> Tàngilàayi! Kaa, mùshindù mwinè wùndi munange eci's wè! Nwamònu's, mu dîbà òvwa Pàlò ùshebeyangana ne bânà bònsò, nwamònu's, ùbàpîcishila ku—ku mwele wà mvità, mwele wà mvità wà balami bàà nzùbu; bàvwa—bàvwa—bàvwa bawucimpika bânà bakesè aba bàbàshebeya, babèèlela ngandù yibàdya, tuumibidi tukesè atu, mu mùshindù wà ne ngandù ayi yàkadyundila pàmwàpa ku didyà dyà mibidi yà bânà bàà beena Ebèlù abu ayi. Kàdi Bible mmwambe, ne: “Baledi abu kabàakaciina dìyì ditùma dyà Pàlò bwà kushebeya bânà to.” To. Kabàakapeta bôwà to, bwalu bàakamòna cintu kampànda mu mwànà ewu, twamb'eku twamb'eku. Bàakacimòna, ne eci ki cìvwà dyandamuna ku disambila.

<sup>68</sup> Nènku Mòsà òvwa ne biinè byònsò ebi bu nshindameenu kampànda, pa nànkù Mòsà wàkamanya ne òvwa mutùmùbwe bwà kiipàcilà mene kàà kusungila bânà bàà Izalèlèlè.

<sup>69</sup> Nwamònu's, nshindameenu yònsò awu kàdi kuungwilaye ànu mushiki's. Paùdi upeta cintu kampànda, mwikàle mwà kusangana Bible wàmba, ne: “*Cikampànda* neciikale mwà kwenzeka,” kàdi ki cyôci eci cyènzeka; “ne *cikansanga* neciikalèku mu cikondo aci,” ki cyôci eci cyènzeka; “ne *cikankènga* neciikalèku mu cikondo cisungùlùke cyàcya,” ki cyôci aci cyènzeka; pashiishe byònsò byungwila mushiki ne bitùzòlela cimfwànyi kampànda.

<sup>70</sup> Kaa, mùshindù mwinè wùdi tabernacle ewu mu dindà emu, mùshindù mwinè wutùdi twètù bantu bàà dîbà edi aba, Mwanèètù Neville, patùdi tumòna mvyà yènda yitòloka mu nsuki yètù, ne makaaya ètù ènda àkòbama, patùdi tumòna buloba bwènda bwènta kanjìngambààlè ne bùtànkakana mùdìbu bwènta emu, ne mutùdi mwà kukènzakana eku ne eku biikàle tumòna mulayi wènda wùseemena! Cidi, cyôci. . . Ntu ndyàmbedila, misangu yàbùngì ne, bu muntu mwà kutùpika kubwelaMù ànu dyàkàmwè, ne kàyì mufwànyine kuCyùmvwà to, anyi mufwànyine kuCyùmvwà's wè, èyowà, ne kubwelaMù dyàkàmwè, s'ncifwànyine kwamba kukutùma



mu Cyendèlèlè, ànu ne cintu kampànda cyà mùshindù awu cyà cikutùma mu dyambwibwa! Ne muntu yéyè kàyikù mudyanjile kucimanya to, kàdi ànu, kaa, kubwela ànu cyanààna mu bintu bitùdi bamòne ne bamanyè ne bùmvwè ebi, kàdi kubwelamu ànu dyàkàmwè. Mulùme, anyi mukàji, nsongàalùmè, anyi nsongàakàji, mmufwànyine pàmwàpa ànu kwela byanza byèndè muulu cyanààna kàdi kwamba ne: “Tùyaaku, Mukalenge Yesù,” nudi nymòna’s. Kaa, mùshindù mwinè wùkaadi dībà ditàmbe kusemena’s wè!

<sup>71</sup> Mòsà mumanyè ne yéyè ùvwa mulediibwe bwà kiipàcilà aku, ki kutàngidilayè pa màdidiishi ne kubandilaye mùvwà beena Ebèlù abu bàyooba; wàluja dísù mu Mifùndu emu, bàmbe ne: “Ne bôbò nebàsòmbelèmu munda mwà bidimu nkàmà yinaayi,” nwamònu’s, “kàdi Mèmè nèmbàpàtùlè ne cyanza cyà bukolè.” Pashiishe pàdiye wàlukila, paanyimà pàà mudimu mumutùma naawù, mwela maanyì, mumanyè ne yéyè ùvwa mulediibwe. . . Nènku diitabuujà dyèndè kutàngiladi, ku diitabuujà yéyè kumòna bantu abu ne kumanyayè ne bàvwa bàna bàà Nzambì, bwalu buloba. . . Dìyi di—divwa dyàmbe nànkù. Bôbò kabàvwa bàà pa buloba to, ne kabàvwa bu bakwàbò bônso abu to. Bàvwa bashiilàngàne. Ne bàvwa bantu bàà meeji makònyàngàle ne bakoleshi bàà maalu, bwà—bwà dibàlakana ditùmbùke dyà Ejiipitù adi; kàdi yéyè nyèwù ùvwa ne cyà kwikala mwànà wa balùme wa Pàlò, mwikàle ne cyà kwangata bukalenge abu, paanyimà pendè. Kàdi, yéyè, kùvwa cintu kampànda munda mwèndè amu, diitabuujà dyà—dyà cyà bushùwà divwà dyòdi kadiyi ditàngila ku biinè bintu abi to, dibàlakana diinè divwàye mwà kupyàna adi. Yéyè wàkatàngila ku mulari wà Nzambì, ne wàkamanya ne cikondo cikaavwa cyènda ciseemena. Nènku ciinè civwà muntu awu ne cyà kwikala mwelele meeji’s wè!

<sup>72</sup> Ndi muswè bwà ngàkulanganakù nendè pa bwalu abu, dīngà ditùkù, pàngàatwilanganà nendè dyàmwàmwa. Wèwè udi wamba ne: “S’mmukupa’s, mwanèètù!” To, kí ngwòwò to. Nèngiikalè mwà kutwilàngàna nendè, ku ngàsà wa Nzambì. Èyowà’s, mukalenge. Nènyiikilè nendè, dīngà ditùkù, Mòsà yéyè mwinè. Ne mùshindù mwinè wùndi njingakù kumwela nkonko’s, ànu mùshindù mwinè ùvwabi, pààkamònàye didilongolola dyèndè adi!

<sup>73</sup> Mùshindù mwinè wà dilubakana adi, dyabùlù mwikàle wàmba ne: “Ha, bantu kabààkukwitabuujaku to. Huh-uh. Kakwènakù—kakwènakù bwà nsongo ku ciine aci to.”

<sup>74</sup> Kàdi dimiinu adi pààkalwàdi ku Mwoyi kuntwaku, cintu kampànda cyàkamulenga, ne wàkamanya ne kùvwa cintu kampànda civwa ne cyà kwenzeka. Yéyè wàkamanya. Wàkatàngila ku—ku ntànkù ne wàkamòna ne cikaavwa dībà kaayi, nènku kumanyayè, ne mùshindù mwinè wùvwàye ne cyà kwikala mwelèngàne meeji pààkatàngilayè apu’s. Mpindyewu pààkacitwàngajàye cyònsò eci, cintu cyònsò

cinène cyàkamònàye eci; cikondo cyà Mifùndu, disambila dyà mamwëndè ne tatwëndè, ne mùvwàye mulediibwe dilediibwa dyà pabwàdì, mwànà wa pabwëndè. Nènku, dibà dyònsò adi, kùvwà ànu cintu kampànda munda mwëndè amu.

<sup>75</sup> Nènku mpindyewu yéyè kudifinda kuya ne kuteeta kwela meeji ne ùvwakù mufwànyine kwangata dilonga dyèndè dyà búsàlaayi dyà ku túlaasà twèndè adi, bwà kusungìlayè bânà abu, kàdi aci kupangilaci.

<sup>76</sup> Pashiishe kuyayè mu cipèèlà ne kuyayè kasèla nsongàakàjì kampànda mulenga kwísù wa—wa beena Etyòpyà, nènku kulelabò mwànà mukesè wa balùme dìnà dyèndè Ngeelèshòmà.

<sup>77</sup> Kàdi dínghà ditùkù pàvwàye ùlama cisùmbù cyà mìkòòkò, dyàkàmwè kumònayè kaacipuka kàlàkuka kapyà pa lusongo lwà mukùnà, munkaci mwà kulàkuka kapyà. Ki kubàndayè kuntwaku. Nènku kaciyi meeji à mu mutù to, kaciyi didifwanyikijila kampànda—kampànda to, kaciyi cintu cyà mafi, lumònò lwà ne mèsù bitaayitaayi to, kàdi munda mwèndè. . . Ki Nzambi wa Abraham n'Yèyè awu, mu Bukènkè kampànda, Dikunji dyà Kapyà mu kaacipuka mwàmwa, Kapyà aku, byenze bu mavwala munkaci mwà kupàtuka, kàdi kakàyi kàtácishakù kaacipuka aku to. Ki Dìyi dyà mu Mifùndu adi, Dìyi dyà Nzambi, kwakwilaDì mwòmò amu, dyàmba ne: “Ndi mukusungùle wèwè. Wèwè ki muntu mwinè awu udi ukèngela. Ndi mukujuule mbwà kiipàcilà aka. Ndi nkujaadikila kaaba aka, ku bimanyinu ne, uyààya kasungila bânà bwalu bidi bikèngela bwà Dìyi Dyànyì dyùlè.”

<sup>78</sup> Kaa, bikèngela bwà Dìyi Dyèndè dyà ditùkù edi dyùlè. Tudi ne mwoyi mu dibà adi. Cìdi ní nganyì ní nganyì mukwàbò wàmba nànsha ciikàle cinyi, bidi bikèngela bwà Dìyi dyùlè. Maulu ne buloba nebìjiminè, kàdi bwà Dìyi Dyèndè to.

<sup>79</sup> Mpindyewu, pàakatwàngajà Mòsà byònsò ebi, ne mumòne ku luseke ne luseke lwònsò, kulaabaci diitabuuja dyèndè maanyì. Amen! Kaa, ekèlekèle! Meeji kaayi's wè! Eci, nkààyaaci, cyòci nkààyaaci cimòne Mufùndu wùfunkuna buludi ku cìvwàci, ne dyakula dyà Nzambi, ne cileeji cyàci mwab'awu, cyàkalaaba maanyì ku cìvwàye naaci bu diitabuuja munda mwèndè aci, bwà kuya kaditwayè mu mudimu.

<sup>80</sup> Ncinyi cìvwàci cìfwànyine kutwènzela twètù aba? Bidi bitùkèngela kanyinganyinga. Bidi bitùkèngela ditabuluja. Ndi ngàmba bwànyì mèmè mwinè. Nwamònu anyi? Bidi bìnkèngela dinyukushiibwa. Bidi bìnkèngela cintu kampànda. Ngàmbi ne mvwà munkaci mwà kudyàmabila mèmè mwinè mu dindà emu, anyì kwamba bwànyì mèmè. Mèmè—mèmè—mèmè bidi bìnkèngela di—ditabuluja kampànda.

<sup>81</sup> Nènku pàndì ngèèla meeji ku cileeji cinène aci, bintu byònsò byadija kwàka mu mùshindù mupwàngàne, nènku ki kulaabaci

diitabuuja dyà Mòsà maanyi's. Nènku, ekèlekèle, kumònyè ne kakùvwakù cintu nànsha cimwè. . .

<sup>82</sup> Ki yêyè ewu, kunyeemayè mu Ejiipitù, pààbì, mu bushùwà bwà bwalu, yêyè nùnkù's mmubange bu—buntòmbòji anyi cintu kampànda, ne ùvwa mwà kwikala—ùvwa mwà kwikala mukùtùle mvità yà dishintuluka mu Ejiipitù amu, ne mufwànyine kwikala mwangàte cilwilu kampànda ne mukùtùle mvità, kàdi, nudi numòna's, wa bwalu ùvwa ne binunu byàbùngì bitwè ku cyèndè. Kàdi pamutù pàà cyòci aci, kucìinaye mene ne bwà kwenza aci, pèndè ne bilwilu bitwè ku cyèndè.

<sup>83</sup> Kàdi mpindyewu ki yêyè udi walukila ewu, paanyimà pàà bidimu makumi ànaayi, ùkaadi ne bidimu makumi mwandamukùlù, mwikàle ànu ne citùpà cyà mucì mu cyanza. Bwà cinyi? Cìvwà cilàkuka kapyà munda mwà mwoyi wèndè aci cyàkalwà cintu cyà bushùwà. Dìbà adi yêyè wàkeediibwa maanyi, ne wàkamanya ne ùvwa ne EMU MMÙDÌ MUKALENGE WÀMBA. Bwà mpindyewu kakùvwakù cintu nànsha cimwè cìvwà mwà kumwimanyika to. Kabìvwa bìmukèngela cilwilu nànsha cimwè to. Nzambì ùvwa nendè. Ki cyònsò cìvwà cìmukèngela ncyòci aci: Nzambì mwikàle nendè.

<sup>84</sup> Kaa, paùdi mumanyè ne Nzambì mmùkutùme bwà kwenza cintu kampànda, ne wêwè ucimòna munkaci mwà kukwàta mudimu mwaba awu, kakwènakù—kakwènakù cintu nànsha cimwè cidì mwà kwangata kaaba kàaci to. Kwàjiki.

<sup>85</sup> Ndi mvùluka misangu yìvwà Mukalenge ùngambila bwà bintu kampànda bìvwà mwà kwenzeka, ne pashìishe nya nkabisangana bitèeka mwab'awu, mùshindù...Kaa, njiyà kaayi's wè! Maalu àkaadi mu bukòntononyi, kwàjiki, nwamònu's, bwalu Nzambì ngudi mwambe nànkù.

<sup>86</sup> Ndi muvùlùke, bààbùngì bàà kunùdi mbavùlùke, bwalu bwà mwànà mukesè wa balùme uvwa mubiishìibwe ku lufù mu Finlande awu, ne dìbà adi mubiike ku bafwè, mushipa kùdi màshinyi. Nènku mvwa mwimanè mwab'awu kumpenga kwà cibeeba, ne kubanga kuumuka mwaba wùvwà mwànà awu ùsanganyiiibwa, ne mèmè kukùdimuka ne kutàngila paanyimà. Kì Cintu kampànda kuntèeka Cì cyanza pa dikaaya, kàdi mèmè kwela meejì ne ùvwa m'Mwanèètù Moore, muntu nànsha umwe kàyì pabwìpì naanyi apu to. Kì mèmè kutàngila paanyimà, ne pashìishe kutàngila kuulu kwà mukùnà wùmvwà mumòne awu. Mèmè kwamba ne: "Èè, s'nkààdikù mumòne kakùnà kàka mu mwaba kampànda's, kàdi twètù katwènakù bavwile njila ewu to. Tuvwa bavwile njila mukwàbò. Kakùnà kàka kàdi penyì?"

<sup>87</sup> Kì mèmè kutàngila ne kumòna kàshinyi aku mwaba awu, kenze njiwu; kumòna mwànà mukesè wa balùme awu mwaba awu mwikàle ne ntanyi wèndè. . .mulààdika mwaba awu ne—ne nsukì myenze bu mikòsa cisuba, mutùdi bafwànyine kucibìikila muneemu. Mèsù àvwa mapilùlùke mayè paanyimà, mùvwà

à Mwanèètù Way ditùkù adi pàvwàye mudishinde apu. Ne kakàsà kakesè aku katùbùle lushèsheetè kapàtùke, mwaba úvwà tukòlò twèndè tokesè atu tucibùkile. Ne mashi bimupatukila mu mèsù, ne mu dyúlù, ne mu macì. Ne mèmè kumòna kàpanù kèndè kakesè, kàà kípì aku; ne kakwàcisha ne mbota, kèndè, *apa* ne ku luseke lwà kafùkà kèndè kakesè aku; ne tunshesheete twèndè tokesè twà tufikilè ne mu cifùkà atu tubànde, byenze bu nshèsheetè ya mile yitùvwà tuvwàla kùkaadi bidimu byàbùngì ayi.

<sup>88</sup> Ki mèmè kukènzakana, nènku mbyàbì bìvwa menemene, ànu menemene mùshindù wùvwà Nyumà Mwîmpè mungambile bidimu bibìdì kumpàla awu, panwàkacifundà nwènú bònsò mu Bible yènú mu ditùnga dijimà, bwà ne cìvwa mwà kwenzeka apu. Kaa, mwab'awu, díbà adi, maalù àdi mu cyanza. Nànsha byòbì ne yèyè mmufwè mùshindù kaayi, cìdì ní nganyì ní nganyì mukwàbò wàmba nànsha ciikàle cinyì, bwalu mbumanè kutùuka. Bùdìye naabu mbwà kwalukila!

<sup>89</sup> Mèmè kwamba ne: “Mwànà ewu yèyè kàyì mubiike ku lufù elu to, díbà adi mèmè ndi mupròfetà wa mashimi, ndi muleeji wa mpàla wa mashimi wa Nzambì. Bwalu, mèmè kwètù, kùkaadi bidimu bibìdì, Yèyè úvwà mungambile ne cyòcì eci cìvwa mwà kwenzeka. Ne mwab'awu bambi aba, ne bònsò, ncifundìibwe pa dibèjì dyà munda mutupù dyà Bible wetù, s'ki cyòcì eci ànu menemene. Nùcibalàayi pa dibèjì dyà munda mutupù dyà mukàndà apu, mùvwàbì mwà 'kwikala mu ditùnga kampànda, citùpà kampànda cyà buloba mwikàle mbwebwe myenze cyàtà, ne bikwàbò, mushipìibwa, ne pa...mwikàle ku luseke lwà dyàbalùme dyà cibeeba.” Mèmè kwamba ne: “S'ki cyòcì aci. Cintu nànsha cimwè kacyèna mwà kucipangishakù to. Maalu àkaadi mu bukòntononyi.”

<sup>90</sup> Diitabuuja divwà mu mwoyi wànyì dyàkalaabiibwa. Kaa, bu mèmè nànsha mwà kuumvwija cyòcì aci's wè! Diitabuuja divwà Nzambì...dìmvwà naadi mu Nzambì adi, divwà dingambile, ne kacya kadiyikù dipangile adi, kungambiladi ne: “Maalu adi mu bukòntononyi mpindyewu. S'ki cyòcì eci menemene cimvwà mukuleeje kùkaadi bidimu bibìdì, s'ki cyòcì eci citèèkiibwe ànu menemene mu bulongame. Cintu cimwèpelè cìdì cikèngela bwà wèwè kwenza nkwamba dìyì.” Nènku ki mwànà mukesè wa balùme awu kubìikayè ku bafwè. Nwamònu anyì?

<sup>91</sup> Mvwa munkacì mwà kwela meeji, ne ntangija mèsù paanyimà kùdì Mwanèètù Fred Sothmann udi musòmbe pàapa wàwa, ne Mwanèètù Banks Wood ne bakwàbò. Ditùkù dikwàbò, mwàmwa mu—mu Cibeeba cyà Alaska, mùshindù mwinè wùngààkiimanà kaaba aka mu èkèleeziyà emu ne kunùlondela nwènú bònsò bwà nyama kampànda uvwa ne mmwènekèlu wa nsèngu ya kashà, ya bule bwà byàlà makumi anaayi ne bibìdì, ne ours munène wa lwonji mufiikulùke wa cisengàsengà. Kacya ncìvwakù mwanjì kufika kuntwaku kumpàla to, kàdi mùshindù

mwinè wùvwà . . . wùmvwà mwà kupeta yèyè ewu, ne mùvwàye mwà kwikala, ne búngì bwà bantu bàvwà mwà kwikala naanyi, ne bilàmbà bìvwàbo mwà kwikala bavwàle. Nudi bacimanyè, yònsò wa kunùdì, mbingu ne mbingu kumpàla kwà kwenzekaci.

<sup>92</sup> Nènku mwaba awu pàngàakabwelàmu, ncìyì mucimanyè to, ki nyama ewu mudyadije mwaba awu. Ki mèmè kuya, nènku—nènku yèyè . . . civwa ncintu cyà kaciyyikù mwà kwenzeka to. Bu cilembi kampànda mwà kumanya, anyi bu yèyè mwà kuteeleja mukàbà wa mèyì ewu, mùdì kùyikù mwà kuseemena kumpàla kwà nyama kampànda, yèyè mufwànyìne kujuuka e kudiyela lubilu. Kàdì yèyè kàakajuukakù to.

<sup>93</sup> Nènku's ki yèyè awu mukùdika mu cibambalu cyànyì cyà mudimu mwàmwa. Ki ours munène wa lwonji wa cisengàsengà mukùdika, ànu menemene mùshindù wùvwàbi. Ne—ne kaludiki katèèkapù, ne mètre wa dipima nendè, bwà kuleeja bule bwèndè menemene. Ne lusèngu pààlù lùtu lùfwatalala ne centimètres yitaanu anyi bipite apu, kuumukila pàcidìlu lubishi pambidi pàà nyama too ne pàdìlu lùùma, kàdì elu lwòlò kalwàkafwatalalakù to. Lùcìdì lwòlò ànu menemene ne byàlà makumi anaayi ne bìbìdì mwàlù ne kale. Nwamònu anyi? Ki ours munène wa lwonji wa cisengàsengà udi mulààle wàwa, udi bule bwà mètres àbìdì, ànu mu byòbì menemene, ne byònsò ànu menemene mùshindù wùvwàbi, mmitèèka mwaba awu patùdì twakulangana apa.

<sup>94</sup> Kàdì muntu ewu pààkangambilàye ne: “Mpindyewu, tàngila, Mwanèètù Branham, nyèwù tudi ne nyama ewu úvwà mwambe, kàdì wèwè's uvwa mungambile ne uvwa mwà kukwàta ours munène wa lwonji wa cisengàsengà awu kumpàla kwà wèwè kufika kwìnshì kwà kakùnà, mwaba wùdì nsongààlùmè yàya wàwa, udi ne mutèèlu wà màyì à matàmbà wàwa.”

<sup>95</sup> Mèmè kwamba ne: “Cìdì ng'EMU MMÙDÌ MUKALENGE WÀMBA. Ki mùdì Nzambì mwàmbe.”

<sup>96</sup> “Kàdì, Mwanèètù Branham,” mwàkambàye, “mèmè's ndi mwà kumòna pabwìpì ne bintu byònsò kaaba aka, too ne mu ntàntà wa maakilòmèètà, kamwèna cintu nànsha cìmwè to. Yèyè awu neafùminè penyi?”

<sup>97</sup> Mèmè kwamba ne: “Abu kì mbwalu bwànyì mèmè bwà kwela mpatà to. Nzambì ngudi mwambe nànkù! Ne Yèyè ùdì Yèhowàh-Yilè. Yèyè's ùdì mwà kutwàla ours mwaba wàwa. Yèyè mmufwànyìne kumutèèka mwaba wàwa.” Ki Pèndè ùmba umuteeka's. Nènku's ki yèyè awu. Mmaalù mu bukòntononyi.

<sup>98</sup> Nènku pààkamònà Mòsà ne yèyè wàkajuudiibwa bwà kiipàcìlà aku, ne yèyè wàkatwilangana cimònààmèèsù, ne Nzambì munène ewu Uvwa mwenzè dibìikila adi, ne mumwele maanyì ne mumumanyìshe awu, ne mwambe ne: “Edi ki dibìikidiibwa dyèbè, wèwè Mòsà. Ndi nkutùma wèwè, ne Nèngiikalè mwà kukuleeja butùmbì Bwànyì. Nènku's ki Mèmè ewu, mu cipuka, ciikàle cìlàkuka kapyà. Nda kuntwaku! Mèmè

Nèngiikalè neebè.” Kabivwa mene bikèngela bwà kwikalayè ne citùpà cyà mucì to. Yéyè uvwa ne Dìyì, Dìyì dishindika, nènku’s ki yéyè uyààya wàwa. Kulaabaci diitabuuja dívwa munda mwèndè adi maanyì.

<sup>99</sup> Ne cìdi citulaaba twètù patùdi tumòna ne tudi ne mwoyi mu matùkù à ndekeelu, bwà kujandula ne bimanyinu byònsò bitùdi tumòna byènzeka ebi, bìdi byambiibwe mu Mifundu ebi, bivwa ne cyà kwenzeka mu matùkù à ndekeelu; kuumukila ànu mu Dyulu, too ne ku makolè à cidiidi, ne ngiikadilù wa bantu, ne dinyangakaja dyà nsòmbelu dyà bàà pa buloba, ne munkaci mwà bantu bakàjì, ne mùvwàbo mwà kwenza mu matùkù à ndekeelu, ne mùvwà bantu balùme mwà kwenza, ne mùvwà maèkèleeziyà mwà kwenza, mùvwà matunga mwà kwenza, ne mùvwà Nzambì mwà kwenza. Ne tudi tubimòna byònsò byadija kaaba aka kumpàla kwètù mene.

<sup>100</sup> Kaa, s’cidi cilaaba maanyì ku diitabuuja dyètù. Cìdi citùtuntumuna mu bijèngù binène. Nwamònu anyi? Cìdi—cìdi—cìdi citùtùpulula ne bikwàbò bintu byà pa buloba. Nwamònu anyi? Nànsha twètù biikàlè bakesè bàà mùshindù kaayi, anyi nànsha twètù banyààbanyà mùshindù kaayi, nànsha bàtùseka mùshindù kaayi, bàtwèlulwila, kabyèna bishintulula cintu nànsha cikesè to. Kwajiki. Twètù tudi tucimòna. Kùdi cintu kampànda munda mwètù. Tuvwa badyànjila-kulongolola bwà kumòna dîbà edi, ne kakwèna cintu nànsha cimwè cìikalà mwà kutùpangisha bwà kucimòna to. Amen! S’ki Nzambì udi mucyàmbè ewu. Cikaadi—cikaadi cimanè kwenzeka. Twètù tudi tucimòna. Kaa, mùshindù mwinè wutùdi twela Nzambì twasàkidila bwà ciinè eci’s wè! Kaa, dîbà adi, cìdi cìpàtwila diitabuuja dyèbè pambèlu patùdi tumòna bintu ebi byènzeka kaaba aka.

<sup>101</sup> Mpindyewu, s’ki twètù aba tucibala cyàkàbìdi ne: “Mòsà wàkabala bundù bwà Kilistò bu mabanji manène kutàmba bintu byà mushinga byà Ejiipitù.” Mpindyewu, yéyè wàkabala bundù bwà—bwà Kilistò.

<sup>102</sup> Mpindyewu vùlukàayi ne, “bundù bwà Kilistò.” Nwamònu’s, kùtu bundù mu dikwàcila dyà Kilistò mudimu. Wèwè mwikàle mutàmbe kunangiibwa kùdi bàà pa buloba, dîbà adi kwèna mwà kukwàta mudimu, kwèna mu dikwàcila dyà Kilistò mudimu to. To, kwèna mwà kucyènza to. Bwalu, nudi numòna’s, kùdi bundù bùdi bulamateKù. Bàà pa buloba bàtu misangu yònsò ànu bèèlulwila.

<sup>103</sup> Kalekale wàwa, kùkaadi binunu byà bidimu, kùvwa bundù bùvwà bulamateKù. Nènku Mòsà uvwa ne cyà kwikala pâlò, yéyè nguvwa pâlò uvwa ulonda, mwànà wa balùme wa Pâlò. Ne yéyè nguvwa ushàala pâlò uvwa ulonda, mwikàle ne dyanyishiibwa munkaci mwà bantu, kàdi nànsha nànku “yéyè wàkatàngila . . .” *Kubala* mbwena kwamba ne—ne “kutàngila.” “Yéyè wàkatàngila

bundù bwà Kilistò bu bintu binène kutàmba byònsò bivwà Ejiipitù mwà kumupèèsha abi.” Ejiipitù ùvwa mu byanza byèndè. Kàdi, nànsha nàнку, yèyè ùvwa mumanyè ne kulonda njila wa Kilistò kùvwa mbundù, kàdi ùvwa ne disànka dǐngì dyà kumanya ne kùvwa cintu kampànda munda mwèndè amu, civwà cimufikishe ku ditàngila diseemena dyà Kilistò edi, bundù bwà Kilistò’s wè, èyowà, bu bunène kutàmba dibàlakana dyònsò divwàye yèyè—yèyè mupyàne adi. Yèyè ùvwa ne bumpyànyì munda mwèndè bùvwa bunène kutàmba kule ne kule civwà bumpyànyì bwà pambèlu bumupèèshe aci.

<sup>104</sup> Kaa, twètù aba twìkalapù mùshindù awu leelù ewu, biikàle tulekelaku Nyumà Mwimpè ùlaaba maanyì ku citùdi naaci munda mwètù aci’s we, diitabuuja adi, bwà nsòmbelu wa difwànà dyà Nzambi, mulàmbula kùdi Kilistò!

<sup>105</sup> Mpindyewu, ne diitabuuja dyà bwena divwàye naadi yèyè edi, yèyè wàkamòna, ne wàkatàngila bundù abu bu ne nduumù.

<sup>106</sup> Leelù ewu, muntu kampànda udi mwà kwamba ne: “É, wèwè ewu udi umwe wa ku bantu bàba anyì, bàba nàka?”

“Uh, uh, èè, uh.” Wèwè’s udi ànu ne bundù bwàcì ndambù.

<sup>107</sup> Kàdi yèyè wàkacitàngila bu bubanji bunène kutàmba buloba bujimà, bwalu kùvwa cintu kampànda munda mwèndè civwàye mufwànyine kwakula ne díyì dikolè kwamba ne: “Éyowà, mèmè—mèmè ndi ntàngila *eci*. *Eci* ncidi cipèèbwe lumù lutàmbidile. Mèmè ndi ne disànka dyà kwikala umwe wabò.” Nwamònu anyì? “Ndi ne disànka dyà kudibala mèmè mwìnè bu mwena Ebèlù ne ncìyì mwena Ejiipitu to.”

<sup>108</sup> Bivwa bikèngela bwà beena Kilistò leelù ewu kwikalabò bàmba cintu cimwècimwè aci. “Ndi ne disànka dyà kuditàngila mèmè mwìnè bu mwena Kilistò, bwà kudikànda ku maalu à pa buloba ne ndongolwelu wa buloba. Ncìyì ànu bu cidimba cyà èkèleeziyà cyanàànà to, kàdi bu mwena Kilistò mulediibwe cyàkàbidì udi wenda bilondèshile Mifundu. Nànsha byòbì ne ndi mubiikidiibwe, nànsha mene kùdi bidimba byà èkèleeziyà ne, ‘mukoleshi wa maalu,’ nànsha nàнку ndi—ndi—ndi mbala aci bu ne ncintu cinène kutàmba—kutàmba cyà bu ne mvwa muntu mutàmbe kumanyika mu cimenga eci anyì mu ditunga edi. Bivwa bitàmbe bwimpè bwà mèmè kwikala aci pamutù pàa kwikala Mfùmù wa ditunga dyà États-Unis, anyì—anyì mfùmù wa buloba. Nudi numòna anyì? Mèmè—mèmè ndi mbala aci bu ne cidì kuulu menemene, bwalu Nzambi mu luse Lwèndè, kumpàla kwà difùkà dyà dyulu ne buloba—buloba, wàkammòna mèmè, ne—ne wàkatèeka kaadimiinu kakesè munda amu, bwà diitabuuja dyànyì dyàmòna mwà kubuuka kumutù kwà maalu à pa buloba aa. Nènku mpindyewu Yèyè wàmbiikidi, nènku ndi—ndi ntàngila mwaba wànyì.”

<sup>109</sup> Bu mwàkambà Pòlò ne, yèyè wàkatàngila mudimu wèndè mu butùmbùke...nwamònu’s, nènku, kaa, bwà ne Nzambi

wàkamubiikila bwà kiikadi mulongeshi munène bu Gàmalièlè to. Kàdi Pòlò wàkabiikidiibwa bwà kwikalaye mulambu bwà Kilistò. Nwamònu anyi? Mpindyewu ncintu cimwècimwè aci.

<sup>110</sup> Mònaayi ne, ne diitabuuja bu nàнку, kacya kàvwakù yèyè mweyèmèné dimònà dyèndè to, cìvwàye mwà kumòna aci. Mpindyewu, yèyè kààkamòna cìngà cintu kuntwaku to ànu musùmbà wà—wà bantu bàdi ànu bàlenga bitoci, bapika, mu bùlokò, bàbàshipa ditùkù dyònsò, bàbèèla mfimbù, bàbèèlulwila, ku ngiitàbùùjilù wa wabò ntèndeleeleu ne, bàvwa “bakoleshi bàà maalu.” Ne kùvwa pàlò kampànda musòmbe pa nkwasu wa butùmbi, uvwa kàyi mumanye anyi kàyi ùtanga ní ncinyi ní ncinyi cyà wabò ntèndeleeleu to. Kàvwakù yèyè ne cìvwàye mumanyè pa bwalu abu to. Yèyè ùvwa mumpàngaanù, pa nàнку yèyè ùvwa ànu. . . Cimfwànyi kaayi cyà leelù ewu’s wè! Nènku’s ki cyòci aci, ntèndeleeleu mushiilàngàné. Ne mùshindù mwinè wùvwàbi bu ne—bu ne Mòsà ewu, pèndè mu nkwasu mwinè pàmwè ne mfùmù wa ditùnga, anyi—anyì muntu munèné awu, Pàlò, bwà kumupinganaye dyà lufù lwèndè, bu mùkaavwàye muntu mununu. Kàdi nànsa nàнку Mòsà wàkadyàmbidila ne dibìkidiibwa adi. . . Yèyè kutàngila pambèlu apu, pa dididiishì òmwèdìmwè dyàkatàngidila pèndè Pàlò adi, bwalu yèyè ùvwa ùsanganyiiibwa mu nzùbu mwèndè.

<sup>111</sup> Ki Pàlò kutàngila pambèlu e kumònaaye bantu bàvwà beele byanza muulu abu, nènku biikàlè bàngata mfimbù bàbèèla too ne mùvwàbo bàfwa ne bwalu bàvwa bàsambila. Bàvwa bàbàcimpika mwele wa mvità mu myoyi ne bwalu bàvwa mene bàpangile kutùmikila, dîbà kanà dyònsò, ne bàbènzeja midimu too ne mùvwà tuumibidi twàbò tukesè tukùlàkàjì atu tufwànyine kudishinda panshi, ne bàbàpèèsha tuubyakudyà twà kabàyikù bùùkuta to. “Èè, bòbò kabàvwakù cìngà cintu to ànu musùmbà wà bakoleshi bàà maalu, kabàyikù bantu mene to.”

<sup>112</sup> Kàdi pààbi Mòsà, ne diitabuuja adi munda mwèndè, ùvwa yèyè ùbàtàngila, wàmba ne: “Ncisàmbà cibènèshìibwe cyà Nzambì.” Amen. Mèmè ntu munange aci. Ne diitabuuja bu nàнку, èndè mèsù kaàkatwìshilakù pa dibàlakana dyà Ejiipitù adi to, àkatwìshila wòwò pa mlayì wà Nzambì. Dìsù dyèndè dyà mukankù dyà diitabuuja adi òvwa òmòna dyàmwàmwa dyà dibàlakana dyà Ejiipitù. Yèyè, vùlukaàyi ne, ùkaadi wènda ùshààla mukankù mpindyewu. Yèyè mmupròfetà, ne òvwa dyèndè dyà mukankù adi òvwa dibànda kumutù kwà bintu abi. Kaa, mùshindù mwinè wùndì mèmè munange aci’s wè! Huh! Ekèlekèle!

<sup>113</sup> Mùshindù mwinè wùdìbi misangu yàbùngì leelù ewu, leelù ewu, beena Kilistò bàdi bèeyemena pa byumvwilu byàbò, ne pa bìdìbo mwà kumòna, anyì bìdìbo mwà kuumvwa, pamutù pàà diitabuuja dyàbò, bwà kweyemena byùdì umòna ne òvwa dyèbè ne dibàlakana abi. Bu munùdì nwènù bantu bakàjì, ntu ànu misangu yònsò nnwèlela mbilà, bwà ne nudi ne cyà kulekela



nsukì yènú yileepa, bwà ne kanwèna ne cyà kudilaaba bilaabu byà kwísù to, nudi ne cyà kwikala nwenza maalu bu bainábànzá ne beena Kilistò. Nudi nutàngila pambèlu mu mùsèèsù numòna bantu bakàjì leelù bavwàle mvwàdilu wa masandi, èè, nudi nudyàmbidila ne: “Èè, mukàjì awu’s ùtu wa mu èkèleeziyà, mèmè ncyèna mwà kwenza cyòci aci bwà cinyì?” Nwamònu anyi? “Ne yèyè’s ùtu ùkòsa nsukì yèndè, bwà cinyì—bwà cinyì mèmè ncyèna mwà kwenza nàнку? Èè, yèyè’s ùdi ne mmwènekèlu ànu wa kalolo ne wa mamanya à mu mutù, ne buumùntù bùndiku mèmè ewu nciyikù mene naabù to. Èè, mèmè ncyèna mwà kwenza cyòci aci bwà cinyì? S’bìvwa bikèngela bwà mèmè kucyènza.” Paùdi wenza cyòci aci, s’udi ucibwila diitabuuja dyèbè panshì. Nwamònu anyi? Kwèna upèèsha diitabuuja dyèbè mpùngà bwà kukoladi to. Bangilà pa cyòci aci, ànu bu mùnkádi mwambàmbe.

114 Muntu kampànda ùvwa wàmba ne: “Mwanèètù Branham, ditùnga, bantu, s’bàtu bàkubala wèwè ewu bu mupròfetà. Kabìvwa bikèngela bwà wèwè kwikala utàndisha bantu bakàjì mùshindù awu to, ne bantu balùme, bwà bintu ebi. Wèwè, bìvwa bikèngela kubàlongesha mwà—mwà kwamba bipròfetà ne kupeta mapà.”

115 Mèmè kwamba ne: “Mmunyì mùndi mwà kubàlongesha makùmi makolè pàdìbo kabàyikù bamanyè nànsha ABC?” Nwamònu anyi?

116 Mpindyewu anjì bangilà pa cyòci aci. Anjì kудisukula mu mùshindù wà ne paùdi upàtuka mu mùsèèsù wikalèku ne mmwènekèlu wa mwena Kilistò’s, twamb’eku twamb’eku, nwamònu’s, ne pashìishe wènzè maalu bu yèyè awu. Nwamònu anyi? Kàdi kwèna mwà kucyènza mu wèwè mwinè to. Bìdi bikèngela wènzè bwà Kilistò àbwelè munda mwèbè amu. Ne dimiinu adi dyòdi disanganyiibwamù, ne Bukènkè abu budilengè, nedilwe ku Mwoyi. Dyòdi kadìyi dilwè ku Mwoyi to, kamùvwa cintu nànsha cimwè munda amu cìvwà mwà kulwa ku Mwoyi to. Bwalu, ncyà bushùwà ne cikaadi cijaadikiibwe pa bakwàbò, nwamònu’s, dyòdi didi dilwa ku Mwoyi dyàkàmwè pàdìbi ànu ne Bukènkè bwàdilengì.

117 Aci nditàndisha dyà bantu bakàjì, ndi mumanyè, bàdi munkaci mwà kutèèleja mukàbà wà mèyi ewu abu, anyì bìikalà mwà kuwùtèèleja. Nditàndisha kùdi, wèwè mwanèètù wa bakàjì. Bìvwa bikèngela bwà kwikalaci nàнку. Bìvwa bikèngela bwà kwikalaci nàнку, bwalu cìdi cidìlejeja. Cyùdi mwenze nànsha ciikàle cinganyi; uvwa mufwànyìne kwikala mutèndeledi, matùkù èbè wònsò à mwoyi, udi mufwànyìne kwikala musòmbèle mu èkèleeziyà, tatwèbè ùdi mwà kwikala mwambi, anyì bàyèebè mmufwànyìne kwikala mwambi; kàdi paùdi ànu ushikukila Dìyi dyà—dyà Nzambi, s’bìdi bìleeja ne kakwèna Mwoyi muntwamu. Paùdi umòna cintu aci cìleejìibwe patòoke, ne Mwoyi wà Nyumà Mwìmpè, uMutàngila pàdiYe

ùlenga bakwàbò, umòna cidìbo bènza, Yèyè ùlwa naaci pambidi pààbò, kabyèna bikèmesha to . . . Bwà cinyi . . . ?

118 Nditàndisha kaayi—kaayi kùdì Bàfaalèsà abu, bàakabiikilà Yesù, pàvwàYe mwà kujingulula meeji ààbo apu, Yèyè kubàbiikilà ne: “Beelèzèbùlà.”

119 Kàdi ndumbà mutekète awu yèyè wàkamba ne: “Mòna’s, Muntu ewu m’Maasiyà awu. Mufundu mmwàmbe ne Yèyè neenzè cyòcì eci.” Nwamònu’s, dimiinu didyànjila-kulongolola adi òvwà disanganyiibwa munda amu. Nènku Bukènkè mbwenze ànu budilenga anyi, pààdi dyumba dilwa ku Mwoyi. Kwèna mwà kushàalakù mudilaminyine mwinshi amu nànsha. Kwèna mwà kusokokakù Mwoyi to.

120 Udi mwà kwangata nshàamendà ne kumupongolwela pa mushiki wà mashinda, ne kuàshebeya mu muvù wà mashika. Muvù wà bintu bitòloka wùdì wùlondà awu, mashinda èbè à mapite bungi awu àdi àsanganyiibwa lwà penyi? Ànu ku mwelelu menemene wà ku nyungulukilu wa nshàamenda aku. Bwalu, dimiinu didì ne mùtòlokò munda mwinshi mwà dibwe adi, pàkaadi dibà dibanga kutùma nsèsà, wèwè kwènàku mwà kudipangisha to. Nedidinyondè dyenda dipicila muntwamu ne dikapàtukila buludi ku mwelelu wa cyòcì aci aku ne kujuula mutù kuwimanyika muulu bwà butùmbi bwà Nzambi. Nwamònu’s, kwènàku mwà kusokoka mwoyi nànsha. Pàdi dibà dilenga mwoyi wa bukwà-mici, bùdi ne cyà kwikala ne mwoyi.

121 Nènku pàdi Nyumà Mwîmpè ùlenga Mwoyi wà mu Mifundu wùdì munda mwà muntu kampànda, Wùdi wùpàtula mamuma àWù ànu *mwaba awu* mene. [Mwanèètù Branham ùdi ùtuuta cishòndò—Muf.] Nwamònu anyi?

122 Pa nànkù nànsha wèwè mwikàle mwena lulamatu anyi wa meeji matòoke wa bishi, nànsha mùdì wamba ne kwèna, ne mwikàle wakula, wamba ne bòbò bàvwà . . . Bakàji bàdi bàvwàla bilàmbà bibi ebi—ebi aba ne bikwàbò pambèlu pààpa, ànu byà muji wa maja wa ùvùula ne bilàmbà, wa mu mùsèèsù ewu. Nànsha byòbì ne, kwèna witabuuja ne ki cyùdì to, kwèna mwà kudiitabuujiya to. Udi mwà kujaadika mùdi kùyì mumanye bwalu pa bìdi bitàngilà masandi, kàdi, mu Mukàndà wà Nzambi, udi munkaci mwà kwenda masandi. Yesù wàkamba ne: “Ewu yònsò ukátàngidi muntu mukàji bwà kumwalakana, yèyè wàmanyi kwenda nendè masandi munda mwà mwoyi wèndè.” Nènku wèwè mwine’s ngudi mudizànjike mùshindù awu. Nwamònu’s, kwèna mwà kucimòna to pàdi Mwoyi awu kawùyì wùsanganyiibwa munda amu.

123 Wèwè udi utàngila muntu kampànda mukwàbò, utàngila wamba ne: “Èè, mèmè’s ndi mumanyè Mwanèètù wa bakàji Jones. Mwanèètù wa balùme Jones ùtu . . . Yèyè mmwambi. Mukàjèndè ùtu wènza *cikampànda* ne wènza *cikansanga*.”

124 Cìdì *aci* cyenza kî ncìdì ne bwalu to; Eci ki Dìyì. Yesù wàkamba ne: “Dìyì dyà muntu yònsò diikàlè mashimi, ne Dyànyì diikàlè dilelèlè.” M’Bible. Nènku pàdì Bukênkè abu bucìlenga cyà bushùwà, cìdì ne cyà kulwa ku Mwoyi. Cìdì ànu ne cyà kulwa ku Mwoyi.

125 Mpindyewu, dísù dinène dyà Mòsà adi, dísù dyèndè dyà mukanku adi, dyàkatàngila dyàmwamwa dyà dibàlakana dyà Ejiipitù.

126 Mwena kwitabuuja mwena Kilistò mulelèlè leelù ewu, cìdì èkèleeziyà wàmba nànsha ciikàlè cinganyì, cìdì muntu kampànda mukwàbò wàmba, pàdì Bukênkè abu bùlenga, ne yéyè ùmòna dishindika diinè dyà Nzambi, Dikunji dyà Kapyà adi dilembèlèlè kwàka, ne bimanyinu ne maalu à kukèma byàkalayiiwbà abi, Mufùndu mwikàlè mutèèkùibwemù, cìdì cilwa ku Mwoyi. Nànsha ciikàlè cikesè bìshi, ne nànsha ciikàlè mu banyààbanyà bàà bùngì kaayi, cisumbu cyà Nzambi citu misangu yònsò ànu banyààbanyà. Nwamònu anyi? “Kanùcìinyi nànsha, nwènù kasumbu kakesè—kakesè kàà mikòòkò, mbudiswilè bwà Taatù wenù bwà kunùpèèsha Bukalenge.” Nwamònu anyi? Bòbò bàdi bàcyùmva. Nzambi mmwenzèjìbwe bwà kubàtùma kuumukila mu dngumba ne dngumba dyònsò, mu ndongolwelu ne ndongolwelu yònsò wa bantu, myaba yònsò, bwà kuCimònabò, piikalàbo balongolwela Mwoyi.

127 Tàngilàayi mukùlumpe Simèònà, uvwa mulongolwela Mwoyi awu. Pààkabwelà Maasiyà mu ntempèlu, mu mmwènekèlu wa mwànà wa mu dibòko mu mabòkò à mamwèndè, Simèònà, lwà mundekeelu mu cibambalu mwaba kampànda, munkaci mwà kubala, Nyumà Mwimpè kumukatamuna, bwalu yéyè ùvwa mwindile. Mwoyi awu wùvwa munda mwèndè. Yéyè ùvwa wàmba ne: “Mémè ncyàkufwàku to ncìyì mumòne Kilistò wa Mukalenge.” Kàdi’s ki Kilistò wa Mukalenge awu mu ntempèlu amu. Nyumà Mwimpè kumulombola kuumumusha ku mudimu wèndè, kupàtukaye, ne kupìcilaye tàmakàtàmàkà mu mwaba awu ne kubàkulaye mwànà wa mu dibòko awu, kwambaye ne: “Lekèlàku—lekèlàku musadidi Wèbè àyè byàndì mu ditalala, bwalu mèsù àànyì àkumòna byàwù lupàndù Lwèbè.”

128 Kùvwa mukàjì mpofo mukùlākàjì mu ditumba, dînà dyèndè Annà, uvwa ukwàcila Mukalenge mudimu muunya ne bufukù. Ùvwa pèndè munkaci mwà kwamba maalu àcìvwà àlwa, wàmba ne: “Maasiyà ùlwalwa. Ndi mwà kuMumòna ùlwa.” Pààbì, yéyè ùvwa mpofo. Mu cikondo cimwècimwè aci, pàvwàYe mwaba awu apu. . . KaaMwoyi kakesè kàvwa munda mwèndè aku, kiikàlè kàmba maalu àcìvwà àlwa ne: “Necyènzekè! Necyènzekè! Necyènzekè!” Dìbà adi, Mwoyi wùmwèwùmwè awu, Bukênkè abu kubwelaBù mu nzùbu amu, mu mmwènekèlu wa Mwànà wa mu dibòko, bu “mwànà mulelèlè mu masandi,” mujingila

mu mikùsu Yèndè yà bilàmbà ayi, bwenda búpìcila mu nzùbu amu. Ki Nyumà Mwímpè kulenga mukàji mpofo mukùlakàji awu, ne yêyè kulwa mwenzeja kùdi Nyumà, mulombola wendà ùpìcila munkacì mwà bantu amu, ne kwimanayè lwà pàvwà Mwànà mwinè wa mu dibòko ewu apa, ne kubèneshayè maamù, ne kubèneshayè Mwànà wa mu dibòko awu, ne kwambayè civwà matùkù àcìvwà àlwa mwà kwikala Bwèndè Yêyè. Nwamònu's, mulongolwela Mwoyi! Nwamònu anyi?

<sup>129</sup> Anji bàtàngìlaayi, kabàvwa dikumi ne bàbìdi muntwamu to. Kwàkasungidiibwa ànu misùùkà mwandamukùlù cyanààna mu ditùkù dyà Noà, kabàyìkù bààbùngì menemene to, kàdi bônso bàvwà balongolwela Mwoyi bààkabwela mu ciinè cikondo aci. Mònaayi mùdi Nyumà Mwímpè ùkwàta mudimu mu cikondo ne cikondo cyònsò, mwikàle ùkòka bantu.

<sup>130</sup> Mpindyewu tudi tujandula ne diitabuuja dyà Mòsà òvwa dimulombòle bwà kutàngila cìvwà mwà kulwa, kí ncìvwàku to. Kutàngila mààlabà pamutù pàà kutangila leelù. Kutàngila mulayi pamutù pàà dibàlakana. Kutàngila cisàmbà pamutù pàà bulongolodi. Nwamònu anyi? Nzambi nguvwa wenza cyòci aci awu.

<sup>131</sup> Lotà ùvwa yêyè mwà kumòna dibàlakana ne ditanta mu Ejiipitù, anyi mu Sodoma. Lotà ùvwa mwà kumòna mpùngà yà—yà—yà mfranga yà—yàbùngì. Lotà ùvwa yêyè mwà kumòna ditant-...mpùngà yà pàakatàngilàye kwàka ku Sodoma ne yêyè ùvwa mufwànyine pàmwàpa kulwa. . . Bu mùvwàye mwena Ebelù, ùvwa mufwànyinekù kulwa muntu munène muntwamu, bwalu ùvwa muntu munène wa mamanya à mu mutù, ne mwànà wa tùtwèndè wa Abraham, pa nàнку kusungulaye bwà kuya mutàngile ku Sodoma. Mamanya à mu mutù à Lotà àkamulombola ku dimòna dibàlakana dyà—dyà ditanta. Mamanya à mu mutù à Lotà àkamulombola ku dimòna dibèneshà dyà—dyà dibàlakana. Kàdi, diitabuuja dyèndè òvwa ditambe kwikala dicìbwila panshi kùdi dibàlakana, mu mùshindù wà ne yêyè kààkamònakù mudilu wùvwa mwà kulwa kubùtula nsòmbelu wa mùshindù awu awu to.

<sup>132</sup> Nènku mùshindù awu ki wùdi bantu leelù ewu. Bòbò bàdi bamòna mpùngà yà diikala bàà mu bulongolodi bunène, bàdi bamòna mpùngà yà dipeta mwaba wa luumù pàmwè ne bantu bàà mu cimenga bàà milongo minène, kàdi kabàyì bàamòna mpùng-...Kabèèna bòbò bamònakù ne diitabuuja dyàbò ndicìbùkìlà panshi ne tunèkè to. Lekèlaayi ngàmbululè cyòci aci bwà kabìikadi bààlwa kucyùmvwà bibì. Bakàji leelù ewu, bòbò, mùndi ngàmba, bòbò mbaswè—bòbò mbaswè kwikala bènza maalù bu bakàjàànà bàdi bèndè luumù bàà mu sèndèmà. Balùme leelù ewu mbaswè kwikala bènza maalù bu benji bàà bikàsà bàà ku tèlèviziyò.

<sup>133</sup> Bayiishi leelù ewu mbenze ànu bu ne mbaswe kuvwija

èkèleeziyà yàbò mifwànàngàne ne diswa dyà cyena-leelù dyà mùshindù kampànda, buumambàlà ne bikwàbò byònsò. Bàdi bóbò bamòna mpùngà pàmwápa yà kulwakù mwèpiskòpò anyì mutàngidi wa bònsò, anyì cintu kampànda cyà mùshindù awu, bu bóbò mwà kwendela pàmwè ne èkèleeziyà awu; bàlekela Mifundu, pààYi's mmitèeka ànu kumpàla kwàbò mene, miikàle mishindika ànu menemene kùdi Bukolè bwà Nzambi, ne kùdi Díyì dìdì ne mwoyi dyà Nzambi dìdì ne mwoyi munda mwà bantu adi. Nànsha nànkù, bóbò kí mbaDiswekù to. Bàdi bàmba ne: “Katwèna baswè kusambakanangana ne cintu cyà bu Aci to.” N’Cifwànyine kulwa kubànyènga karta kààbò kàà buumambàlà. N’Cifwànyine kulwa kubànyènga ndongolwelu wabò wa cyena-màngumba. Pààbò bantu bàà meeji matòoke, bu Lotà, musòmbe mu Sodoma mwàmwa, mumanyè ne ncibi. Nwamònu anyì? Nwamònu anyì? Cidìbo bènza ncinyì pàdìbo bènza nànkù awu apu? Bàdi bàkwàcisha kiine kaadiitabuuja kakesè kàvwàbo naaku aku tunèkè. Kakèna mwà kukwàtakù mudimu to.

134 Mpindyewu, Mòsà kudilekelelayè ku cyòci aci, nènku yèyè kutèeka . . . diitabuuja dyèndè kukwàcishadi maalu à pa buloba tunèkè.

135 Anyì diitabuuja dyèbè nedikwacishè dibàlakana adi tunèkè, anyì dibàlakana adi ndyàkwàcishà diitabuuja dyèbè tunèkè. Mpindyewu, bikèngela wèwè kusungula anyì eci anyì cikwàbò. Nènku udi umòna ne Bible kèna ùshintulukakù to. Nzambi kàtu ùshintulukakù to. Yèyè n’Nzambi wa kàyì ùshintuluka to.

136 Nènku mpindyewu tudi leelù ewu, tusangana ne, bantu bàà mu ditùkù edi, nwamònu’s, bàdi bàtàngila ku bintu binène, bulongolodi bunène. “Mémè ntu wa mu *Cikampànda*.” Nwamònu anyì? Nènku bàyaaya kwìnè kuntwaku, kàdi, tàngilàayi, kakùyikù dishiilàngana ne bantu bàà mu mùsèsù to. Kakùyikù bikwàbò bintu to. Bàdi ne kaacintu kampànda kakesè kàà mamanya à mu mitù, ne bàtùngunuka. Paùdì wakula bwà dyondopa dyà kùdi Nzambi, bwà Dikunji dyà Kapyà, Bukènkè bwà Nzambi, bàdi bóbò bàmba ne: “Abi’s mbyà mu meeji.”

137 Muntu kampànda mmwangate fòtò wa Mwanjèlò wa Mukalenge, ditùkù adi, mwambi kampànda wa mu ba-Baptistes, kuCisekayè. Nwamònu’s, aci’s—aci’s ndipenda dyà Nzambi. Nwamònu anyì? Kakwèna difwidiibwa dyà luse ku cyòci aci to.

138 S’ki cyàkambà Yesù, nwamònu’s. Ndipenda dyà Nzambi; paùdì uCimòna cyènza byenzedi mene byàkenzà Kilistò abi. Yèyè ngwàkamba . . . Pàvwàbi ne, bóbò bààkamòna byenzedi abi mu Kilistò, Yèyè ùvwa Mulàmbù awu, ne kuMubiikilabò ne “Beelèzèbùlà, démon,” bwalu, bwalu Yèyè ùvwa ùcyènza. Kàdi mpindyewu bàdi bàmba . . . KwambaYè ne: “Ndi nnufwila luse bwà bwalu abu. Kàdi pààlwà Nyumà Mwimpè bwà kwenza cintu cimwècimwè aci, wèwè mwambe díyì dibi bwèndè Yèyè awu, kwàkufwidiibwa luse bwà cyòci aci to nànsha kakesè, mu eci

cikondo anyi mu cikondo cilwalwa.” Nwamònu anyi? Ànu díyì dibì òm̀wèpèlè cyanààná ndìdì dikèngela bwà wèwè kwamba bwèndè Yèyè. Nwamònu anyi? Nènkù díbà adi . . .

<sup>139</sup> Bwalu, Mwoyi awu, pawikalà mulongolwela Mwoyi wà Cyendèlèlè, díbà adi Mwoyi awu mmufwànyine kubwayika paùdì muCimòne apu. Wèwè udi mufwànyine kuCijingulula, bu mukàjì mutekète awu ku ciinà cyà mà̀yì, ne—ne bakwàbò bashiilèshiiàngàne abu. Kadi cyòcì kaciyimù to, kaciyènakù mwà kulwa ku Mwoyi nànsa, bwalu kamwèna cintu nànsa cimwè bwà kulwa naaci ku Mwoyi to. Ànu mùvwà mààmù wanyì mèmè mukùlákàjì wàmba ne: “Kwèna mwà kupeta mashi mu tuunèpà to,” bwalu kamwèna mashi to. Mpindyewu, ncintu cimwècimwè aci.

<sup>140</sup> Nènkù cìdì cìcìbwila kiine kaadiitabuuja kakesè kaùdì naakù aku panshì ne tunèkè. Lotà ùvwa mwà kumòna dibàlakana, kàdì kayiku ne diitabuuja dikumbàne bwà kumòna mudilu wùvwà mwà kubùtula dibàlakana dyà mùshindù awu adi to.

<sup>141</sup> Mèmè’s ndi ndikonka twètù aba ní tudiku naadi, leelù ewu. Ndi ndikonka ní twètù aba, èè, bu mùdì bakàjì bàdì baswè kwikala bamanyìke abu, bàdì baswè kwikala bènza maalu bu bakwàbò bàà—bàà ku bakàjì bàà mu èkèleeziyà abu, ní bàdì bamòna ne mbaswè kwikala bènza bu—bu bakwàbò abu. Bàdì—bàdì mwà kumòna mpùngà yà kwikalaku mukàjì wa—wa—wa kwìsù kutàmbe bulenga, mu kwikala mudilàbe bilaabu byà kwìsù. Bàdì mwà kumòna mukàjì wa kwìsù kutàmbe bulenga mu kwikala ne mmwènekelu mutàmbe kwikala wa mwànà mutekète, mu kukòsa kwà nsukì yèndè ne kwenza kwà maalu bu bàmwè bàà ku bakwàbò abu, anyì bu mukàjàànà mwendè luumù wa mu sèndèmà. Kàdì ndi ndikonka aci ní kí ncicibwilekù diitabuuja dyàbò panshì ne tunèkè, pa kumanya ne Bible ùdì wàmba ne: “mukàjì udi wenza aci ùdì ùfwìsh- . . . mmukàjì udi ufwishangana bundù,” ne, “mukàjì udi uvwàla cìvwalu cìdì cikumbànyine muntu mulume awu, ùdì cinyangu kumpàla kwà Nzambi,” mipanù, ne bikwàbò, ne tùpùtulù tùdìbo bàvwàla atu. Nènkù—nènkù cìdì cilwa ànu cipapakane cyètù cyà menemene eci mu mùshindù wà ne cìdì cishààla ciibidilu cyà matùkù wònsò kùdì bantu bàdì bacyènza abu. Ndi ndikonka ní kabèènakù bàcìbwila kiinè kaadiitabuuja kakesè kanùvwà naaku aku panshì ne tunèkè, kiinè kàà diya dyà mu èkèleeziyà mene aku, nudi numòna’s. Ki cintu cìdìci cyènza ncyòcì aci.

<sup>142</sup> Lotà wàkacyènza, ki kumucìbwilacì panshì ne tunèkè, ne kucìbwilacì bàà kwèndè panshì ne tunèkè muntwamu. Kabàvwakù mwà kucimòna to.

<sup>143</sup> Kàdì Abraham yèyè, mwikàle ne—ne diitabuuja dishìndika, tatwèndè mwakùnyì awu, kààkatàngila ku dibàlakana to, kààkaswà bwà kubitanga to, nànsa mwàkàkèngelàbì bwà

kwikalayè ne nsòmbelu wa lutàtu ne kwikala musòmbèle pàà nkaâyendè amu. Ne Sarah ùvwa musòmbèle mu cipèèlà mwàmwa mùvwà nsòmbelu wa lutàtu, mu buloba bwatùke amu. Kàdi bóbò kabàakamòna dibàlakana adi anyì mpùngà yà dilwa bamanyike ayi nànsha.

144 Sarah, mukàjì uvwa mulenga mutàmbe mu ditùnga amu awu, Bible ngudi mwambe nàнку. Yèyè ùvwa mulenga kumòna, mutàmbe bulenga ku bakàjì bònsò. Kàdi mpindyewu yèyè wàkashààla mene ne wàkatùmikila bayendè, mu mùshindù mene wa ùfika too ne ku dimubiikila wendè “mukalenge,” yèyè udi Bible ùtèèja awu, too ne mu—mu Dipungila Dipyadipyà; mwambe ne: “Yèyè unùdi bàna bèndè bàà bakàjì, piikalàbi ne nudi nutùmikila diitabuuja.” Nwamònu’s, ùbiikila wendè bàyendè ne ngwendè “mukalenge.”

145 Nènku Mwanjèlò wa Mukalenge kuya kamòna ntempèlu wabò ne...anyì kantenta kààbò kakesè aku kuntwaku, ne kubàmbila. Kabàvwa nànsha mene ne nzùbu wa disòmbela to; basòmbèle mu malaba maatùke. Kàdi’s ki bwalu mbwòbù abu. Nudiku numòna mùdi ditùkù adi dinwàngana cyàkàbìdi, ànu menemene mwàkadibi musangu awu amu anyì?

146 Mpindyewu, Mòsà ne diitabuuja dyèndè dinène adi, cyàkàbìdi, ki pàvwàye mwà kwamba ne “to” ku bintu byà mpindyewu byà maalu à mpindyewu à pa buloba aa, ne kwenza disungula dijaalàme. Yèyè wàkasungula bwà kutwàla ntàtu pàmwè ne cisàmbà cyà Nzambì. Wàkasungula bwà kuya naaci. Bwà cinyi? Diitabuuja dyèndè! Yèyè wàkamòna mulayi. Wàkamòna cikondo cyà nshùikidilu. Wàkamòna ditùkù dyà dyàbwàbwa, ne wàkalekelela diitabuuja dyèndè. Ne yèyè kààkatùma ntèmà yèndè ku bìvwà mèsù èndè àmòna mu mpùngà eyi to, yà ne yèyè nguvwa pàlò ne nguvwa mwà kwikala pàlò ayi. Yèyè wàkatàngila buludi ditùkù dyà dyàbwàbwa.

147 Kaa, bu bantu mwà kwenzaku nàнку’s wè, kabàyikù mwà kumòna buloba bùdiku mpindyewu ebu. Wèwè mutàngile buloba bùdiku mpindyewu ebu, s’udi wenza disungula pàmwè naabù’s. Bwita mèsù èbè ku abi, kàdi tàngilà mulayi wà Nzambì, ku ditùkù dyà dyàbwàbwa.

148 Ku diitabuuja dyèndè nkùvwàye mwà kusungula. Yèyè wàkasungula bushùwà bwà kubiikidiibwayè mwànà wa Abraham, ne wàkabènga bwà kubiikidiibwayè mwànà wa Pàlò. Mmuniyì mùvwàye mufwànyine kucyènza, pàvwàbi ne bukalenge bwònsò nkòong. . . Ejiipitù’s nguvwa mucimùne buloba bujimà. Yèyè’s nguvwa mfumù wa buloba, ne mwikàle nsongàalùmè wa citende wa bidimu makumi ànaayi, pabwìpi ne kwangata nkwaswa wa butùmbi. Kàdi yèyè kààkatàngilakù mamanya èndè à mu mut- . . .

149 Tàngilàayi bakàjì bàvwà bafwànyine kwikala bàdyàdija mu nyùngulukilu wendè, ku ditùkù ne ku ditùkù, bipangu

byà bakàji. Tàngilàayi mùvwà dibàlakana adi mwà kwikala; musòmbè ùnwàngana ànu ne maalà, ùbandilangana ànu ne bakàji bàvùùla ne bilàmbà kumpàla kwèndè, pàvwàbo baja maja apu, ne biikàle bamwela kapèèpa ne . . . Ne bakàji bàà bafùmìne pa buloba bujimà, bavwàle bilengà ne bintu byà musinga mukolè, cilwilu cyèndè pambèlu apu. Cintu cimwèpelè cìvwà cìkèngelà bwà yèyè kwenza's cìvwà ànu kusòmba ne kudyà byàkudyà byèndè byà bilenga abi, ne kwamba ne: "Tumaayi. . . tumaayi cisumbù cyà māsàlaayi cyà nombà *kampànda* mu mwaba *kansanga*, bàkwatè ditunga adi. Ngèela meeji ne ndi naadi dijinga." Ki cyònsò cìvwà cìkèngelà bwà yèyè kwenza ncyòci aci. Kusòmba mwaba awu, ne bóbò bàmwela kapeepà, yèyè mushàale ànu kacya wàtùbula mukana; mulekele bakàji balengèle-lèngèlèè bajì bàà—bàà maja bàà bàvùùla ne bilàmbà, balenga kwisù bàà mu ditùkù adi abu, bàmpùngolwela maala mukana, bàmudiisha byàkudyà biikàle bamujìngile mabòko ku nshingu, bakàji bònsò bàà batàmbe bulenga bàà pa buloba bujimà abu. Dibàlakana dyònsò òvwàku adi, òvwà disanganyibwa ànu pàvwàye yèyè apu.

<sup>150</sup> Kàdi cyàkenzàye ncinyi? Yèyè wàkuumusha mèsù aku ne kuàtàngija kwà cyanààna. Úvwà mumanyè ne mudilu wùvwà pabwìpi bwà cyòci aci kuntwaku. Úvwà mumanyè ne lufù lùvwà lùsanganyibwa mu njila awu. Nwamònu anyi? Úvwà mumanyè ne lùvwakù. Ki kwambulaye mèsù e kutàngila musumbà wa bantu badyombola ne babèngiibwe, ne ku diitabuuja yèyè kusungula bwà kutwàlayè bundù bwà Kilstò, ne wàkadibiikila ne: "Mémè ndi mwànà wa Abraham. Ncyèàku mwànà wa pàlo ewu to. Nànsha nwènu bamvwije mwèpiskòpò, anyi mulami, anyi mwèpiskòpò mutàmbedile, anyi paapà, mémè ncyèna mwànà wa cintàkanyì eci to. Mémè ndi mwànà wa Abraham, ne ndi nditapulula ne maalu à pa buloba." Amen, amen, ne amen! Ku diitabuuja, yèyè wàkenza nànkù!

<sup>151</sup> Yèyè wàkuumusha byà dibàlakana abi kubyèla ànu kwàka. Wàkuumusha byà mpùngà yà kulwa mwèpiskòpò uvwa ulonda abi, wàkuumusha byà—byà mpùngà yà kulwa mwèpiskòpò mutàmbedile uvwa ulonda abi, anyi mutàngidi wa bònsò uvwa ulonda ku masungulanga àvwà àlondà awu, anyi ní ncinyi cyònsò cìvwàku aci, wàkuumusha abi kàdi kubyèla ànu kwàka. Wàkabènga bwà kubitàngila.

<sup>152</sup> "Mpindyewu, mémè mwà kulwa mwèpiskòpò, s'nèngìkale mbwela ne bantu kwikalabò bàmba ne: 'Taatu Munsantu,' anyi—anyi 'Docteur *Kampànda*,' anyi—anyi—anyi—anyi 'Mukùlù *Kansanga*.' Mùshindù mwinè wikalàbo, bambi bònsò abu ku cisangilu aku, s'nebiikalè bantuuata tuumapi paanyimà, bàmba ne: 'Àmba tũng, mulùmbyànà, muntu wàwa's udi ne cintu kampànda, mùndi nkwabwila emu. Kaa, sh-sh-sh, shàala mupùwe, s'ki mwèpiskòpò ulwàlwa ewu, wamònu's. Cidiye yèyè wàmba aci, ki mukenji. Wamònu's, s'ki *Kampànda* ulwàlwa



ewu.” Bantu nebàngatè ndèkè bàfùmína pa buloba bujimà bwà kwíkàlala . . . kumòna paapà, ne kutwà mishìku ku dikàsà ne ku tukànù twèndè twà ku minu, ne bikwàbò. Mùshindù kaayi, mpùngà kaayi bwà mwena Kàtòlikè, mpùngà kaayi bwà mwena Mishòonyi, bwà kwìkalakù mwèpiskòpò anyi mutàngidi wa bònso, anyi cintu kampànda, muntu munène kampànda mu bulongolodi.

<sup>153</sup> Ùtàngila, nànsha nànkù, kàdi, nudi numòna’s, dísù dyà diitabuuja adi dyòdì dítu dítàngidila pamutù pàà byònsò abi. Nènku nudi numòna ndekeelu waci kwàka, bwalu, Nzambi ùdi wàmba ne cintu cyònsò mu kaabujimà necibutudiibwè. Diitabuuja, dísù dyà mukanku adi, dìdi dikutùntumuna kumutù kwà cyòci aci, nènku udi umòna mààlabà, kaciyi leelù to, nènku usungula bwà kubìkidiibwa mwànà wa Abraham.

<sup>154</sup> Pàlò, kàyì diitabuuja to, wàkamòna bânà bàà Nzambi bu “bakoleshi bàà maalu.” Kàyì diitabuuja to, kubàvwijaye bapika bwalu kàvwa ùciina civwàye wàmba to. Kàvwa ùciina Nzambi to. Ùvwa udyelela meeji ne yèyè ùvwa nzambi. Ùvwa yèyè wela meeji ne twèndè—twèndè tunzambi tùvwàye ukwacila mudimu atu, bwà ne yèyè ùvwa mwèpiskòpò, ùvwa mfùmù mutàngidi wa bònso, ne tunzambi twèndè atu ki tùvwà tucyènzè. “Ciinè Cintu cidi *apa* eci kaciyèna ne bwà nsongo to,” ki kubàvwijayè bapika’s. Ùvwa ùbàseka, ùbèèlulwila. Ànu menemene mùdì bantu benze leelù ewu emu, cintu ànu cyòci cimwècimwè aci menemene.

<sup>155</sup> Diitabuuja dyà Mòsà òvwa dyòdì dibàmòna mu buloba bulaya, cisàmbà cibènesha. Bivwa bifwànyine kwíkàlala mvità mikolè bwà kubàfikisha ku mulayi, kadi Mòsà wàkasungula bwà kuyayè naabò. Mùshindù mwinè wùndì mufwànyine kwalabala pa cyòci aci’s, kàdi dîbà dyànyì dikaadi dyènda dijika. Nwamònu anyi?

<sup>156</sup> Mònaayi, civwa cifwànyine kwíkàlala cintu cicolè bwà kukùdimuna bantu abu. “Bìdi bikèngela bwà wèwè kuya kasòmba naabò, bìdi bikèngela bwà wèwè kwíkàlala umwe wabò, kàdi bòbò bàkaadi bamanè kwíkàlala bàà mamanya à mu mitù bàà menemene mu mùshindù wa kùciyi mwà kubànyungishakù to. Wamònu anyi? Kàdi bikèngela bwà kwenzekeku cintu kampànda pambèlu pààpa. Bikèngela bwà citàmbe-mfùkìlu cileejiiwbekù kumpàla kwàbò. Neciikalè cintu cicolè. Malongolodi neàkwele làà, ne bintu byònsò ebi nebyènzekè. S’cidi—cidi—s’cidi bwalu bukolè, ciinè cidi cikèngelà bwà wèwè kwenza aci, kàdi nànsha nànkù enza ànu disungula dyèbè’s.”

<sup>157</sup> “Ndi umwe wabò.” Èyowà. Diitabuuja dyèndè ndyòdì dyàkenzà aci adi. Diitabuuja dyèndè dyàkapàtula tuntòlantòla. Èyowà’s, mukalenge. Yèyè wàcacimòna. Civwa cintu cicolè be bwà kubàfikisha ku mulayi awu, kàdi yèyè wàkenza disungula dyèndè bwà kuyayè naabò, nànsha byà munyi. Kàyì ùtàngila

cyàkamwenzàbo to, ne mwàkamwelàbo làà amu to, nànsha byà munyi yèyè wàkaya. Ûwva ùpàtuka naabò.

<sup>158</sup> Mpindyewu ndi ntèkemenà ne nudi munkaci mwà kubala. Èyo. Nda naabò, nànsha byà munyi. Dìvwijè, ikala umwe wabò, ncyà bushùwà, bwalu ndibànzà dikwela. Ncifwànyine kwikala mvità mikolè, ne byàbùngi byà kupicila, kàdi nànsha byà munyi nda ànu kuya.

<sup>159</sup> Kàdi diitabuuja dyèndè dyàkamulombola bwà kwenza disungula dyà Dîyì, ne kadiyì dyà dibàlakana to. Wàkangata Dîyì. Ki cyàkenzà diitabuuja dyà Mòsà ncyôci aci. Diitabuuja pàdidi ditàngila pa cidi citàmbe bubì cyà Nzambi. . . Vùlukàayi ne, ki dibàlakana ndyôdi edi mpindyewu, maalu à pa buloba, mfùmù udi mutàmbe kutùmbuka, wa buloba awu. Kàdi balaya bàà Nzambi bàvwa penyì? Mu ciinà cyà bitoci, basopi bàà bitoci.

<sup>160</sup> Kàdi pàdi diitabuuja, pàdi diitabuuja ditàngila pa cidi citàmbe bubì cyà Nzambi, didi dicibala bu ne ncinène ne cyà mushinga kutàmba cidi bàà pa buloba mwà kuleeja ne ncitàmbe bwimpè aci. Èyowà's, mukalenge. Pàdi diitabuuja dicitàngila, pàdi diitabuuja mwà kucimòna, pàdi diitabuuja mu Dîyì mwà kumòna Dîyì dimwènèshùbwe, bwàbò bôbò ncitàmbe dibàlakana dyònsò ne bwèpiskòpò butàmbedile ne bikwàbò byònsò byùdiku wèwè mwà kwamba abi. Diitabuuja ndibitàmbe. Nwamònu anyi? Wèwè udi mwà kumòna cidi citàmbe bubì aci, cidi cidymbòdùbwe, cibèngiùbwe, cyònsò cidici cifwànyine kwikala aci; ciikalè cyôci mu mùshindù wàci wa citàmbe bubì awu, kàdi nànsha nànkù diitabuuja dyôdi nedicibalè citùmbùke kule ne kule mu ntàntà wa mùliyò wà kilòmèetà kutàmba cidi citàmbe bwimpè cidi bàà pa buloba mwà kutwàla. Amen! Ki mùshindù wutùtù twimba musambu awu ne: “Nèndondè njila pàmwè ne banyaàbanya badyombola bàà Mukalenge.” Nwamònu anyi? Kaa, ekèlekèle!

<sup>161</sup> Bwalu, nudi numòna's, diitabuuja didi dimòna cidi Nzambi muswè bwà cyènjiibwè aci. Kaa, ndi ntèkemenà ne eci cidi cìkwela. Diitabuuja kaditu ditàngila cikondo cidi mpindyewu to. Diitabuuja kadyèna dimòna cidi *apa* eci to. Diitabuuja didi ditàngila bwà kumòna cidi Nzambi muswè, ne didi dikwàta mudimu bikùmbànangane naaci. Ki cidi diitabuuja dyènza ncyôci aci. Didi dimòna cidi Nzambi muswè, ne cidi Nzambi muswè bwà cyènjiibwè, ne diitabuuja didi ditàmbwila mu cyôci aci.

<sup>162</sup> Diitabuuja ndimòna dyà ntàntà mule. Kadyèna dipwekesha kamwenu kàadi kàa dijaalamija naakù dimòna to. Dyôdi didi dikwàta ku cintu ciludikila. Amen! Mutuuci mulenga wa cingoma kanà yònsò ewu mmùmànyè aci. Nwamònu anyi? Cyà ne, ndimòna dyà ntàntà mule. Cidi—cidi ntulòndò twà dimwèna mu ntàntà mule. Ntulòndò twà dimòna naatù twà mèsù àbidi, tùdi kùyì utàngidila naatù pabwipi *apa* to. Kwèna ukwàta

mudimu ne tulòndò twà mèsù àbìdì atu bwà kutàngila bwà kumòna ne tudi dībà kaayi to; nwamònu's, kwèna ukwàta naatù mudimu bwà aci to. Kàdi udi ukwàta mudimu ne tulòndò twà mèsù àbìdì atu bwà kutàngila kule menemene.

<sup>163</sup> Nènku ki cìdì diitabuuja dyènza ncyòcì aci. Diitabuuja dìdì dībàkula tulòndò twà Nzambì twà mèsù àbìdì, ónsò àbìdì awu, nseke yònsò yìbìdì, Dipungila Dipyadipyà ne Dikùlùkulu, ne dìdì òmòna mulayi wònsò wùtùYe mufile. Nènku diitabuuja dìdì diwùmona kwàka, ne diitabuuja dìdì disungula aci kadiyì ditàngila ne cìdì cikondo cyà mpindyewu cyàmba *apa* ncinyi to. Yèyè udi utàngila ku ndekeelu. Kèna upwekesha dyèndè dimònà panshì bwà kutàngila mùshindù *ewu* to. Ùdì yèyè utàngila kwàka. Ùdì ùshààla mulàme kamònyi kàà dísù kashìndamijila pa Díyì. Ki cìdì diitabuuja dyènza ncyòcì aci. Ki diitabuuja dìdì mu muntu ndìdì dyenza bintu abi.

<sup>164</sup> Mpindyewu tàngilàayi. Cìvwà Pàlò yèyè ùbìikila, dìbìikila, cìvwà Pàlò yèyè ùbìikila ne *ncinène* aci, Nzambì ùvwà ùcìbìikila ne “ncinyangu!” Pàlò ùvwà mufwànyine kwikala mwambe ne: “Tàngila, Mòsà, kuneeku, mòna's, wèwè ngudi pàlò udi ulonda. Ndi—ndi nkusambulujila dikombo dyà bukalenge edi pangùùmukà pànwàpa. Nènkusambulùjilè dikombo dyà bukalenge edi. Ndyèbè wèwè. Wamònu anyi? Mpindyewu, eci's ncinène. Wèwè's newikalè muntu munène, Mòsà. Wèwè newikalè mwèpiskòpò. Newikalè *cikampànda*, *cikansanga*, anyi *cikankenga*. Kutùshiyikù to. Shààla ànu mwaba ewu.” Kàdi, nudi numòna's, yèyè wàkabìikila aci ne *ncinène*, kàdi Nzambì wàkamba ne “ncinyangu!”

<sup>165</sup> Mpindyewu, nwènù bakàjì anji elààngànaayikù meeji kakesè, byà mwomùmwe, ne nwènù balùme. Cìdì bàà pa buloba bàbìikila ne *ncinène* aci, Nzambì ùdì ùcìbìikila ne “mbukooyà.” Bible kèna wàmbakù ne: “Ncinyangu bwà muntu mukàjì kuvwàlaye cìvwàlù cìdì cikùmjànyine muntu mulùme anyi?” Kàdi wèwè udi wela meeji ne udi ne meeji matwe mu dicyenza. Nwamònu anyi? Cyùdì's udi ànu uleeja patòòke mubidi wa bukàjì bwà dyabùlù, nènku kwajiki's. Pa nàнку, kùcyènjìku to.

<sup>166</sup> Ne nwènù balùme bàdì ne nsòmbelu wa dyenda dilondangana ne maalu à pa buloba, biikàle nukòngololangana ne nuupukilangana ne byòbì ebi! Ne nwènù balùme bàdì kanùyikù ne dikima dikùmjàne mu nwènù bwà kulekeeshakù bakàjì bèènu dyenza dyà byà nàнку awu, bundù bwènù! Pèènu nudìbìikila munùdì bânà bàà balùme bàà Nzambì? Aci bwànyì mèmè's ncimwèke bu cyena Sodomà. Nwamònu anyi? Kí mbwà kunùtapa ku mwoyi to, kàdi mbwà kunwàmbila Bulelèlè. Dinanga ditù dilongolola bilèma. Ki mùtùdì misangu yònsò. Maamù udi kàyì muswè kutàbàleela mwanèndè, kàyì ùmulongolola ne ùmutuutakù mapì kuumfundu, ne kàyì ùmùfikisha ku ditùmikila to, awu kí mmaamù wa nsongo bwà mwàna awu to. Ncyà bushùwà's.

167 Mpindyewu, kàdi tàngilààyi nùmonè cìdì cyènzeka mpindyewu. Mòsà wàkamòna cyòci eci, ku cìkèèna-kumòna cyèndè aci. Ki Pàlò kwambayè ne: “*Eci ncinène.*” Nzambì wàkamba ne: “*Ncinyangu.*” Pa nàнку Nzambì... Mòsà wàkasungula cìvwà Nzambì mwàmbe aci.

168 Mpindyewu, mònaayi, diitabuuja dìdì dimòna cìdì Nzambì muswè bwà wèwè kumòna. Nwamònu anyi? Diitabuuja dìdì dimòna cìdì Nzambì umòna.

169 Kàdi dilukakaja dyà lungènyi ne byumvwilu bìdì bimòna cìdì bàà pa buloba baswè bwà wèwè kumòna. Mònaayi dilukakaja dyà lungènyi: “*Mòna’s, s’cidi ànu cyumvwilu cyà buntu. Cidi ànu—ànu luumvu lulenga bwà cikampànda... cikansanga ne cidi... Èè, cikampànda eci kaciyèna ànu cìmpè mwinè anyi?*” Nwamònu anyi? Aci’s cidi ànu mu cyòci menemene, paùdì ukwàta mudimu ne byumvwilu bìdì bìbènganganà ne Dìyì abi, nwamònu’s, dìbà adi aci’s ki cìdì bàà pa buloba baswè bwà wèwè kumòna.

170 Kàdi diitabuuja kadyèna dītàngila ku aci to. Diitabuuja dyòdì dìdì dītàngila ku cìdì Nzambì mwàmbe. Nwamònu anyi? Nudi bamanyè’s, nudi nutònkola dilukakaja dyà genyi.

171 Dilukakaja dyà lungènyi, cyumvwilu cyà dilukakaja dyà lungènyi, cìdì cimòna cìdì bàà pa buloba baswè bwà wèwè kumòna: dingumba dinène. Èè, wèwè udi mwena Kilistò anyi?

“Kaa, mèmè ndi—mèmè ndi Presbytérien, Méthodiste, Luthérien, ne mwena Mpenta, ne bikwàbò ní mbinyi. Ndi *cikampànda, cikansanga, anyi cikankènga, wamònu’s.*”

Aci, s’ki byumvwilu mbyòbì abi.

“Mèmè ndi wa mu èkèleeziyà wa kumpàla, udi umòna’s. Kaa, mèmè ndi mwena Kàtòlikè. Ndi—ndi *cikampànda, cikansanga, wamònu’s.*”

Ki cyùdì wèwè wamba ncyòci aci. Mpindyewu, aci, aci’s ki byumvwilu mbyòbì abi. Udi muswè kwamba aci bwalu ndingumba, cintu kampànda cyà cinène.

“Èè, twètù—twètù—twètù tudi ne bidimba byàbùngì bipìte, pabwìpì ne, kutàmba èkèleeziyà kanà yònsò yà pa buloba, wamònu’s. Tudi...”

172 Kàdi kùdì Èkèleeziyà mulelèlè ànu umwèpelè, ne kwèna ukashààla wa Mwòmù to. Udi ulediibwaMù. Nwamònu anyi? Nènku wèwè mulediibweMù, Nzambì udi ne mwoyi ùdì Yèyè ùkwàcila mudimu kùdì wèwè, ne ùdìmanyisha Yèyè mwinè. Nwamònu anyi? Mwòmò amu ki mùdì Nzambì musòmbèlè, mu Èkèleeziyà Wendè. Nzambì ùtu ùya mu Èkèleeziyà dītùkù dyònsò, mwikàlè ànu ne mwoyi mu Èkèleeziyà. Yèyè ùdì ne mwoyi munda mwèbè. Wèwè udi Èkèleeziyà Wendè. Wèwè udi Èkèleeziyà Wendè. Udi Tabernacle ùdì Nzambì musòmbèlemù. Wèwè udi Èkèleeziyà wa Nzambì udi ne mwoyi, wèwè mwinè

awu. Ne piikalàbí ne Nzambì udi ne mwoyi ùdi ne mwoyi mu muntu Wendè udi ne mwoyi, díbà adi cyenzi cyèbè ncyà kùdi Nzambì; kabìyì nànkú to, díbà adi Nzambì kénamù to. Yèyè kí mmufwànyìnekù kukwenzeja maalu mùshindù awu to, pàdiYe wàmba mu Diyì emu, mu dizola Dyèndè edi ne: “Kùcyènji to,” kàdi wèwè ujuuka ucyènza. Nwamònu’s, abi mbibì. Paùdi ucivila, díbà adi’s bìdi bìleeja ne Mwoyi awu kawèna nànsha mene munda mwèbè to. Nwamònu anyì? Ncyà bushùwà.

<sup>173</sup> Diitabuuja dyàkalombola Mòsà ku kajila kàà ditùmikila. Mònaayi, Mòsà wàkenza. . . Kùdi Pàlò mutekète, kùdi Mòsà mutekète, bònsò bàbìdi bìikàle ne mpungà awu. Mòsà ùmòna bundù bwà cisàmbà, kàdi ùbùbala bu mabanji manène kutàmba ònsò àvwà naawu Ejiipitù. Nènku yèyè, mulombola kùdi diitabuuja, wàkalonda cìvwà diitabuuja dyèndè dyàmbe mu Diyì, ne dyàkamulombola ku kajila kàà ditùmikila, ne ndekeelu wa byònsò ku Butùmbi, kàyì wa ùfwa, kàyì mwà kufwàku to, mu Bwikadi bwà Nzambì. Lumònò ne byumvwilu, byàkalombola, ne dibàlakana, byàkalombola Pàlò ku lufù lwèndè, ne ku dibutuka dyà Ejiipitù, ditunga dyèndè adi, ne kadyàkaalukilaku kàbìdi to kubangila ànu piinè apu.

<sup>174</sup> S’ki bwalu mbwòbù abu. Wèwè mutàngile *eci*, udi ufwà. Wèwè mutangile Cyàcya, newikale ne mwoyi. Mpindyewu enzààku disungula dyèbè. Cintu cìmwècìmwè aci ncyàkatèèkà Nzambì kumpàla kwà Adàmà ne Evà, mu budimi bwà Edènà. Nwamònu anyì? Ku diitabuuja, nkùdi ne cyà kwenzela disungula dyèbè.

<sup>175</sup> Mpindyewu mònaayi, lumònò lwàkalombola Pàlò ku lufù lwèndè, ne ku dibutuka dyà cimenga cyèndè.

<sup>176</sup> Mòsà, ne diitabuuja dyèndè adi, kàakaciinakù Pàlò to. Nwamònu anyì? Kàakacyùkakù cyàkambà Pàlò aci to. Kàakatangakù Pàlò to, ànu mwàkadibi ne mamwèndè ne tatwèndè kabàakatangakù mikànù yàbò ayi to. Mòsà pààkashìndikiibwàbi kùdiye, ne yèyè nguvwa muntu uvwa ne cyà kusungila Ejiipitù. . . anyì kupatula Izalèlèlè mu Ejiipitù, yèyè kàakatangakù cyàkambà Pàlò aci to. Kàakamuciinakù to. Amen, amen, amen! Nudi bamòne cìndì muswè kwamba aci anyì?

<sup>177</sup> Kakùtukù bówà mu diitabuuja to. Diitabuuja ndimanyè aci. Diitabuuja, ànu múnkaadi mwambàmbè misangu yònsò, didi ne mapùndà manène menemene, ne butambu mu cyàdi. Diitabuuja dyòdi dyàmbe ne: “Bwikilaayi mukana!” bantu bònsò bàdi bàbwikila mukana. Kwàjiki. “Mèmè ndi mumanyè pàndì mwimànyine!”

Bakwàbò bàà kùdìbo bàmba ne: “Èè, nànkú, pàmwàpa mmumanyè’s.” Nwamònu anyì?

<sup>178</sup> Kàdi bìdi bikèngela bwà wèwè kuujuuka kuleeja mapùndà èbè awu. Kwàjiki. Ki citù diitabuuja dyènza.

179 Mònaayi, Mòsà kàakaciinakù Pàlò to paanyimà pàà Nzambì mumanè kushindika dibìikidiibwa dyèndè. Pàakiitabuujà Mòsà ne yèyè wàkabiikidiibwa bwà cyòci aci, kàdi pàakamwambilà Nzambì kuntwaku ne: “Bìdi nàнку,” ne kulwaye ne kudileeja kumpàla kwà Pàlò, ne kwà bakwàbò bònsò bàà kùdìbo abu ne, yèyè wàkatùmiibwa bwà kucyènzà, Mòsà kàakaciinakù Pàlò to.

180 Mònaayi, Pàlò wàkakwàta mudimu ne lungènyi lwèndè pa Mòsà, nànsha nàнку. Tàngilàayi. Wàkamba ne: “Nènkwabìlè mùdì bwalu, mèmè—mèmè nèngènzè neebè dyumvwangana.” Paanyimà pàà bipùpù bimanè kumudya yèyè yònsò, kwambaye ne: “Nèngènzè neebè dyumvwangana. Nudi nuya ànu bwà dikuukwila dikesè cyanààna, matùkù àsàtù. Nùyaayi ànu too ne mwaba kampànda, kàdi kanùyì ntàntà mupìte apu to.” Kàdi, nudi bamanyè’s, kùdì. . . Abi bivwa mbyumvwilu byà Pàlò bivwà bimwambilà nàнку abi, nwamònu’s: “Nùyaayi ànu too ne mwaba kampànda, kàdi kanùyì ntàntà mupìte apu to.”

181 Mùshindù awu katwenaku naawù leelù ewu anyì? “Bu wèwè mwà kushàalakù ànu wa mu èkèleeziyà cyanààna, abi’s mbìmpè.”

182 Kàdi, nudi bamanyè’s, diitabuuja divwà naadi Mòsà kadivwakù diitabuuja ntèdeleelu wa ne “too ne mwaba kampànda” awu to. Yèyè wàkamba ne: “Tuyàaya twètù bònsò. Tuyàaya too ne ku ndekeelu.” Ncyà bushùwà. “Tuyàaya ku buloba bulaya. Twètù katwèna tupàtuka ànu apa cyanààna kàdi kwenza dìngumba kampànda, ne kwimana nànsha. Tuyàaya too ne ku ndekeelu.” Amen. “Mèmè nyààya too ne ku buloba bulaya. Nzambì ngudi mutùlayè.”

183 Tudi ne ba-Pàlò bùngì kaayi leelù wa Ndaaya ewu biimane mu cyambilu, bamfùmù bàà malongolodi! “Mpindyewu, bu wèwè mwà kwenzaku ànu *cikampànda* cyanààna, ne kwenza *cikansanga*, s’nkujike. Èè, wamònu’s, ànu too ne mwaba kampànda.”

Kàdi Mòsà kwambaye ne: “Kaa, to! To, to! To, to!” Nwamònu anyì?

184 Pàlò kwambàye ne: “Èè, bwà cinyi nàнку? Pìikalàbi ne nudi baswà kupeta ntèdeleelu wa mùshindù awu, mèmè nènkwabìlè ciwènzà: Ànu wèwè ne bakùlù nùye kakuukwila, wamònu’s. Ànu wèwè ne bakùlù nùye kakuukwila. Bwalu, nwènù nudi mwà kupeta ntèdeleelu wa mùshindù awu, kàdi kùmubwejiku munkaci mwà cisàmbà to.”

185 Nudi bamanyè cyàkambà Mòsà anyì? “Kakwàkushàalakù nànsha cikòno paanyimà to. Twètù tuyàaya njila mujimà. Tuyàaya twètù bònsò! Mèmè ncyàkuya pìikalàbo bòbò kabàyi bàya to. Nèнку, bwà pàncìdì mèmè mwab’ewu apa, ndi ànu mukwela pambidi.” Amen. “Mèmè ncyàkuya pìikalàbo bòbò pààbò kabàyi bàya to, ne aci ki kwajiki.” Kaa, musadidi kaayi wa bukìtù’s wè! Amen. “Ndi muswè kubàngata kuya naabò.

Ànu bwalu mèmè ndi naaci, ne musòmbe ngàmbe ne: ‘Èè, mpindyewu, *cikampànda* eci ncìmpè?’ To, mukalenge. Tudi baswè ne bantu, pààbo. Yònsò wa kutùdì ùyaaya.” Amen. Kwambaye ne: “Katwàkushiyaku nànsha mùkòòkò wònsò, anyi ní ncinyi, paanyimà to. Kakwàkushàalakù nànsha cikòno paanyimà to. Tuyààya twètù bònsò ku buloba bulaya.” Amen!

<sup>186</sup> “Yònsò wa kutùdì! Nànsha wèwè mwikàle mukàji wa nzùbu, anyi nànsha mwikàle ka—kànà kàà bakàji keena mudimu, anyi nànsha wèwè mwikàle mukàji mununu, anyi nsongààlùmè, anyi muntu mulùme mununu, anyi cyònsò cyùdì aci, tuyààya, nànsha byà munyi. Kakwàkushàalakù nànsha umwe wa kutùdì to.” Amen. “Yònsò wa kutùdì ùyaaya, ne katwàkupangishaku cintu cikwàbò nànsha cimwè to.” Ncyà bushùwà. Ekèlekèle! Ntèndeleele ayi’s yìvwa ànu munkaci mwà dikòkangana kuntwaku, kì mmwòmò anyi? Kaa, ekèlekèle!

<sup>187</sup> To, Mòsà kàvwakù mwitàbuuje ntèndeleele wa ne “ànu too ne mwaba kampànda” ewu to. To, yèyè kaakiitabuujaku abi to. Huh-uh. Èyowà’s, mukalenge. Kaa, ekèlekèle!

<sup>188</sup> Tudi bafwànyìne kushààlapù ditùkù dijimà, kàdi bìdi bìkèngela nye ku cyena—bwalu cyànyì bwà paanyimà pàà katanci mbanje kuyiisha.

<sup>189</sup> Mònaayi, mònaayi eci, mùdici cilenga cyà dikèma! Kaa, ndi munange aci. Nudi bamanyè’s, ki ndekeelu wa byònsò, Pàlò kwambayè ne: “Pàtukààyi!” Nzambi ùvwa ùfuma ku dimutuuta bipùpù, ku dīyī dya Mòsà. Ùvwa mutuute bintu byònsò. Yèyè wakenza cyònsò civwaku ne cyà kwenjiibwa aci. Yèyè kwimanyika... yèyè kubweja dībà, mu nkànkala wa muunya. Yèyè kwenza bikwàbò byònsò. Yèyè—yèyè kwidisha butùkù mundaamunya. Kutwàlayè ndimbà, nkùpà, nkùsù, bikwàbò byònsò, kapyà, mwìshì, ne lufù mu mèkù èndè, ne bikwàbò byònsò. Kwenzaye byònsò mu mùshindù wa ne, ndekeelu wa byònsò, Pàlò kwenzejiibwayè bwà kwamba ne: “Pàtukààyi! Angàtaayi byònsò binùdì naabi, kwata njila ndàayi.” Kaa, ekèlekèle! Butùmbi bwikalè kùdì Nzambi’s wè!

<sup>190</sup> Ndi ne disànka dyà ne muntu ùdì mwà kukwacila Nzambi mudimu ànu mu kaabujimà nànkù menemene mu mùshindù wà ne yèyè, dyabùlù, kàyì ùmanya cidì mwà kwenza nendè to. Ncyà bushùwà. Yèyè wàkatùmikila Nzambi ànu mu kaabujimà menemene mu mùshindù wà ne dyabùlù kwambayè ne: “Kaa, ekèlekèle, nkàtùkilè apa! Ncyèna—ncyèna muswè kubitèeleja kàbìdì to.” Ncyà bushùwà. Wèwè’s udi mwà kucyèna, ànu mu kaabujimà menemene.

<sup>191</sup> Mònaayi mpindyewu, bu ne—bu ne Nzambi kàvwa mutwè Mòsà nyamà ku mikòlò to, dībà adi’s yèyè ùvwa ùshààla kadingidingi kàà kusekabò. Kàdi Nzambi ùvwa mwaba awu mene, munkaci mwà kushìndika. Byònsò bìvwayè wàmbe, bìvwa byènzeka.

192 Nènkù bìvwa bikèngela bwà Pâlò kushààlayè mwele nzadi mu kaaba kèndè, bwalu yèyè ùvwa mwèpiskòpò, nudi bamanyè's, pa nànkù kukèngelabi bwà yèyè—yèyè kushààla mwaba awu. Kàvwakù mufwànyine kuvila to. Kàvwakù mufwànyine kwamba ne to nànsha, bwalu cikaavwa munkaci mwà kwenzeka. Nwamònu anyi? Kàvwakù mufwànyine—kàvwakù mufwànyine kucivila to, bwalu cikaavwa munkaci mwà kwenzeka. Ki ndekeelu wa byònsò kwambayè ne: “Kaa, anji ànu kupàtuka! Ncyèna muswè kukutèeleja kàbìdì to. Pàtukà mwab'ewu! Angàtaayi byònsò binùdì naabi, kwàtaayi njila ndàayi!” Kaa, ekèlekèlè!

193 Mpindyewu tudi tusangana Mòsà, mwab'ewu, paanyimà pàà Nzambì mumanè kumwenzela bintu bipite bùngì, ne mumane kumuleeja bimanyinu ne maalu àà kukèma bùngì cyanààna. Mpindyewu, mu tusunsa dikumi ne tùtaanu tùdì tùlondà etu, twànjàayi kwadija cyòci eci kaaba aka. Nènkù tàngilààyaaku ne ntèmà yà menemene. Mòsà kufikayè pa kaaba aka pàvwàye. . .

194 Nzambì ùvwa mwàmbe ne: “Mémè ndi neebè. Mèyi èbè àdi Dìyì Dyànyì. Ngàkujaadikidici, Mòsà. Wèwè, pàvwàku kakùyì njiji mu ditùnga, kabìvwa mu cikondo cyàyì to, kàdi wèwè kwamba ne: ‘Kùlwe njiji,’ ne kulwaku njiji.” Aci's ndifuka's. Nganyì udi mwà kukùlula mîdimà pa buloba, pa kuumusha Nzambì? Kwambayè ne: “Kwikalè mîdimà,” ne kwikalaku mîdimà. “Wèwè kwamba ne: ‘Kwikalè ndimbà,’ ne ndimbà kubwelayi too ne mu nzùbu wa Pâlò, mu malààlu, ke pàakayùngwijàbo mishiki minène.” Mufùki's! “Nènkù Mémè kwakwila kùdì wèwè, Mòsà, ne—ne kwenza ne Dìyì Dyànyì difùkilè ku mishikù yèbè aku. Ndi mukuvwije nzambì ànu cyà bushùwà kumpàla kwà Pâlò.” Èyowà's, mukalenge. “S'Ndi mwenze byònsò ebi.”

195 Nènkù kufikabò mwab'ewu pa kaaba kàà ne, diteeta dikesè kjujukadi, ki Mòsà kubangayè dyela mbilà ne: “Nèngènzè cinyi?”

196 Ndi muswè bwà nùmòne. Edi ndileesònà dinène kaaba aka mpindyewu. Mémè ndi munange cyòci eci, nwamònu's. Nwamònu's, Mòsà, twètù babalè mu mùshindù mwimpè kaaba aka, bwà ne Mò- . . . Dìbà adi, bânà abu kubangabò kupeta bôwà, pàakamònàbo Pâlò wènda ùlonda, mu njila wa mudimu amu.

197 Nzambì ùvwa mwenze byònsò mu mùshindù mupwàngàne. Mpindyewu Yèyè kubàashisha lwendu. Kusangisha ekèleeziyà kaaba kàmwè. Bàkaavwa babìkidiibwe bwà kupàtuka. Bàvwa bafùmìne mu dìngumba ne dìngumba dyònsò. Bàakadisanga bònsò. Mòsà wàkaalukila paanyimà apu, e kwambayè ne: “Mukalenge, cìndì ne cyà kwenza ncinyi?”

198 Yèyè's ùvwa mufwànyine kwamba ne: “Èè, nda kenza *cikampànda*.” Èyo, tùngunuka. “Mpindyewu, Mòsà, wèwè's udi mumanyè ne Ndi mukubiikile mbwà kwenza cyòci eci.”



“Èyowà’s, Mukalenge.”

199 “Èyo, nda wàmbe *cikampànda*, ne necyènzekè,” ki njiiji eyi pwàà. “Akùlà bwà *cikansanga*,” ki cyôci eci pwàà. “Enzà *cikankènga*,” ki cyôci eci pwàà. Byònsò bivwa EMU MMÙDÌ MUKALENGE WÀMBA, EMU MMÙDÌ MUKALENGE WÀMBA, EMU MMÙDÌ MUKALENGE WÀMBA! Mpindyewu kubwelaye mu lutàtu kampànda. . .

200 Ki Nzambì kwamba ne: “Mpindyewu nyèwù Ngăbăshishì lwendu. Bònsò mbamanè kubiikidiibwa bwà kupàtuka. Èkèleeziyà ùkaadi kaaba kàmwè, pa nàнку Ngăbăshishì lwendu. Mpindyewu, Mòsà, ndàaku naabò kuntwaku. Mèmè ngudi mukwambile bwà kucyènzà. Nêngánjì kusòmbela panshì bwà kwikishaku ndambù.”

201 Mòsà kwambaye ne: “Èyì Mukalenge, tàngila cìlwalwà cyàcya, s’ki Pàlò ulwàlwa ewu! Bantu bàdi bònsò. . . Cìndì ne cyà kwenza ncinyi? Cìndì ne cyà kwenza ncinyi?” Mònaayi kuntwaku, bàba kí mbantu bèètù aba anyi? Èyowà’s, mukalenge. Kubangaye kwela mbilà ne: “Cìndì ne cyà kwenza ncinyi?”

202 Mwaba ewu tudi tumòna Mòsà ùpàtula patòòke, ngiikadilù ànu wetù wa buntu ewu ànu pa yèyè, ùkèba misangu yònsò ànu bwà Nzambì àpìte paanyimà pèèbè ne àkusake mu cintu kampànda. Mpindyewu, s’ki twètù abu leelù ewu. Udi muswè bwà Nzambì, paanyimà pàà twètù bamanè kumòna byònsò bitùdi bamòne ebi, nànsha nàнку wèwè udi ànu muswè bwà Nzambì àkusàkè bwà kwenza cintu kampànda. Nwamònu anyi?

203 Mòsà kwanjiye kupeta ànu kalèngù, kwambayè ne: “Nzambì, nêngánjì kuKukonka, mmonèbi cyùdi Wèwè wamba. Èyowà, èyowà, Wèwè ùcyàmba. Èè, èyo, nèncyàmbè pàànyì.” Nwamònu anyi?

204 Kàdi mwaba ewu Nzambì ùvwa mumujidile bwà mudimu awu, mujaadike ne Yèyè ùvwa nendè. Kàdi ki yèyè ewu’s, bwalu abu kudikùma panshi, ne díbà adi yèyè kubanga kwela mbila ne: “Cìndì mwà kwenza ncinyi? Mukalenge, cìndì mwà kwenza ncinyi?”

205 Mpindyewu nudi bavùlùke ne, yèyè ùkaavwa mumanè kwamba cipròfetà kaaba aka, bwalu ùvwa mwambe ne: “Beena Ejiipitù banùdi numòna leelù ewu aba, kanwàdyàkubàmònakù kàbìdi to.” Kàdi pashiishe ùbanga dyàkàmwè kwela mbila ne: “Nzambì, cìndì mwà kwenza ncinyi?” Nwamònu anyi? Paanyimà pàà yèyè mumanè kwenza mudimu mulenga wà dikèma mu kwamba kwà cipròfetà mwaba awu. Nudi numòna’s, pèndè mumanè kubàmbila civwà mwà kwenzeka’s. Pìikalàbi ne Díyì dyà Nzambì òvwa munda mwèndè, Divwa munda mwèndè. Ne pàvwàye munkacì mwà kwamba cyôci aci apu, s’cyàkenzeka ànu cyà bushùwà. Cìvwàye mwambe cikaavwa cimanè kwikala cyènda cikùmbana, kàdi’s ki yèyè awu munkacì mwà kwela mbilà ne: “Cìngìkalà mwà kwenza ncinyi?”

206 Kaa, piikalà aci kaciyi ngenzèlù wa bantu bèètù bàà maci ne mèsù aba! Piikalà aci kaciyi mémè's! Piikalà aci kaciyi mémè ewu! Nwamònu anyi?

207 Yèyè's ùkaavwa mumanè kujaadika ne: "Ciwàmbà aci necyènzèkè. Mémè Ndi neebè."

208 Kàdi ki bwalu ebu kukùtuka musangu wùmwe. "Cìndi ne cyà kwenza ncinyi? Cìndi ne cyà kwenza ncinyi, Mukalenge? È, Mukalenge, Wèwè udi penyi? È, Udi muntèèlèje anyi? Cìndi ne cyà kwenza ncinyi?" Ne Yèyè ùkaavwa mumujidile yèyè mu mudimu, ne mumushìndike, ne mumujaadike ne mwenzèle bintu byònsò kùdiye yèyè aku. Kàdi apa ne: "Nzambì ee?" Kaa, ekèlekèlè! Ùjikula patòòke, muntu mmuswè bwà yèyè kwikisha ne kulekela Nzambì ùmusàka.

209 Kàdi, pààbì, yèyè's ùvwa mumanyè ne Nzambì ùvwa mumwele maanyi bwà wòwò mudimu ewu, bwà kuwènzayè, ne Nzambì ùvwa mushìndike mèyì èndè bitòòke tòò. Dìbà dikaavwa dikùmbàne bwà cisàmbà kusùngidiibwaci. Nzambì, ku bimanyinu byèndè ne maalu à kukèma, ùkaavwa mubàkòke bònsò mubàsangìshe kaaba kàmwe mu cisumbu cìmwèpelè. Nudi nundonda anyi? Mubàsangìshe bònsò kaaba kàmwe mu cisumbù cìmwèpelè, mushìndike mèyì èndè. Mifundu nyidì myàmbe nànkù; s'ki cimanyinu cìvwàpu eci, s'ki cileeeji cìvwàpu eci kaaba aka, byònsò byàkambàye abi. Pashìshe kulwayè munkaci mwàbò bu mupròfetà. Misangu yònsò, cyònsò cìvwàye wàmba, Nzambì ùvwa ùcìtwa musinga, nànsha kufùka ne kupàtula njijji, ne kutwàla bintu ku diikalakù. Ne byònsò bìvwàYe mumulayè, s'ki Yèyè wabyènji ewu.

210 Kàdi yèyè ùvwa muswè kwikala mwindile EMU MMÜDÌ MUKALENGE WÀMBA. Nwamònu anyi? S'biwwa bikèngela bwà kwikalayè mumanyè ne dishìndika diinè dyà dibìikidiibwa dyèndè adi òvwa ng'EMU MMÜDÌ MUKALENGE WÀMBA. Mudimu wèndè wùvwà mumulongolwela awu wùvwà EMU MMÜDÌ MUKALENGE WÀMBA. Nudikù mwà kucyùmvywa anyi? Hmm! Mbwà cinyi bìvwàye wìndila EMU MMÜDÌ MUKALENGE WÀMBA?

211 Yèyè ùvwa muswè byà ne: "Mukalenge, cìndi mwà kwenza ncinyi? S'ki mémè wapàtulu bânà aba kaaba aka ewu, too ne mwaba ewu. Bwalu bùdi bwenzèke's mbwòbù ebu, Pàlò nyèwù wìya. Bònsò's nebàfwe. Cìndi ne cyà kwenza ncinyi? Cìndi ne cyà kwenza ncinyi?" Hum! Hum!

212 Yèyè ùkaavwa mudyànjlile kwamba cìvwàbò mwà kwenza. Ùkaavwa mumanè kwamba ànu menemene cìvwà bwalu, bwà kucyènza. Ùkaavwa mudyànjlile kwamba ndekeelu wa ditùnga diinè òvwàye mukolèshìibwemu adi. Ndi ntèkemena ne nudi numvwa's. Huh? Mòsà ùkaavwa mumanè kwamba ne: "Kanwàkubàmònakù kàbìdì to. Nzambì neikalè mwà kubàbùtula. Bòbò bânwélulwidì ntàntà mule byàkumbanyi.

Nzambi neàbàbùtùlè.” Yéyè ùkaavwa muddyànjile kwamba civwà mwà kubènzekela.

213 Pashìishe ne: “Mukalenge, cìndi ne cyà kwenza ncinyi?” Nudi numòna ngiikàdilù wa buntu mwaba awu anyi? Nwamònu anyi? “Cìndi ne cyà kwenza ncinyi? Nèngìndilè EMU MMÙDÌ MUKALENGE WÀMBA.” Èyowà’s, mukalenge. “Nèmmonè cidi Mukalenge wàmba, pashìishe, nèncyènzè.” Huh!

214 Vùlukààyi ne, kùvwa kujuuke pâlò kampànda uvwa kàyì mumanyè Yòzefù to, nudi bamanyè’s, mu cikondo aci, ànu pa dìbà adi mene. Nwamònu anyi? Nwamònu anyi? Ki Mòsà kujuuka buludi e kudyànjila kwamba ndekeelu wa ditùnga adi.

215 Kàdi’s ki yéyè ewu usanganyiibwa ànu mu mwaba mene wùvwà wùkèngelà bwà kwenzekaci, dìbà adi kwelaye lubila ne: “Cìndi ne cyà kwenza ncinyi, Mukalenge? Cìndi ne cyà kwenza ncinyi?” Nwamònu anyi? Aci kì mmùtù bantu bèètù bàà maci ne mèsù aba anyi? Aci kì ng’ànù ngiikàdilù wa buntu ewu anyi? “Cìngènzà ncinyi?” Huh!

216 Yéyè, ùkaavwa mumanè kwamba cipròfetà. Nzambi ùkaavwa mutwàtwàtwe mushinga byònsò bìvwàye mwàmbe, ne yéyè ùvwa mubiikidiibwe bwà mudimu awu, pa nàнку mbwà cinyi bwàkàkèngelàbi bwà kwambayè ne: “Cìndi ne cyà kwenza ncinyi?” Kùvwa dikèngela kampànda; bwalu bùvwa ànu bulààle kùdiye yéyè bwà kucyàmbayè. Nzambi ùvwa muswè bwà ne Mòsà ateeke dipà dya diitabuuja, divwàYe mumupèèshe adi, ku mudimu. Nzambi ùkaavwa mudishindike. Divwa Bulelèlè.

217 Ne Nzambi ùvwa muswè bwà Mòsà, muswè bwà bantu kumònabò ne, Yéyè ùvwa ne Mòsà.

218 Nènku yéyè, paanyimà pààpa, kwindilayè: Wàmba ne: “Mpindyewu, Mukalenge, mèmè ndi ànu mwànà wa mu dibòko, ndi ndekela bwà Wèwè ùngambilè mpindyewu. Èyowà, mèmè nènye kenza *cikampànda*. Ndi ne EMU MMÙDÌ MUKALENGE WÀMBA.”

“Mwanèètù, aci ng’EMU MMÙDÌ MUKALENGE WÀMBA anyi?”

“Èyowà’s, èyowà’s, Mwanèètù Mòsà, aci’s ng’EMU MMÙDÌ MUKALENGE WÀMBA. Èyowà’s.”

“Èyo, bwà mpindyewu kaayi twacyümvù, EMU MMÙDÌ MUKALENGE WÀMBA.”

219 Ki kwenzekaci. Kacya kacyàkapangilaku musangu nànsha wùmwè to. Kacyàkapangilaku to.

220 Kàdi’s ki cyòci eci mu maalu àdi enzeka, cijjuuke cyàkàbìdì. Mpindyewu Yéyè mmumutèèke mu lwendu. Èkèleeziyà ùkaadi mumanè kubiikidiibwe bwà kupàtuka, mubàtèèke mu lwendu, ne bòbò bàyaaya kumpàla. Ki Mòsà kubanga kwela mbilà ne: “Mukalenge, ng’EMU MMÙDÌ MUKALENGE WÀMBA anyi? Cìndi ne cyà kwenza ncinyi?” Èyo.

221 Nzambì ùvwa muswè bwà Mòsà kwikalaye ne diitabuuja, divwàYe mutèèke munda mwèndè adi, mu dipà dikaavwàYe mumanè ku—kushindika bitòòke tòò adi. Nzambì ùkaavwa mujaadikile Mòsà ne bantu bitòòke tòò ne ùvwa n'Yèyè, ku Dìyì ne ku bintu bikaavwà byambiùbwe bwà kwenzekabi. Cìvwa cimanyishùbwe bitòòke tòò. Kakùcìvwa kàbìdì bwalu bwà yèyè kutacishila meeji bwà cyòcì aci nànsha. Nwamònu anyi? Kakùcìvwa kàbìdì bwalu bwà kwelayè meeji pa ní ncinỳì ní ncinỳì bwà bwalu abu to, bwalu cikaavwa cimana kutòòkesha. Yèyè ùkaavwa mumanè kwenza bintu ebi. Ne yèyè ùkaavwa mumanè kujaadika, ku njiji ne nkùpà, ne yèyè ùvwa ùfùka bintu ku dyamba dyà dìyì, ne Dìyì dyà Nzambì divwa munda mwèndè.

222 Nènku ki yèyè uyààya kakonka mpindyewu cyà dyenza ewu, pàdì maalu àdì enzeka awu àsanganyibwa kumpàla kwèndè mene. Nwamònu anyi? Kaa, ekelekele!

223 Ndi ntèkemenà ne eci cìdì cipweka ànu menemene munda mwètù, ne twètù netwikalèku mwà kumòna mwaba wutùdì. Nwamònu anyi? Kacyèna cinufikishaku ku didyùmuvwa bunèna *nùnku* anyi? Patùdì twela meeji bwà Mòsà tulonda bilèmà byèndè apa, kàdì tàngilàayi byètù twètù. Èyowà's. Nwamònu anyi?

224 Ki yèyè awu kaaba aku, mwimàne mwaba awu, nwamònu's, mumanyè ne Mifùndu yivwa yàmba ne ki dìbà adi ne ditùkù bwà cyòcì aci kwenzekaci, ne mumanyè ne Nzambì ùvwa mutuutàkèene nendè mu Dikunji dyà Kapyà. Ne Dyòdì dyàkaya buludi kumpàla kwà cisàmbà ne dyàkenza bishimà ebi. Ne cyònsò cìvwaye yèyè wàmba, cìvwa cyènzeka, nànsha mene too ne ku difikisha dyà bintu ku difùkiibwa. Mwikàle wènza bintu bìvwà ànu Nzambì nkàayèndè mwà kwenza, biikàle bìleeja ne dìyì dyèndè divwa Dìyì dyà Nzambì.

225 Nènku ki bwalu mbwòbù ebu bùvwà bwènzekà ne cisàmbà cìvwaye ujuula aci, ùya naaci ku buloba bulaya, ki pashìishe kushàalayè mwimanè, wèla mbilà ne: "Cìndì ne cyà kwenza ncinỳì?" Awu's muntu's, ùkèba ànu bwà. . .

226 Mùvwà Mwanèètù Roy Slaughter, ngeela meeji ne yèyè mmusòmbe pambèlu pàà ciibi pààpa, ùngambila musangu kampànda, bwà muntu uvwa ungenza cintu kampànda. Ki mèmè kwamba ne: "Èè, mèmè ntu mwenze *cikampànda*, mpindyewu ki cyòcì aci."

227 Kwambaye ne: "Mwanèètù Branham, bàlekèle bèyemene pa dikaaya dyèbè leelù, nènku màalabà neùbàmbùlè." Nènku aci's ki mùshindù menemene wùdì bantu. Bèyemena pa dikaaya dyèbè leelù, ne màalabà wèwè kubàmbula.

228 Ki cyòcì aci, ki cìvwa Mòsà wènza ncyòcì aci. Byàkakèngela bwà Nzambì àmwambùlè mu lwendu lwònsò amu paanyimà pàà Yèyè mumane kumujidila mu mudimu ne mumujaadikileci bwà kucyènza. Ne bivwa bikèngela bwà bantu kwikalabò bambe

ne: “Mòsà, amba díyí’s. S’nkAADIKU mukumòne ucyènza kuntu *kwàka*. Nzambì’s ùvwa mukutwè musinga kuntu kwàka, ne wèwè’s udi ùmwèùm wè awu leelù ewu.” Amen. Nwamònu anyi? “Cyènzaàku’s!” Amen. Bìvwa bìkèngela bwà kwikalaye mucimanyè, kàdi kàvwa mucimanyè to. Èyo. Ànu menemene mwàkadibi musangu awu, ki mùdibi kàbidi mpindyewu. Tudi tucijandula, nàнку awu. Pa nàнку Yèyè kwamba ne: “Mò- . . .”

<sup>229</sup> Bìvwa ne cyà kwikala ànu bitonde Nzambì. Bìvwa ne cyà kwikala bifìkile ne Nzambì ku mwoyi. KwambaYe ne: “Udi wela mbilà kùNdi bwà cinyi? Ncyènàku mumanè kujaadika dimanyishiibwa Dyànyì anyi? Ncyènàku mukwambile ne Ndi mukutùme bwà mudimu awu anyi? Ncìvwakù mukwambile bwà kuya kenza cyòci eci anyi? Ncìvwakù mulaye ne Nèngènzè cyòci eci, ne Nèngìikalè ne mukana mwèbè, ne Nèngààkwilè kùdi ne Nèngènzè cyòci eci, ne wèwè neùleejè bimanyinu ne maalu à kukèma anyi? Ncìvwakù mulayè bwà kucyènza anyi? Ncyènàku mwenze ànu menemene, ne mubùtùle mwena lukuna yònsò mu nyungulukilu webè anyi? Kàdi’s ki wèwè ewu mwimàne kaaba aka mpindyewu, ku Mbù Mukúnze eku, mu njila wa mudimu mene, címvwà Mémè mukwambile bwà kwenza aci, kàdi pashìishe mutùngùnùke ànu ne kwela mikunda ne kwela mbilà kùNdi. Kwèna uNgiitabuuja anyi? Kwènàku mwà kumòna ne Ndi mukutùme bwà kwenza cyòci eci anyi?” Kaa, aci cyòci kaciyi muntu’s! Ekèlekèle! Pa nàнку bìvwa ne cyà kwikala biMufìkile ànu ku mwoyi menemene.

<sup>230</sup> Ki Yèyè kwamba ne: “Wèwè’s udi mumanyè ne ki cidi cikukèngela. S’udi mumanyè ne pawìkalà mwà kuya ne bânà aba ku buloba bulaya abu, ncyòci menemene, nyèwù ukàadi mucìncimikila mu ditumba emu, kakùciyikù cintu cikwàbò nànsha címwè cyùdi mwà kwenza to. Pa nàнку’s kùdi dikèngela kampànda. Cyùdi welela mbilà kùNdi ncinyi? Cyùdi utàngidila kùNdi ncinyi? Cyùdi uMbìikidila ncinyi? Ncyènàku mucijaadikile bantu anyi? Ncyènàku mukujaadikileci wèwè anyi? Ncyènàku mucibìikile anyi? Kì ncyà mu Mifundu anyi? Ncìvwakù mulayè bwà kuya ne cisàmbà eci ku buloba abu anyi? Ncìvwakù mukubìikile mukwambile ne Nèncyènzè anyi? Ncìvwakù mubìikile mwàmbe ne Mvwa mukutùme bwà wèwè kucyènza, bwà ne kàvwa wèwè to, ùvwa m’Mémè anyi? Ne Mvwa mwà kuyaku ne Mvwa mwà kwikala ne mishìkù yèbè, ne cyònsò cyùvwà wamba, Mvwa mwà kucìshindika ne kucijaadika. Ncyènàku mucyènzè anyi?

<sup>231</sup> “Dìbà adi, kantu kakesè kanà kwònsò kòkò ànu kajuukè, udi wenza maalu bu mwànà wa mu dibòko bwà cinyi? S’bìvwa bìkèngelaku bwà wèwè kwikala muntu mukolè. Akula ne cisàmbà,” amen, “pashìishe nda kumpàla!” Amen. S’ki bwalu mbwòbù abu. “Kwèdi mbilà to. Akùlà!” Amen. Kaa, ndi muswè aci. “Cyùdi welela mbilà kùNdi ncinyi? Akùlà ànu cyanààna ne cisàmbà ùye kumpàla mutàngile ku kiipàcilà kèèbè. Nànsha

ciikàle cinganyi, cyôci ciikàle bubèèdi, anyi ní ncinyi cyônsò, kubiisha kwà bafwè, anyi ní ncinyi cyônsò, akùlà! Mémè's nkàadi mucijaadike. Akùlà ne cisàmbà.”

<sup>232</sup> Dileesònà kaayi's wè! Dileesònà kaayi's wè, kaa, ekèlekèle, mu eci citùpà cyà lwendu mutùdi biimànyine emu. Tàngilàayi mwaba wutùkaadi tusanganyiibwa patùdi twakulangana apa, èyowà's, mukalenge, ku Nkòkelu Mwisàtù. Mònaayi, tudi tusanganyiibwa apa mene, ku ciibi cyà Dilwa dyà Mukalenge.

<sup>233</sup> Yèyè ùvwa mwedibwè maanyi bwà mudimu awu, kàdi mucikàle ànu mwindile EMU MMUDÌ MUKALENGÈ WÀMBA. Bivwa ànu ne cyà kwikala bitonde Nzambi. Yèyè kwamba ne: “Kwedi kàbidi mbilà to. Akùlà! Mémè ngudi mukutùme.”

<sup>234</sup> Éyi Nzambi wa yààya, cìvwa cikèngelà bwà Èkèleeziyà ewu kwikalaYè mu dindà emu aci's wè! Mwikàle ne dishindika dipwàngàne dyà Nzambi, mwikàle ne Dikunji dyà Kapyà ne bimanyinu ne maalù à kukèma, byônsò ànu mùvwàbi mu matùkù à Sodoma amu. Yèyè's mmwambe ne nebyàlukilè.

<sup>235</sup> S'ki buloba mbwòbù ebu mu ngiikàdìlù wabù awu. S'ki ditùnga ndyôdi adi mu ngiikàdìlù wadi awu. S'ki bakàjì mbwòbò abu mu ngiikàdìlù awu. S'ki balùme mbwòbò abu mu ngiikàdìlù awu. S'ki èkèleeziyà nyèyè awu mu ngiikàdìlù awu. S'ki bintu byônsò mbyòbi abi. Bintu, bimanyinu, tuumàlòngò tùdi tùbùuka muulu ne bikwàbò byônsò mu maulu, ne bintu byà mìshindù yônsò byà kabiyi byùmvwika abi, ne mbù ukungula, mavwala à màyi à mbù, myoyi yà bantu yàmba kwimana munda, bôwà, dipampakana dyà cikondo, dikènga munkaci mwà matùnga, èkèleeziyà ùpidya diitabuuja.

<sup>236</sup> Ne muntu wa mpèkaatù ùjuuka, yèyè udi mudibàndishe kumutù kwà cyônsò; cìdìbo babiikila ne n'Nzambi aci, yèyè udi musòmbe mu ntempèlu wa Nzambi awu, ùdileea yèyè mwinè, kaa, ekèlekèle, kàdi's mmulwe mu ditùnga edi. Ne èkèleeziyà ùkaadi mudivwije bulongolodi, ne yônsò yikaadi midisange pàmwè, bu ndumba milela kùdi mukàjì wa masandi, ne byônsò menemene ànu mu njila wa bundumbà.

<sup>237</sup> Bundumbà, ncinyi? Kwambila bakàjì ne bàdi mwà kukòsa nsuki yàbò, kwambila bakàjì ne bàdi mwà kuvwàla tùpùtulù, kwambila balùme ne bàdi mwà kwenza *bikampànda* ne bàdi mwà kwenza *bikansanga*; ne bayiishi, bàdi bènza *bikampànda* abu, ne èvànjeeliyò wa nsòmbelu mulenga ne bikwàbò. Kanwènaayikù numòna anyi, aku's nkwenda kwà masandi ne Dìyi dyà Nzambi dilelèlà!

<sup>238</sup> Nènku Nzambi mmutùtùmine Dìyi Dyèndè dilelèlà, dibèngangana ne màngumba, kadiyi ne myonji miDiswike to, ne mutùpèeshe Dikunji dyà Kapyà, Nyumà Mwîmpè udi neetù mpindyewu awu kùkaadi bidimu makumi àsàtù. Ne byônsò bitùYe mudyanjile kwamba ne mwambe abi, mbyenzèke ànu menemene mùshindù wùvwàYe mubyàmbè.

239 Akùlà ne cisàmbà, ne tuyaayi kumpàla. Amen. Twétu tudi ne kiipàcìlà, m'Butùmbi. Tuyaayi batàngileKù. Twétu tuyaàya batàngile ku Buloba bulaya. “Bintu byònsò bìdi mwà kwenzeka bwà aba bàdi bìtabuujà.” “Akùlà ne cisàmbà. Mémè ncyénàku mucijaadike anyi? Ncyénàku muDikwàcishe mene ne fòtò munkaci mwènù, ne bikwàbò byònsò, ne mwenze byònsò bìvwà mwà kwikala byenjiibwe, bwà kujaadika ne Ndi neenù anyi? Bikàndàkàndà, ànu mbingu mikesè yìdì panshì eyi, kì mbipàtùlekù bwalu abu, paùvwà mwambe ku cyambilu eku cìvwà mwà kwenzeka kaaba aka, ne ciine aci ngondo yisàtù kumpàla, ne kuyabi byènda byènzeka ne bìshìndikiibwa anyi? Nànsha beena maalu à mamanya mbamanyè bwalu abu. Ne byònsò bìNdi mwenze abi, kàdi wèwè uciidi ànu mwindile. Akùlà ne cisàmbà ùye kumpàla ku kiipàcìlà kèèbè.” Amen.

240 Naatànà kààkambilakù Davidi anyi? Naatànà, mupròfetà, musangu kampànda musòmbe, mumòne Davidi mfùmù mwela maanyi awu, kwambayè ne: “Enzà cyònsò cìdi mu mwoyi wèbè, bwalu Nzambi ùdi neebè.” Kwambilayè Davidi ne: “Enza cyònsò cìdi mu mwoyi wèbè. Nzambi ùdi neebè.”

241 Yoshùwà ùvwà mwediibwe maanyi bwà kukwàtayè buloba abu bwà Nzambi ne bwà cisàmbà cyèndè. Ditùkù dyàkiipidika. Bìvwà bìmukèngela díbà dyàbùngì bwà mudimu wùvwàye mwediibwe maanyi ne mutùmìibwe naawu bwà kwenza awu. Yoshùwà, muntu, ùvwà mwediibwe maanyi. Nzambi ùvwà mumwambile ne: “Ànu múMvwà ne Mòsà amu, ki mùNgiikalà neebè.” Amen. “Buloba abu, Nèngìikalè mwà kubapèeshabù. Nènku Ndi muswè bwà wèwè kuyamù bwà kukòmba beena Amàlèkà, ne—ne beena Hit—. Bakwàbò bònsò—bònsò abu, beena Pelèshèètè ne—ne beena Pelèsà, ne bònsò bashiilèshìilàngàne abu, bwà kubàkòmba bònsò. Mémè ndi neebè. Nèngìikalè. . . Muntu nànsha umwe kààkukukàndàmeena nànsha, matùkù èbè ònsò à mwoyi. Muntu nànsha umwe kèna mwà kukutàcishakù to. Tùngunuka ùkabwele muntwamu.”

Ki Yoshùwà kupàtula mwele awu mu cimànga ne kwamba ne: “Ndondàayi!”

242 Ki kufikaye muntwamu, ne ki yèyè udi ulwangana mvità ewu. Kàdi cìvwà ncinyi? Kutangalajayè balwishi e kuyabo bimpàmbàmbà. Kushàalabo tusùmbu tukesè *apa* ne tusùmbu tukesè *pàapa*. Pàvwà bufùkù mwà kulwa, bàvwà bafwànyine bònsò kudisanga ne kudyènta cimùkù, kàdi kulwa kumulwisha ne bukolè bunène. Nènku díbà dikaavwa dìya kabwela. Bìvwà bìmukèngela bukwàbò bukènkè bwà díbà. Díbà dikaavwa dìya kabwela. Yèyè kààkatwà binù kwamba ne: “Mukalenge Nzambi, nèngènzè cinyi? Nèngènzè cinyi to?” Yèyè wàkaakula! Ùvwà ne dijinga kampànda. Wàkamba ne: “Wèwè díbà, imànà kaaba kàmwè!” Kààkeelakù mbilà ya cyanàànà ayi to. Wàkatùma dìyi ne: “Wèwè díbà, imànà kaaba kàmwè! Ndi ne dijinga dyà cyòci eci. Ndi musadidi wa Mukalenge, mwela maanyi bwà mudimu

ewu, ne ndi ne dijinga kampànda. Imànà kaaba kàmwè, ne kufidiku nsèsà . . . Ne wêwè, ngondo, shààla mulembèlèlè ànu mwaba wùdì awu,” too ne mwàkalwanganàye mvità ayi too ne ku ndekeelu ne kucìmunayè cintàkanyì cyònsò aci nkòong. Ki dībà pààdì kumutùmikiladì.

<sup>243</sup> Kakùyì byà dyela dyà mbilà abi to. Yèyè wàkaakula ne dībà, wàmba ne: “Imànà kaaba kàmwè. Wêwè dībà, shààla mulembèlèlè mwaba awu! Ne wêwè, ngondo, shààla mwaba wùdì awu.” Kààkeelakù mbilà ne: “Mukalenge, mpindyewu cìndì mwà kwenza ncinyì? Mpèeshèku bukwbò bukênkè bwa dībà” to. Ûvwa dijinga ne bukênkè bwà dībà, pa nàнку yèyè kudùtuminaye dīyì, ne dībà dyàkamutumikila. Kaa, ekèlekèlè! Yèyè wàkatùmìna dībà dīyì bwà kwimanadi kaaba kàmwè.

<sup>244</sup> Shimishòònà, mwela maanyì, mujuula, mujidila mu mudimu kùdì Nzambì, mupèeshiibwe dipà dyà bukolè, wàkajidiibwa mu mudimu bwà kubùtula ditùnga dyà beena Pelèshèètè. Mujidila mu mudimu, mulela pa buloba, mwela maanyì kùdì Nzambì, bwà kubùtula beena Pelèshèètè. Nènku dīngà ditùkù kumujikidilabù mu budimi, kàyì ne mwelè wèndè wa mvità, kàyì ne difùmà to. Kàdì cinunu cijimà cyà beena Pelèshèètè bavwàle byà mvità ne ku mènù abu kulwabo lubilu e kumwicikidilabo dyàkàmwè. Yèyè wàkatwàku binù kwamba ne: “Éyì Mukalenge, ndi mwindile cikèènà-kumòna. Éyì Mukalenge, cìndì ne cyà kwenza ncinyì? Ndombòlaku mpindyewu bwà cyà dyenza” anyi? Yèyè ùvwa mummyè ne ùvwa ne dijinga kampànda. Yèyè kààkapeta cintu nànsha cìmwè to pa kuumusha mufùbà wa kale wa lubàngà lwà kampundu, ki kushebeyayè beena Pelèshèètè cinunu cijimà. Amen!

<sup>245</sup> Yèyè kààkeelakù mbilà kùdì Nzambì nànsha. Wàkakwàta mudimu ne dipà dyèndè dyela maanyì adi. Ûvwa mummyè ne yèyè ùvwa mutùmiiibwe mbwà mudimu awu. Ûvwa mummyè ne yèyè ùvwa mulediibwe mbwà cyòci aci. Ûvwa mummyè ne yèyè ùvwa mwela maanyì ne dipà kampànda, ne kushebeyayè beena Pelèshèètè cinunu cijimà. Kààkeelakù mbilà kùdì Nzambì to. Nzambì ùvwa mummyè mu mudimu ne mumushindike cìvwàye aci, ku bikwbò bintu bìvwàye mwenze. Ne yèyè ùvwa musadidi wa Nzambì mushindikiiibwe, mwela maanyì, bwà kubùtula beena Pelèshèètè, ne wàkacyènza. Maalu àvwà ènzekà nànsha miikàle bishi, yèyè wàkacyènza. Kààkalombakù kantu nànsha kàmwè to. Cìvwa mmudimu wèndè, Nzambì ùvwa ùkwàcila mudimu kùdīye, wàmbulu mufùbà wà kampundu awu ne ùbanga kutuuta beena Pelèshèètè. Mùshindù mwine . . .

<sup>246</sup> Mòna's, dituuta ànu dimwèpèlè dyà ne ciine cintu aci, mu cìmwè cyà ku bifulu byà cyamù cyà mìtakù byà mupimbu wà cyàlà cìmwè ne citùpà abi mùshindù ewu, s'dìvwa difwànyine kwikala disùnsùlùle mufùbà awu mu tusùnsùkila mùliyò mujimà. Kàdì kubàtuutayè kubàzengeja cinunu cijimà, ne



kubàshebeyayè, cibi mushààle ànu kacya wìmana naawù mu cyanza.

247 Kààkeelaku nkonko to. Kààkeelaku mbilà to. Wàkaakula. Wàkabànyeemesha e kuyabo bimpàmbàmba. Kaa, ekèlekèle! “Kwàta mwena Pelèshèètè, ndi mwà kukwàta beena Pelèshèètè anyi, Mukalenge? Ndi—ndi mumanyè ne Wèwè udi muntùme bwà kucyènta, Mukalenge. Èyowà’s, Mukalenge, ndi mumanyè ne Wèwè udi muntùme mbwà mèmè kubùtula ditungà dyà beena Pelèshèètè edi. Mpindyewu mwaba ewu, bàdi cinunu cijima bannyungùlùkile, kàdi pàanyi ncìyi ne cintu nànsha cimwè. Cìngìikalà mwà kwenza ncinyi—ncinyi mpindyewu, Mukalenge?” Kaa, ekèlekèle! Kakwenaku cintu nànsha cimwè cìikalà mwà kumutàcisha to. Yèyè mmwediibwe maanyi bwà mudimu awu. Kakwènàku cintu nànsha cimwè cidì mwà kukwenzela bibi to. To, nànsha cimwè. Alèluuyàh! Wàkangata ànu cìvwàye naaci aci e kubàtuutayè. Ncyà bushùwà.

248 Mwena lukunà pàakamujikilàye mu bimanu, wàmba ne: “Mpindyewu twàmupetèdi mu bimanu, apa kaayi twàmupeci mpindyewu. Twàmupetèdi munda emu yèyè ne mukàji ewu. Mpindyewu twàkangi ciibi, ne mu nyungulukilu mwònsò, nènku kèna mwà kupàtukakù to. Twàmupeci.”

249 Shimishòonà kààkeelakù mbilà ne: “Èyi Mukalenge, mbàndaminyine mu bimanu emu nseke yònsò ne dingumba edi to.” Huh! “Uh, cìngìikalà mwà kwenza ncinyi? Nyèwù ngaalu kushààla wa kùdibo. Cìngìikalà mwà kwenza ncinyi?” Yèyè kààkenzakù nànkù to.

250 Wàkaasa ànu lwendu e kupatuka, kutùulayè ciibi aci, kucitèntekayè pa dikaaya, ne kwasayè naaci lwendu e kuya. Amen! Úvwa mwediibwe maanyi bwà mudimu awu. Úvwa mubiikidiibwe kùdi Nzambì. Kabàakamujikilakù mu bimanu to. To, nànsha kakesè! Yèyè wàkangata biibi abi e kuyayè naabi. Kààkasambilaku bwà bwalu abu to. Kààkakonkakù Nzambì ní bivwa bikèngela kucyènta anyi kubènga kucyènta to. Cìvwa ànu mu njila wa mudimu mene. Amen, amen, amen! Ànu mu njila wa mudimu mene. “Bwà cinyi kwela mbilà kùNdi? Akùlà, ùtungunuke ne lwendu!” Amen! “Kwedi mbilà to. Akùlà!” Úkaavwa mulekèle byà dinungana ne dididila dyà mu mènù abi mpindyewu. Yèyè ùvwa ne cyà kwikala mukùlumpè mukùmbàne bwà kwakulayè. Ncyà bushùwà. Yèyè ùvwa mumanyè ne dipà dyèndè dilaaba maanyi dyà bukolè adi divwa mwà kubùtula mwena Pelèshèètè kanà yònsò uvwa umucyamakana kumpàla awu. Amen.

251 Kàdi twètù katwèna bamanyè aci to, nudi numòna’s. Twètù tucidi ànu bàna bakesè bàà mu mabòko, ne kàlàngì kàà mabèèla keela mukana.

252 Yèyè ùvwa mucìmanyè, ùvwa mumanyè ne Nzambì wàkamujuula bwà kiipàcìlà aku, ne kakùvwakù cintu nànsha

cimwè cìvwà mwà kumukàndàmeena to, matùkù èndè wònsò à mwoyi. Cintu nànsha cimwè kacìvwa mwà kumubùtulakù yèyè to. Yèyè wàkajuudiibwa bwà kiipàcìlà aku, bu mùvwà pèndè Mòsà amu. Cintu nànsha cimwè kacìvwa mwà kumwimanyikakù to. Beena Amàlèkà nànsha bàà munyi anyi cintu cikwàbò nànsha cimwè kaciyèna mwà kumwimanyikakù to. Yèyè ùdi mu njila mutàngile ku buloba bulaya. Shimishòònà ùvwa mumanyè ne yèyè ùvwa mu njila.

<sup>253</sup> Yoshùwà ùvwa mumanyè ne neàkwatè buloba abu. Yèyè ùvwa mushìndikiibwe. Dìyì dyà Nzambi dyàkacìlaya, ne Nyumà Mwìmpè ùvwakù mwikàle ùcishìndika.

<sup>254</sup> Yèyè ùvwa mu njila wendè, pa nànkù kakùvwa mwà kwikala cintu nànsha cimwè cìvwa mwà kumucyàmàkana mu njila wendè to. To, mukalenge. Ànu mu njila wa mudimu awu mene, pàmwè ne Nzambi, kakùvwakù cintu nànsha cimwè cìvwà mwà kumucyàmàkana mu njila to. Pa nànkù yèyè wàkambula ànu biibi abi ne wàkabìtenteka pa dikaaya, biine abi biikàle ne bujitu bwa kilò mitwè ku binunu binaayi anyi bitaanu, ne kuyayè wènda tamakatamaka too ne ku lusongo lwà kakùnà ne kusòmbayè pòpò. Cintu nànsha cimwè kacìvwaku mwà kumukàndàmeena mu njila to. Yèyè ùvwa ne dipà dilaaba maanyi dyà kùdì Nzambi. Kabyàkakèngela bwà kwelaye mbila ne: “Mukalenge, cìndi ne cyà kwenza mpindyewu ncinyi to?” Yèyè ùkaavwa mumanè kwediibwa maanyi bwà kaciyèna. Cìvwa ng’EMU MMÙDÌ MUKALENGE WÀMBA, “Bùmùshè!” Àlèluuyàh! “Bùmùshè! Ndi mukujuule mbwà kiipacila aku.” Amen.

<sup>255</sup> “Cìndi ne cyà kwenza ncinyi, Mukalenge? Èyo, cìngìikalà mwà kwenza ncinyi mwab’ewu ku Mbù Mukùnze eku?”

<sup>256</sup> “Ncìvwakù mukwambìle ne Ngaakupèèshi mukùnà kampànda bu cimanyinu pambèlu apa anyi? Newàlukile ku mukùnà awu, ne neùye ne bânà aba too ne ku buloba abu. Ncìvwakù mukubiikile bwà kiipàcìlà aku anyi? Cyùdì upampakeena ne cintu cikwàbò kampànda necìkucyàmàkàne mu njila ncinyi? Akùlà, ne asà lwendu!” Amen ne amen! “Èyowà’s, ndi mukubiikile mbwà kiipàcìlà aka.”

<sup>257</sup> Davidì, yèyè ùvwa mumanyè ne ùvwa mwela maanyi, ne ùvwa mushìndikiibwe bwà kwikala mwena ndudì wa kalàndààmùsèngà. Ùvwa mumanyè ne bòbò bàvwa bamanyè ne yèyè ùvwa mwena ndudì wa kalàndààmùsèngà. Davidì ùvwa mwela maanyi. Yèyè ùvwa mucimanyè. Nènku pààkiimanàye kumpàla kwà Goliyàtà, kààkeelaku mbilà to ne: “Èyi Nzambi, cìndi ne cyà kwenza mpindyewu ncinyi? Indila, ndi—ndi ne cyà...ndi mumanyè ciWakenza mu bikondo bishààle. Wèwè, Wèwè’s ùvwa mumpèèshe mùshìndù wà kushebeya nyama wa ours, ne Wèwè kumpèèsha mùshìndù wà kushebeya nyamà wa ntambwe. Kàdi bishi bwà Goliyàtà udi apa ewu?” Huh! Yèyè

kààkenzaku aci to. Wàkaakula ànu cyanàànà. Wàkamba cinyi? “Wèwè newikalè ànu mùvwàyi...?...” Wàkaakula ne wàkaya mutàngile kumpàla.

<sup>258</sup> Yèyè kààkenzaku disambila to. Kààkalàmbulaku cintu nànsha cimwè to. Yèyè ùvwa mumanyè ne ùvwa mwela maanyi. Amen. Yèyè ùvwa mwela maanyi, ne ndundu wa nyuunyi awu wàkamwènèka ne yèyè nguvwa cintu menemene cìvwà cikèngediibwà. Ùvwa ne diitabuuja mu dilaabiibwa dyèndè. Ùvwa ne diitabuuja ne Nzambì ùvwa mwà kuludikila dibwe adi buludi ànu munkaci mwà cifulu cyà mvità aci amu, mùvwà mwaba wùmwèpelè wùvwàdi mwà kwasa awu. Yèyè ùvwa mwimàne mwaba awu.

<sup>259</sup> Yèyè ùvwa mumanyè ne ùvwa mwena ndudì wa kalàndààmùsèngà. Amen. Ùvwa mumanyè ne Nzambì ùvwà mumwenze cyòci aci. Amen. Ùvwa mumanyè ne ùvwa mushebèyè nyamà wa ntambwe, ùvwa mumanyè ne ùvwa mushebèyè nyamà wa ours, kàdi aci cyàkenjiibwa ne cintu cyà tatwèndè wa pa buloba. Apa ncintu cyà Tatwèndè wa mu Dyulu! Amen. Yèyè kààkatwaku binù ne: “Ndi ne cyà . . . Cìndi ne cyà kwenza ncinyi mpindyewu, Mukalenge to?” Yèyè wàkaakula kwamba ne: “Wèwè newikalè ànu mùvwà nyama wa ntambwe ne wa ours amu, kàdi ki mèmè ulwàlwa ewu.” Amen! Butùmbi kùdi Nzambi! Éyowà’s, mukalenge. Wàkaakula ne wàkaya kumpàla bwà katuutakeena ne Goliyàtà ewu. Kaa, ekèlekèle!

<sup>260</sup> Kàyì utàngila bunène ne bule bwèndè abu to! Yèyè ùvwa kaamuntu kakesè, kakùnzùbile, nudi bamanyè’s. Kàvwa munène menemene to. Kàvwa mutàmbe kwikala mulenga kwìsù wa batàngila to, kaamuntu kàà mùshindù wa kakesè kàà menemene. Bible mmwàmbe ne yèyè ùvwa mukùnzùbile. Mpindyewu, kààkatàngila bunène ne bule bwèndè abu ne bukolè bwèndè bùvwàye wàmba bwà kwenza nàнку abu to.

<sup>261</sup> Nudi bamanyè’s, mwè—mwèpiskòpò kumwambilayè, kwamba ne: “Mpindyewu tàngilà kuneeku, mwanàanyi wa balùme, muntu awu mmwena tèlòji. Nwamònu’s, yèyè mmulwanganyi wa mvità. Ùtu mulediibwe mulwanganyi wa mvità ne ùdi . . . Yèyè ùtu mulwanganyi wa mvità, kacaya ànu ku bwàna bwèndè; kàdi wèwè kwèna mwà kukùngamanganakù nendè to.” Ki bânà bààbò bàà balùme kwambabò ne: “Kaa, kaawèwè kantu cyanàànà aka, udi kalwè mwaba ewu bwà kwenza cintu bu nàнку awu, alukila kumbèlu wè.”

<sup>262</sup> Aci kacayàkamutàcishakù to. Bwà cinyi? Ùvwa mumanyè ne ùvwa mwela maanyi. “Nzambì ùvwa munsùngile ku nyama wa ntambwe awu, Nzambì ùvwa munsùngile ku makama à nyama wa ours wàwa awu, Yèyè neènzè bipite abi, neànsùngile kùdi mwena Pelèshèètè wàwa. Ki mèmè ulwàlwa ewu. Ndi ntwilàngana nèbè mu Dìna dyà Mukalenge Nzambì wa Izalèèlà.” Amen. Kààkasambila mufwilekù to; yèyè ùkaavwa

mumanè kusambila mufwilekù. Nzambi wàkamusambidisha mufwilekù kumpàla kwà difùkà dyà dyulu ne buloba. Yèyè ùvwa mwela maanyì bwà mudimu awu. Bùvwàye yèyè naabu bùvwa mbwà kwakula kàdi kuya mutàngile kumpàla. Ki cyònsò cìvwàku cyà kwenza pa bwalu abu, ànu kwakula cyanaànà kàdi kuya mutàngile kumpàla. Kaa, ki cyònsò cìvwàku pa bwalu abu ncyòci aci. Kaa! Yèyè kàvwakù. . .

<sup>263</sup> Pa bìvwà bitàngilà bânà bààbò bàà cyena-màngumba abu, baseki bàvwà pààbò biimanè mwaba awu abu, bôbò pààbò, nudi bamanyè's. Kaa, èyowà's. Bàvwà biimanè mwaba awu bamba, bàseka ne bèèlulwila, ne bamba. . . Bânà bààbò bàà balùme abu, nudi bamanyè's, bamba ne: "Ha, ha, ha, kaawèwè kwenà mwà kwangulaku mpasu to. Kaawèwè, s'udi ànu kantu cyanaànà." Aci kaciyakamunyungishaku to nànsha kakesè. "Kaawèwè udi kaswe kwikala kashiilangane ne bakwàbò. Cyùdi kaswe cidi ànu mbwà kudileeja cyanaànà." Bu ne cìvwa mbwà kudileeja, nùnkù's mbyenzeke nànkù. Kàdi bôbò bàvwà batàngila ànu luseke lwà mamanya à mu mitù.

<sup>264</sup> Davidi ùvwa mumanyè ne dilaabiibwa dyà maanyì adi òvwa pambidi pèndè. Amen. Bwèndè yèyè kacìvwakù ne cìvwàci cishintulula to. Kwambayè ne: "Mwena Pelèshèètè wàwa neikalè ànu bu nyama wa ours ne wa ntambwe awu, pa nànkù ki mèmè ulwàlwa ewu." Yèyè wàkadyànjila kucyàmbe kumpàla kwà kwenzekaci. Cìvwàye mwenze ncinyi? Ùvwa mushebèye nyama wa ours. Ùvwa mushebèye nyama wa ntambwe. Ùvwa mubyànkùle nyama wa ntambwe awu panshi ne. . . Ne cinyi? Ne—ne ndundu wa nyuunyi, ne wàkangata keelè, ne pashiishe nyama wa ours. Nyama wa ntambwe, ùvwa mushebèye nyama wa ntambwe ne keelè. Cintu cimwècimwè aci ncyàkenzàye Goliyàtà. Wàkamubyànkùla panshi ne dibwe, ne wàkapàtula mwele wèndè wà mvità mu cimàngà, ne wàkamukòsa mutù wèndè yèyè mwìnè, mwaba awu mene kumpàla kwàci. Cikaavwàye mudyànjile kwamba kumpàla kwà kwenzekaci ncinyi? "Ne wèwè newikalè ànu bu yòyi ayi." Bwà cinyi? Yèyè wàkaakula e kwamba dīyì ne necyènzekè, ne pashiishe kuyayè kumpàla bwà yèyè kucyùjija. Amen. Kaa, mwanèètù! Yèyè wàkaakula, ne wàkangata maalu awu ku bukòntònonyi bwèndè ditùkù adi.

<sup>265</sup> Bu ne kùvwakù cikondo cìvwà cìkèngela bwà muntu kwakulayè, s'mpindyewu ewu. Nkààdi njikija, ànu mu tusunsa tukesè tùdi tùlondà etu bu nwènù mwà kutwàlakù kàbìdi ànu ndambù wa tusunsa cyanaànà. Ndi ne bikwàbò bintu ndambù bifùnda kaaba aka, ndambù wa Mifùndu kùndi njinga kufika.

<sup>266</sup> Peetèlò kààkeelakù mbilà to, pààkasanganayè muntu mulùme ùvwa ne diitabuja dikumbàne bwà kwondopiibwa awu, mulààle ku ciibi cìvwàbo babiikila ne Cilenga aci. Yèyè kàakatwàku binù to ne kwenza disambila dyà bufùkù bujìrà, ne, ànyì disambila dyà ditùkù dijìrà, disambila dinène, dileedile, ne kwambaye ne: "Mukalenge, ndi nKulòmba

mpindyewu bwà Wèwè kwambulwishaku mulèma udi mukwàte ne byà luse ewu. Ndi mmòna ne ùdi ne diitabuuja. Ndi mumanye ne mmwena kwitabuuja. Ne ndi mumukonke, ne yèyè—yèyè. . . Ndi—ndi—ndi. . . Mmwámbe ne ùdi ne diitabuuja, mmufwányine kwitabuuja cingàamwambidì eci. Ne ngàamwambidì bwà. . . bwà byùdì Wèwè mwênzè, ne ndi—ndi ngèèla ànu meeji cyanààna mpindyewu, Mukalenge, ne—ne. . . Udiku Wèwè mwà kumpèèsha EMU MMÙDI MUKALENGE WÀMBA bwèndè yèyè anyì?”

<sup>267</sup> To, yèyè ùvwa mumanyè ne ùvwa mùpostòlò mwela maanyì. Ùvwa mumanyè ne Yesù Kilistò ùvwa mumutùme ne mudimu ne: “Wondope babèèdì, biisha bafwè, kezùlà beena nsudi, ipatà baadémons. Ànu mùdì mupete cyanààna amu, ùfilè cyanààna.” Yèyè ùvwa mwámbe ne: “Peetèlò, nda ùkenzè cyòci aci!” Kabyàkakèngela bwà kusambilaye mufwilakù to. Yèyè ùvwa mutùmiibwe ne mudimu awu.

<sup>268</sup> Cyàkambàye ncinyì? Wàkamba ne: “Mu Dìna dyà Yesù Kilistò!” Yèyè wàkajikula Dìna dyà Yesù Kilistò, kàdì muntu awu ùvwa ànu kacya wàlààla mwaba awu. Kì kumukwàtayè ku cyanza, kwambayè ne: “Juukà kuulu!” Nènku kushààlayè mumukwàte mwaba awu too ne pààkakolakanà mifuba yèndè ya mu tupòmbò ayi, ne kubangayè kwenda. Bwà cinyì? Yèyè kààkenzakù disangisha dyà milombo dyà bufùkù bujimà to. Kààkeelakù mbilà kùdì Nzambì to. Yèyè ùvwa mumanyè ne ditwishiiibwa dyònsò, mumanyìne ku mishikù yà Yesù Kilistò ne, yèyè ùvwa mwela maanyì bwà mudimu awu. Èyowà. Yèyè kwakula ne kumujuula panshi, bwalu ùvwa mumanyè ne yèyè ùvwa mwela maanyì bu mùpostòlò bwà kiipàcilà aku.

<sup>269</sup> Bantu bàakadyàdijà mu mundidimbi wèndè abu kabàakambaku ne: “Kaa, lwàkù’s, mùpostòlò Peetèlò, wèlèku mbilà pambidi pèètù apa, ne ùtùsambidilèku disambila dyà diitabuuja, kùdì Nzambì to.” To, to, bòbò kabàakambakù aci to. Bàvwa bamanyè ne yèyè ùvwa mùpostòlò mwela maanyì ne mushindika wa Nzambì. Pa nàнку bàakamba ne: “Tùlaalè ànu mu mundidimbi wèndè cyanààna. Kabyèna bikèngela bwà wèwè kwamba díyì kampànda to. Tudi bacimanyè. Tudi tuciiitabuuja.” Mwoyi munda mwàbò! Mùpostòlò kàvwakù ne mùshindù wà kufika kùdìbo bònsò to. Ne bòbò, bòbò biinè, bàdì citùpà cyàcì.

<sup>270</sup> Mòsà wàkamba ne: “Kì ng’ànù mèmè nkààyaanyi uyààya nànsha. Ntwètù bònsò bàyaaya.” Twètù bònsò tudi ne cintu kampànda cyà kwenza. Bìdì bikèngela bwà twètù bònsò twikalè beediibwe maanyì.

<sup>271</sup> Nènku bòbò kumòna mùpostòlò awu mwimàne mwaba awu, ne kumumònabo wòndopa mubèèdì awu ne wènza bintu byàkenzàye abi. Kumanyabò ne yèyè kàvwa ne mùshindù wà kufikayè kùdìbo to. Kwambabò, bòbò kabàakambakù ne: “Peetèlò, lwàku bwà—bwà wènzè disambila to, ne windilè

mpindyewu too ne pawàpetà EMU MMÙDÌ MUKALENGE WÀMBA, kàdi ùlwe ùngambilè. Tumòne cidì Mukalenge wàmba to.” Bàakamba ne: “Bu twètù ànu mwà kudyàdija mu mundidìmbì wèndè, bwalu Nzambì mwinè ùvwa munda mwà Yesù Kilistò awu ùdi munda mwèndè, ne tudi tumòna cintu cimwècimwè aci munkaci mwà kwenzeka. Pa nàнку bàakalenga mubàngùbàngù wa civwalù cyà Yesù ne kudyàdija mu mundidìmbì Wèndè, ne Yesù ùdi munda mwà muntu ewu. Bu mundidìmbì wàwa mwà kudileejila pambidi pèètù, netwòndopiibwè.”

<sup>272</sup> Ne Bible mswàmbe ne yònsò wa kùdìbo wàkondopiibwa. Kabiyi byà disangisha dyà milòmbò dyà bufùkù bujimà to, dyà bàmba ne: “Mukalenge, bu mémè mwà kuyakù kadyàdija mu mundidìmbì wa mùpostòlò ewu?” To, bòbò bàvwa bacimanyè. Bukènkè bùvwa bubàlengè. Myoyi yàbò yivwa myùle tèntè. Diitabuuja dyàbò divwa didilekèlèle. Amen. Bàvwa bacitàbùùje. Bàvwa bacimòne. Tushwala twà Pòlo atu, mùshindù wùmwèwùmwè awu’s.

Mpindyewu, bwà kujikija.

<sup>273</sup> Yesù kààkeelaku mbilà to pàakalwàbo ne mwànà wa balùme mutombòke kùdìYe, uvwa ne ciseki, uvwa upòna mu mudilu awu. Yèyè kàakambakù ne: “Taatu, Mémè ndi Mwan’Èbè, nènku mpindyewu Wèwè udi muNtùme pànwàpa bwà kwenza *cikampànda ne cikansanga, ne cikankènga*. Ndikù mwà kwondopa mwànà wa balùme ewu anyi?” Kàakambakù aci to. Yèyè wàkamba ne: “Pàtukà munda mwèndè, Sàtaanà!” Yèyè wàkaakula, ne mwànà wa balùme awu wàkondopiibwa.

<sup>274</sup> PàakatwilanganàYe ne Legònà, mwikàle ne démons binunu bibìdi munda mwèndè, uvwa wela mbila awu kàvwa n’Yesù to. Démons nyivwà yèla mbilà ne: “Pìikalàbi ne Wèwè newikalè mwà kutwipata,” kaa, ekèlekèle, “itàbàku bwà tuye kabwela mu cisùmbù cyà ngulube cyàcya.”

<sup>275</sup> Yesù kàakambaku ne: “Mpindyewu, Taatu, Mémè ewu ndiku ne bukolè bwà kwenza cyòci eci anyi?” Wàkamba ne: “Pàtukàayi munda mwèndè,” ke démons kudyèlayi lubilu e kuyayi. Bushùwà’s, Ùvwa mumanyè ne Yèyè ùvwa Maasiyà.

<sup>276</sup> Ku lukità lwà Lazàrò, yèyè ùvwa mufwè kùkaavwa matùkù ànaayi. Kwambabò ne: “Bu ne Wèwè uvwakù kaaba aka, Mukalenge, yèyè nùnkù kì mmufwè to.”

<sup>277</sup> KwambaYè ne: “Mémè ndi dibìika dyà ku lufù ne Mwoyi.” Amen! Kabiyi byà ne mpenyi, ndìbà kaayi, anyi mmùshindù kaayi nànsha. “Èwu udi uNgiitabuuja, nànsha byòbi ne yèyè mmufwè, nànsha nàнку yèyè neikalè ne mwoyi.” Amen. Ùvwa mumanyè ne Yèyè ùvwa Nganyi. Ùvwa mumanyè ne Yèyè ùvwa cinyi. Ùvwa mumanyè ne Yèyè ùvwa Emanùwèlè. Ùvwa mumanyè ne Yèyè ùvwa dibìika dyà ku lufù. Ùvwa mumanyè ne Yèyè ùvwa Mwoyi. Ùvwa mumanyè ne munda Mwèndè

mùvwa kaabujimà kàà Bunzambì kasòmbèlemù mu mùshindù wà mubidi. Ûvwa mumòne bantu bàà bakesè abu kuntwaku, ne Ûvwa mumòne civwà Nzambì muMwambile dîbà adi bwà kwenza aci, nènku ki Yèyè awu. Yèyè wàkayakù.

278 Kààkambaku ne: “Mpindyewu, indilaayi, Nêngänji kutwà binù kaaba aka. Twayì bònsò binù nùsambilè.” Yèyè wàkamba ne: “Nudi nwitabuuja ne Mémè ndi mwà kwenza cyòci eci anyi?” Amen. Yèyè wàkabàkonkaci.

279 Kàvwa n’Yèyè to; bàvwa mbòbò. “Èyowà, Mukalenge, ndi ngùtabuuja ne Wèwè udi Mwànà wa Nzambì uvwa ne cyà kulwa pa buloba.” Kaa, ekèlekèle! S’ki Yèyè awu mumanyishìibwe. Bikèngela bwà cintu kampànda cyènzekè.

280 “Lazàrò, pàtukà!” Wàkaakula, ne muntu mufwè wàkapàtuka. Kabiyyì ne, “Ndi mwà kucyènza anyi?” Yèyè wàkaakula ànu cyanàànà. Diitabuuja ndyenze ànu dikumbanangana, cintu aci pàaci cyumba cyènzeka.

281 Yèyè ùdi wàkula, Yèyè wàkaakula, ne mpofo pààyi kumònayi, balèma kwendela kuulu, mpudimaci kumvwayì, démons kwelayì mbilà ne kupàtukayi, bafwè bàbiishìibwe, ne bikwàbò byònsò. Bwà cinyi? Yèyè kàakasambila mufwilekù to. Ûvwa mwediibwe maanyi bu Maasiyà awu. Yèyè ùvwa Maasiyà awu. Ûvwa mumanyè ne ki civwàYe. Ûvwa mumanyè kaaba Kèndè. Ûvwa mumanyè civwàYe mutùmìibwe bwà kwenza. Ûvwa mumanyè ne Taatù ùvwa muMumanyìshe ne m’Maasiyà awu, kùdì mwena kwitabuuja. Nènku pàvwàYe ùtwilàngana ne mwinè mwena kwitabuuja awu mwikàle ne diitabuuja, Yèyè ùvwa wàkula ànu Diyì cyanàànà. Démons pààyi yiya mwamwamwa. Èyowà’s, mukalenge. “Akùlà! Kwèdì mbilà to. Akùlà!” Amen.

282 Ne Yèyè ùvwa mumanyè makenji Èndè mafila kùdì Nzambì awu, kàdì twètù katwèna baàmanyè to. Ûvwa mumanyè civwàYe. Twètù mbàdì katùyì bamanyè citùdì to.

283 Mòsà ùkaavwa mupwè mwoyi. Shimishòònà wàkumvwa. Bakwàbò bààkumvwa. Yoshùwà wàkumvwa. Mòsà ùkaavwa yèyè mupwè mwoyi. Byàkakèngela bwà Nzambì kukòkayè ntèmà yèndè ku bwalu abu. KwambaYè ne: “Cyùdì welela mbila kùNdì ncinyi? Mémè’s ndi mukutùme mbwà kwenza mudimu awu. Akùlà, kàdì ùtungunuke ùye too ne ku kiiipàcilà kèbè. Mémè’s mvwà mukwambilè ne neùlwe ku mukùnà ewu. Angàtà bànà abu ùtungunuke ne kubàlombola. Akùlà ànu cyanàànà. Cidì mu njila webè nànsha cyòci ciikàle cinganyi, cyùmùshè mu njila. Ndi mukupèeshe bukòokeshi bwà wèwè kucyènza. Ndi mwakule. . . Wèwè’s udi mwakùlè mulòpòle njiiji ne nkùpà, ne bufùki, ne bintu byà mùshindù awu. Mpindyewu cyùdì welela mikunda kùNdì ncinganyi? Cyùdì ulwila kùNdì ncinyi, wenda wela mikunda wamba bintu ebi? Akùlà ànu cyanàànà kàdì

ùtangilè mudicì cìkwàta mudimu, kwàjikì.” Kaa, ekèlekèlè! Kaa, mùshindù mwinè wúndì mèmè ewu mucinangepu’s wè!

<sup>284</sup> Mwab’ewu, Yesù, byònsò bìvwàYe wàmba, Ûvwa wàkula ànu Dìyì cyanààna, pàaci kwikalaci ànu nànkù. Nzambì wàkashindika ànu pyòpyopyò ne Yèyè ki Mwan’Èndè. “Ewu ki Mwan’Àanyi munanga Mwena munda mùNdi nsankila bìmpè. Mutèèlejaayi Yèyè.”

<sup>285</sup> Mutàngilaayi. Mèmè ntu munange cyôci eci. Mùshindù mwinè wùvwàYe wimana ne dikima dyònsò, mu mùshindù wa ùkèmeshangana kumpàla kwà baMudyudi’s. Amen. Yèyè wàkamba ne: “Shimbùlaayi ntempèlù ewu, ne Mèmè nèndombè Taatù bwà kumòna cìdìYe wènza pa bwalu abu anyi?” “Shimbùlaayi ntempèlù ewu, ne Mèmè nèmmujuulè cyàkàbìdì, mu matùkù àsàtù.” Kabiyi ne: “Ndi ntèkemenà bwà kucyenza; Nèngiikalè mwà kuteeta bwà kucyenza to.” “Nèncyènzè!” Bwà cinyi? Mifùndu yàkamba nànkù.

<sup>286</sup> Mufùndu wùmwèwùmwè wàkambà ne Yèyè ùvwa mwà kjuuula mubidi Wèndè awu, mmutùpèeshe bukòokeshi abu, Bukolè abu. Amen! “Mu Dìna Dyanyi bôbò nebiipate baadémons, nebàakule mu myakulu mipyamipyà; bôbò bakwàte nyòka ne byanza, anyi banwè bintu byà bishebeyangana, kabyàkubènzela bwalu bubì nànsha; bôbò batentèkèlè babèèdì byanza, babèèdì nebàsangale.”

“Bwà cinyi kwela mbilà kùNdi? Akulà, ùye mutàngile kumpàla.” Kaa, ne dikima dyònsò mèmè . . .

“Shimbùlaayi ntempèlù ewu, Mèmè nèmmujuulè cyàkàbìdì.” Kaa!

<sup>287</sup> Nènkù vùlukàayi mpindyewu, (Tukàadi tujikija.), ne ùvwa n’Yèyè umweumwe awu. Yèyè ngwakamba, mu Yone 14.12, mu. . . “Ewu udi uNgiitabuuya, byenzedi bìndì Mèmè ngènza yèyè neabyènzè pèndè.” Ncyà bushùwà anyi? Yèyè ngwàkamba nànkù awu.

<sup>288</sup> Ûvwa n’Yesù, mu Maakò 11.24, wàkamba ne: “Wèwè *mwambile* mukùnà ewu,” kì nne, “Wèwè *musambile* mukùnà ewu to”. “Wèwè *mwambile* mukùnà ewu ne: ‘Tentèmùkà,’ ne kùyi wela mpatà munda mwà mwoyi wèbè to, kadi witabuuya ne ciwàmbi aci necyènzèkè, udi mwà kupeta ciwàmbi aci.” Kadi wèwè, wèwè mucyàmbè ànu mu didìcinkila cyanààna, kacyàkwenzeka to. Kadi cintu kampànda munda mwèbè, cyà ne wèwè—wèwè udi mwediibwe maanyi bwà mudimu awu, ne ulwa kumanya ne ndiswà dyà Nzambì bwà kucyenza, ne wèwè kucyàmba, cìdì ne cyà kwenzeka. “Nwènù . . .”

<sup>289</sup> Ûvwa n’Yèyè wàkamba cyôci eci. “Nwènù bashààle munda Mwanyi, ne Mèyi Àanyi mashààle munda mwènù, nùlombàayi cinùdì baswè ne nebànwènzèlèci.” Kaa, ekèlekèlè! Kaa, ekèlekèlè! Nudi nuumvwa cìndì njinga kwamba aci anyi?



<sup>290</sup> Nwafwàyìkù luse bwà eci, kàdì cìcìdì ànu cimvwila mu mwoyi. Bikèngela ncyàmbè. Ùvwa n'Yèyè wàkamba, ditùkù adi kuntu kwàka, munda mwà diitu amu ne: “Wèwè kwèna ne nyama údì mwase to.” Nènku kufùkaYe nshìndì yìsàtù miimàne mwaba awu kumpàla kwètù. Ncinyi aci? Ànu kwakula kwà díyì cyanààna, kwamba ne: “Neyìkalè pààpa, ne pààpa, ne pààpa,” kàdì's ki yôyi ayi mwaba awu. Ùvwa n'Yèyè wàkenza cyôci aci.

<sup>291</sup> Charlie, Rodney, Ùvwa n'Yèyè mu Kentucky mwàmwa; ne Nellie, Margie, ne bakwàbò bàà kunùdì. Ùvwa n'Yèyè, Nzambì umweumwe awu uvwa kuntu kwàka ne wàkaakula ne Mòsà, wàmba ne: “Cyùdì welela mbila kùNdì ncinyi? Amba díyì!” Ùvwa n'Yèyè wàkayifùka. N'Yèyè. N'Yèyè. Kaa, ekèlekèle!

<sup>292</sup> Ùvwa n'Yèyè wàkafila cìkèèna-kumona kùkaadi bu cidimu cijimà nàнку, cyàkambà ne tuvwa mwà kuya kuntu kwàka aci, ne Bìtampì Mwandamutekète ebi, ne mùvwàku mwa kwenzeka mukungulu mu—mu—mu—munène wùvwà mwà kucibanga, mùvwàbu mwà kwikala mu mmwènekèlu wa cipaapu cyà musàkà. Ne kwòkù aku cìkàndàkàndà cyà *Look mag-...cyà Life* cìvwà cìcìpàtùle, cilembèlèle ku cimanu mwòmù amu. Ùvwa n'Yèyè wàkamba cyôci aci.

<sup>293</sup> Ùvwa n'Yèyè, dilòdòlò adi pàmvwà ngènda mpweka ne njila awu ne kumòna nyòka munène wa mambà awu ukààvwa wàmba kusùma mwanèètù wa balùme awu. Ki Yèyè kwamba ne: “Wèwè wáfìdì. . . udi mupèèshìbwe Bukolè bwà kumuswìka, anyì yònsò wa ku mikwàbò ayi.” Ùvwa n'Yèyè wàkamba aci.

<sup>294</sup> Kùdì mukajàànyì mukesè wá mvya udi musòmbe pààpa wàwa: Ùvwa n'Yèyè mu dìndà adi, wakambiisha ku tulù mu cibambalu mwàmwa, ne mwimàne mu ditumba, wàmba ne: “Kùcìinyi bwà kwenza ní ncinyi cyònsò to, anyì kuya ní mpenyì pònsò, anyì kwamba ní ncinyi cyònsò, bwalu Bwikadi bwà Yesù Kilistò bùdì kabùyìkù mwà kupangila abu bùdì neebè kwònsò kúyaayà.”

<sup>295</sup> Ùvwa n'Yèyè mu Sabino Canyon mwàmwa, kùkaadi ngondo mitwè ku yìsàtù, pàmvwà munkaci mwà kusambila, ndikonka ne cìvwà mwà kwenzeka ncinyi. Mvwa mwimàne mwaba awu, ki mwele wà mvità kumatawù mu cyanza cyànyì, ne kwamba ne: “Ewu m'Mwele wà Mvità wà Mfùmù awu.” Ùvwa n'Yèyè.

<sup>296</sup> Ùvwa n'Yèyè wàkangambila ne: “Ànu mùNgààkadì ne Mòsà amu, ki mùNgààkutùmà wèwè.”

<sup>297</sup> Ùvwa n'Yèyè wàkangambila, kùkaadi bidimu makumi àsàtù, ku musulu kwàka, pàncìvwà mwànà mutekète. Mémè mwimàne mwaba awu bu muyiishi wa kànàkànà, ku musùlu aku, kùkaadi bidimu makumi àsàtù, mwimàne mwaba awu pààkapwekà Bukènkè abu, Dikunji dyà Kapyà dìmwèdìmwè adi, bùfùmìna mu maulu ne kwimanaBù mwaba awu, bwàmba ne: “Ànu mùNgààkatùmà Yone Mubàtìiji bwà kudyanjidilayè dilwa dyà kumpàla dyà Kilistò amu, Mukenji wèbè wèwè

newùdyanjidile Dilwa Diibídi,” pa buloba bujima. Bìwva bifwànyine kwenzeka munyi, pàakansekà mpaasàtà wanyi sungasunga ne kucyèlùlwilayè apu? Kàdi’s ncyenzèke ànu menemene mùshindù awu. Úwva n’Yèyè wákacyàmba. Èyowà’s, mukalenge!

<sup>298</sup> Kaa, mùshindù mwinè wùvwàbi ne n’Yèyè wákamba mu cipròfetà, ku cikèènà-kumòna ne: “Necyènzèkè.” Úwva n’Yèyè wákamba ne: “Muntu munkaci mwènù yèyè mwambe cipròfetà, anyi mumòne cikèènà-kumòna, ne mucyàmbè, kàdi kwenzekaci, vùlukààyi díbà adi ne kî nyèyè to, m’Mémè. Mémè ngudi nendè.” Kaa, ekèlekèle! Mùshindù mwinè wùndi mufwànyine kutungunuka’s wè, ngènda ngàmba ne n’Yèyè, n’Yèyè, n’Yèyè!

<sup>299</sup> N’Yèyè wàkatùluka, pangààkabàmbilà ne Dikunji dyà Kapyà ndyàkapwekà ku musùlu aku, kàdi bòbò kabàyikù mwà kuciitabuujà tò. Úwva n’Yèyè kuntwaku munkaci mwètù, pàwà muiiishi wa ba-Baptistes awu, kumpàla kwà bantu binunu makumi àsàtù dilòòlò adi, mu Sam Houston Coliseum mwàmwa, pààkaDikwàcishà Mwanjèlò wa Mukalenge fòtò, mwimàne mwaba awu. Úwva n’Yèyè, umwèumwè awu makèèlèlè, leelù, too ne kashidi.

<sup>300</sup> Úwva n’Yèyè wákadyànjila kwamba mwaba wùvwà bintu ebi ne cyà kwikala. Úwva n’Yèyè wákamba cyòci aci. Úwva n’Yèyè udi mwènze bintu ebi. Yèyè udi umwèumwè awu makèèlèlè, leelù, too ne kashidi. Yèyè mmwenze byònsò ànu menemene mwákambàYe ne Yèyè neàbyènzè amu. Amen.

<sup>301</sup> Nebikèngelè ngiindilè bwà cinyi? Nzambi’s mmushindike Dìyi. Didi Bulelèlè. Tùyaayi mu lwendu. Twàsàayi lwendu. Tùyaayi mu lwendu lwà Mukalenge, biikàle tutèeka ku luseke mpatà yònsò, mpèkaatù yònsò. Sukùlaayi nzùbu, mùkolòpaayi.

<sup>302</sup> Ànu mùvwà cikèènà-kumòna cyà Junior Jackson aci cyambe, kakùvwà kushààle cintu nànsha címwè to ànu myèndù; anyi cilòòtà cyèndè aci, piikalàye musòmbe kaaba aka. Kakùyi kushààle cintu nànsha címwè to ànu myèndù, ne yòyi yìvwà ne tukàbà twà ngòlò tuyijìngile, mu cilòòtà civwàye mumpèeshe dilòòlò adi aci. Kaa, ekèlekèle!

<sup>303</sup> Mwanèètù Collins, kùtàcishiku meeji bwà mushipa awu to. Wùvwà mutòòke. Wèwè kùvwà ànu mumànye mwà kuwùkwàta to.

<sup>304</sup> Tèèkaayi ku luseke bikwàbò byònsò bìdì bibènganganà naaCi abi. Vùlukààyi ne, eci m’Bulelèlè, nànsha Bwikàle bùmwèka bu dikolesha dyà maalu dyà bìshi, ne bikwàbò byònsò, misangu mikwàbò. Tùngunukàayi ànu naaBù. Bùdi n’Nyumà Mwimpè. Nzambi umwèumwè wákabiùsha Yesù Kilistò ku bafwè awu, Yèyè umwèumwè udi mwà kwamba dîyi ne bintu kwikalabiku awu, Yèyè umwèumwè uvwa ne mwoyi mu matùkù à Mòsà awu, ùdi umweumwe awu leelù ewu.

<sup>305</sup> Dibiikila Dyèndè mu ditùkù dyà ndekeelu edi, Yèyè mmudishindike. “Ànu mwàkadibi mu matùkù à Sodoma amu, ki mwikalàbi kàbidì ku dilwa dyà Mwànà wa muntu.” Yèyè’s mmwenze. . . Ki Sodoma udi kwìnshì kwàka wàwa. Ki Billy Graham ne Oral Roberts bàba kuntwaku. Ne Èkèleeziyà udi ùtùngunuka, ku bimanyinu byòbì bimwèbimwè byàkalayàYe abi, myaba yònsò yìbidì, s’ki bòbò abu kuntwaku. Úwva n’Yèyè wàkacyàmba.

<sup>306</sup> Éyì Mukalenge, mpèèshèku bukitù, ke disambila dyànyì ndyòdì adi. Nkwàcishèku, Éyì Mukalenge Nzambi.

Bikèngela ngìmanyikile mwab’ewu. Dìbà dyàyi.

<sup>307</sup> “Bwà cinyì kwela mbila kùNdi? Nudi munkaci mwà kwela mbila kùNdi bwà cinyì, pàdibi ne Mémè ndi munùjaadikile ne Ndi neenù? Ncyènàku mwondope babèèdi bèènu anyì,” mùdìYe mufwànyine kwamba. “Ncyènàku munwàmbile bintu bidì byenzèke ànu mu byòbì menemene anyì? Mpaasàta wenù kènà mwà kwenza abi to. Mémè! Yèyè kènà mwà kubyènza to; yèyè’s mmuntu. M’Mémè, Mukalenge,” mùdìYe mufwànyine kwamba’s. “Mémè’s Ngudi mwenze cyòci eci. Mémè’s Ngudi umwambila bintu ebi bwà kubyàmbaye. Kì nyèyè to. N’Diyì Dyànyì Mémè. Mémè’s Ngudi ubiùsha bafwè bèènu pàdìbo bapona bafwa apu. Mémè’s Ngudi wondopa babèèdi. Mémè’s Ngudi udyànjala kwamba maalu aa. Mémè’s Ngudi usùngila. Mémè’s Ngutu mufile mulayì awu.”

<sup>308</sup> Nzambi, ampèèshèku bukitù bwà kwangata Mwele wa mvità wà Diyì wàkatèekaYe mu cyanza cyànyì kùkaadi bidimu bitwè ku makumi àsàtù ne bisàtù awu, bwà ngUkwàte nye mutàngile kumpàla too ne ku Nkòkelu Mwisàtù, ki disambila dyànyì ndyòdì adi.

Twinyikààyaaku mitù yètù.

<sup>309</sup> Taatù wa mu Dyulu, dìbà ndyèdì dyènda dipìta, kàdi Diyì didi dyènda dishàala dyà mushinga mukolè. Ànu mutùdì tucimòna emu, Mukalenge, ku musangu ne ku musangu Bwikadi bwà Kilistò butù kabùyikù bupangila abu bùdi budisangisha nèètù misangu yònsò. Mùshindù mwinè wùndì nKwela twasàkidila bwà bwímpè Bwèbè’s wè! Mùshindù mwinè wùdì Wèwè mutùlame ne wùdì. . . ne mutùbènèshe, mùshindù mwinè wutùdì tuKwela twasàkidila bwà bwalu abu’s!

<sup>310</sup> Pàndì mukwàte mishwàla eyi mu cyanza cyànyì apa, Mukalenge, mbantu bàdì ne diitabuuja, bàdì biitabùùje Cyòci eci. Swàku bwà démon ne démon yònsò, bubèèdi ne bubèèdi bwònsò byùmukè pambidi pàà bantu abu. Ne ndi ntùmina nyumà ne nyumà yònsò udi muneemu emu diyì, udi wa bukooya, ne kàyì wa Nzambi awu, nyumà yònsò wa bubèèdi, màsaamà wònsò ne ntàtu. Katwèna bayàdije mu mundidìmbì wà muntu to, cìdì cifwànyine ànu kwikala cìmpè, kàdi tudi mu mundidìmbì wa Èvànjeeliyò, Èvànjeeliyò mushindikìibwè.

311 Pàdi Dikunji dyà Kapyà dinène ditàmbakana dyàtwa kumpàla dyàtwa paanyimà mu nzùbu mujimà emu apa, Dyôdi dimwèdimwè divwà Nzambi mutàngidilemù adi, ne Mbù Mukünze kwimanyikaye Iwendu Iwèndè, nènku Izàlèèlà kupicilayè mwòmò amu. Kàdi mpindyewu pàdiYe ùtàngila apa, mbimyamina Mashì à Mwan'Èndè Sungasunga, ne luse ne ngàsà. Swàkù bwà twikalè ne ditùmikila. Swàkù leelù ewu bwà tùlekelèku kwamba, kwela kwà mbila mikolè. Swàkù bwà tùfike ku dyumvwa ne Wèwè udi mutùbiikile mbwà mudimu ewu. Dìbà ndyôdi edi. Ndi ncyàmba mu Dìnà dyà Yesù Kilistò ne, bubèèdi bwònsò bùùmukè kaaba aka.

312 Swàkù bwà mulùme yònsò ne mukàji yònsò, udi usòka Dìnà dyà Yesù Kilistò awu, àlambulè cyàkàbìdi nsòmbelu wèndè leelù ewu. Mémè nyèwù ndambula wanyì pàanyi, Mukalenge, pa cyoshelu cyà disambila apa. Ndi ndyàdija mémè mwinè panshi, ne ndyùm vwa mémè mwinè bundù ne nkùdimuna mutù wanyi ngutàngija ku buloba kuWàkangangatà. Mukalenge Nzambi, ndi ndyùm vwa bundù bwà butekète bwanyi ne bupidyà bwanyi. Ùbifwèku luse, Mukalenge. Mpèèshèku bukitù. Tùpèèshèku twètù bònsò bukitù.

313 Ndi ndyùm vwa, bu Mòsà, ne tudi bònsò mu njila wa dipàtuka. Katwèna baswè kushiyakù nànsha umwèpelè to. Tudi baswè kwangata muntu ne muntu, Mukalenge. Mbèèbè Wèwè. Ndi mbànana Bwèbè Wèwè. Bènèshàku cisambà eci leelù ewu, Mukalenge. Enzàku nànkù. Nènku mbènèshèku, pàmwè naabò, Taatù, nènku Dìnà Dyèbè neditumbishiibwè. Butùmbi Bwèbè nebwikalè Bwèbè. Tùpèèshèku diitabuuja dyà Cyendèlèlè edi, Mukalenge, patùdi tudilambula twètù biine Kùdi mpindyewu apa.

314 Mémè, pa Bible ewu ne pa cibumbà cyà ku cyambilu apa, ndi nKupèèsha nsòmbelu wanyì, Mukalenge. Ndi muswikiibwe ku mulayi ne mulayi wònsò wùdi Wèwè mufile. Ndi mumanyè ne yìdi Bulelèlà. Mpèèshèku bukitù bwà kwamba Mèyi aa. Mpèèshèku bukitù, Mukalenge. Ùndudikèku mu bingenzà ne mu bingambà. Nyèwù ndifila mémè mwinè Kùdi, poopàmwè ne èkèlezìyà ewu, pàmwè nendè, Mukalenge, mu Dìnà dyà Yesù Kilistò. Amen.

Diitabuuja dyanyi. . . kuulu Kùdi,  
Wèwè Mwànà wa mùkòòkò wà ku Kàlvariyò,  
Musungidi wa kùdi Nzambi;  
Mpindyewu ngumvwilèku pàndi nsambila apa,  
Umùshaku mpèkaatù yanyi yònsò,  
Kaa, anyishàku bwà kuumukila ku leelù ewu  
Mémè yònsò ngiikalè Webè!

315 Mpindyewu tùjuukilàayi kuulu, bitùùlùbitùùlù menemene, patùdi tuwimbila mu matàma apa.

. . . Kùdi,

Wèwè Mwânà wa mùkòòkò . . .

Twèlààyikù ànu byanza byètù muulu kùdi Ye mpindyewu.

Éyì Musùngidi . . .

Dilambulaayaaku nwènù biinè kùdi Nzambì mpindyewu.

Mpindyewu ngumvwilèku pândi nsambila apa,  
Umùshaku mpatà yànyì yònsò,  
Kaa, anyishàku bwà kuumukila ku leelù ewu  
Mémè yònsò ngiikalè Webè!

<sup>316</sup> Cyàpàmwè mpindyewu, ne byanza byètù byela muulu: [Disangisha didi dyambulula disambila edi, bènda bàlonda Mwanètù Branham—Muf.] “Mukalenge Yesù, ndi mpindyewu ndilambula Kùdi, bwà nsòmbelu wa mudimu, mutàmbe kwikala ne bukezùke, ne diitabuuja bùngì bubàndìle, ndi ndila, bwà mémè kumòna mwà kwikala musadidi wa mutàmbe kwanyishiibwa mu nsòmbelu wanyì ucilwalwa, kutàmbe mùmvwà mu nsòmbelu mushààle. Mfwilèku luse ku bupidyà bwànyì, ne twàlùjùlwilèku Diitabuuja dyàkafidiibwà kùdi bansantu musangu kampànda wàwa adi. Ndi ndifila mémè mwinè Kùdi, mu Dìnà dyà Yesù Kilistò.”

<sup>317</sup> Mpindyewu patùdi twinyika mitù yètù apa.

Pàncidi ngèndela mu nyongolo wa mîdimà wa  
njila mibwelàkàne wa pànwàpa apa,  
Ne lutàtu lùpàasalala lunnyungulukila,  
Wèwè ikàlà Mulombodi wanyì;  
Tumina mîdimà díyì bwà yàndamukè muunya,  
Kùpula bwòwà bwànyì bwònsò,  
Ànyì kùndekèdiku mpàmbuka  
Nya kule ne Neebè nànsha.

<sup>318</sup> Patùdi twinyika mitù yètù mpindyewu apa. Nudiku nuumvwa bu ne Dìyiisha dyà mu dindà emu edi ndinwènzèle bîmpè anyì? Ndinùpèèshekù bukitù anyì? Bu nwènù mwà kuswà, elààyi byanza byènù muulu kùdi Nzambì, nwamba ne: “Nzambì, ndi nKwela twasàkidila.” Ndi mwele pàànyì byànyì byanza byònsò bìbìdì muulu, bwalu ndi ànu ndyumvwa ne—ne ndingambulwìshe. Ndimpèèshe bukitù.

<sup>319</sup> Bimwè bintu bìndì mwàmbe, ncìvwakù mwele meeji ne mvwa mwà kubyàmbà to, kàdi mbimana kwamba’s. Cìvwa nkadyuwu kùndì. Ndi musangane ne mémè mwinè ncìvwa mu mùshindù wùmvwà ngèèla meeji ne ngùmvwà to, kàdi ndi mudisangàne mupiiile bwà kwikala mwelèèle mbila misangu yònsò, pamutù pàà kwakula.

<sup>320</sup> Nzambì, nkwàcìshèku, kubangila pa díbà edi, bwà ngiikalèku musadidi mutàmbe kudilàmbula.

<sup>321</sup> Kí ng’ànù bwànyì mémè bùndì nsambila to. Ndi nsambila kàbìdì bwènù nwènù, bwà ne, bònsò pàmwè, bu Mubidi wà Kilistò, mubiikidìibwe bwà kupàtuka mu bàà pa buloba, biikàle

munkaci mwà kudilongolola bwà kuya batàngile ku Buloba bulaya, bwà Nzambi ampèeshèku bukítù bwà kwakula bwà bwalu bwà njila, bwà kutòòkesha njila bwà kanwìkadi nwâlwa kujimija kajila aku mene. Ndi nnwàmbila, ku ngàsà wa Nzambi ne, nëndondè bidyacilu byà makàsà bìdì bìmata Mashi byà Yèyè Wàkatudyànjidila awu.

Nenku nêngàmbulè nkùrusè mulambula ewu,  
Too ne pàmpèeshà lufù budìshikaminyi,  
Ne pashiishe ngàalukile Kumbèlu bwà  
kukavwàla cifulu cyà butùmbi,  
Kùdi cifulu cyà butùmbi bwànyì mèmè.

<sup>322</sup> Tudi tufila cyôci eci Kùdi, Taatù, didilàmbula dyètù edi, mu Dìna dyà Yesù Kilistò, Mwan'Èbè. Amen.

<sup>323</sup> [Mwanèètù wa balùme kampànda wàbangì kwakula mu myakulu. Katùpà kàà mukàbà wà mèyì munda mutupù—Muf.] Tudi twela Mukalenge twasàkidila bwà bwalu ebu. Ikàlaayi nwenda lwendu lwà badilàmbùle. Nudifilè nwènù biinè cyàkàbìdì, ku kalolo, ku didipwekesha. Ikàlaayi nwenda mu Nyumà. Ikàlaayi nwenda, nwakula, nuvwàla, nwenza maalu bu beena Kilistò, badipwekeshe ne bàà kalolo. Bwà mpindyewu kanùlekedikù eci cipangila to. Dìyì dyà mukana dyà Nzambi dìdì dyàkwila ku Dìyì, dyàkwila ku mapà. Pàdì dipà dimwè dilwa, dikwàbò dìdì dicijikula, dipà dikwàbò dilwa dijikula cintu cimwècimwè aci. Nwamònu's, ncyà bushùwà ne aci ncikùmbànàngàne ànu menemene ne Dìyì ne cikùmbànàngàne ànu menemene ne dìbà. Nzambi ùdi nèètù. Mùshindù mwinè wutùdì tuMusàkidila bwà bwalu abu's wè!

<sup>324</sup> Mpindyewu bu wetù, ne mitù yètù miinyika, bu mwanèètù wa bakàjì mwà kutùpèeshakù cyona pa:

Angata Dìna dyà Yesu wëndè naadi,  
Bu ngabu ku butèyì bwònsò;  
Ne pààkujìngà mateeta ku nseke ne ku nseke,  
Nungànà ànu cyanààna Dìna dyà Cijila adi mu  
disambila.

<sup>325</sup> Enza ànu—ànu aci, ambà Dìyì ne jìkula Dìna Dyèndè adi. Twìmbààyaaku mpindyewu pàdìbo—pàdìbo bàtùtangalaja apa.

Angata Dìna dyà Yesù wëndè naadi,  
Bu ngabu . . . ne wa dikenga;  
Nedìkupe disànka ne busàmbi,  
Kaa, nda naaDì kwònsò kùyaayà.

Dìna dyà mushinga . . .

<sup>326</sup> Mpindyewu tùlabulanganààyaaku ku cyanza muntu ne mukwèndè, twamba ne: “Nènkusambidilè, mwanèètù, ne wèwè wànsambidilakù pàànyì.”

. . . Dyulu;

Dìna dyà musinga, (Dìna dyà musinga!)  
 Kaa, dyà bupòle be!  
 Ditekemena dyà buloba ne disànka . . .

<sup>327</sup> Mpindyewu ne mitù yètù miinyika, twìmbààyi cituminyi cìdì cìlondà eci:

Angata Dìna dyà Yesù wëndè naadi,  
 Bu ngabu ku butèyi bwònsò;  
 Pààkujìngilà mateeta ku nseke ne ku nseke,  
 Nungàna ànu cyanààna Dìna dyà Cijila adi mu  
 disambila.

Dìna dyà musinga, (Dìna dyà musinga!) Kaa  
 dyà bupòle be! (Kaa dyà bupòle be!)  
 Ditekemena dyà buloba ne disànka dyà Dyulu;  
 Dìna dyà musinga, Kaa, dyà bupòle be!  
 Ditekemena dyà buloba ne disànka dyà Dyulu.

<sup>328</sup> Ne mitù yètù miinyika mpindyewu, ne myoyi yètù pàmwè naayi, biikàle ne dimanya dyà ne Yesù wàkamba ne: “Ewu udi utèèleja Mèyi Àànyi ne wítabuujà Ewu udi muNtùme, ùdi ne Mwoyi wa kashidi ne kaakulwa ku Cilumbulwidi nànsha, kàdi wàmányi kuumuka ku lufù wàyi ku Mwoyi.” Bamanyè ne twètù, ku ngàsà wa Nzambì, tudi ne cyôci aci munda mwètù; biikàle ne didìlambula kùdiYe mu dindà emu ne, nsòmbelu yètù neyishintulukè, kubangila ku ditùkù edi, ne netwikalè batàmbe kutwishiiibwa mu ngeelèlù wetù wa meeji. Netwikalè tuditacisha bwà kwikala ne nsòmbelu wa kalolo kàà menemene ne didipwekesha, mu mùshindù wà ne, twitabuujà ne citùdì tulòmba Nzambì, Nzambì neàtùpèèshèci muntu ne muntu. Nènku katwàkwikala twambangana bibi muntu ne mukwèndè to, anyi bwà muntu nànsha umwe. Netùsambidile beena lukuna bèètù ne netùbànange, netwenzele bàdì batwenzela bibi bìmpè. Nzambì ngudi Mulumbulwishi wa udi mubinge ne udi mupùile. Pàmwè ne . . .

<sup>329</sup> Biimànyine pa cyôci eci, ne mitù yètù miinyika, nèngìikalè mwà kulòmba mulunda wetù mulenga, Mwanèètù Lee Vayle, bu yêyè mwà kutangalajaku batèèleji ne mwàkù wà disambila. Mwanèètù Vayle.



63-0714M Bwà Cinyi Kwela Mbilà? Akùlà!  
Branham Tabernacle  
Jeffersonville, Indiana États-Unis

CILUBA

©2021 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Dîyî dya bwena-cintu

Makenji ônsò tudi badilamininyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)